

LELE MALAPE IPAKAWAAKANA MATIUS

Pogau Bhaa-bhaana

Boku *Matius* apakawaaka i ingkita Lele Malape ande Isa satotuuna Raja mopasalaamatina ijanjiakana Aulata'ala. Alaloi Isa sumaimo Aulata'ala apamondoa opea mopadhana ijanjiakana i nuncana Pojanjia Mangenge i uumatina. Moomini Isa alaahiri minaaka i miana Israel tee adhadhi mboo miana Israel, maka Lele Malape sumai inda soo to miana Israel maka to saangua dunia.

Boku *Matius* sii atotapi malape, pepuu i laahiri-ana Isa, kasiimpo to kapebhahoana tee kapan-coba inamisina, kasiimpo to ipewauna i Galilea. Iwe sumai incia ahotubaa, aadhari tee alancau mia. Sapadhana sumai boku incia sii apetulatu-laaka lingkaana Isa minaaka i Galilea sakawana i Yerusalem, tee opea momembalina tee Isa i manga eo kapadhaana dhadhina i dunia sii motokamatana mpuu i eona matena tee i eona bhanguana.

Sala saangu ipekatamoakana Matius ande Isa satotuuna Guru momaoge, moadharina ande Aulata'ala aparintangi mboomo Raja. Isa uka atokailiili apogauaka ma'ana minaaka i Hukumuna Aulata'ala. Abhari minaaka i manga kaadharina Isa sumai akalompoa mboomo motopadhana motosau-sauna malape. Dhaangia lima kolompo: (1) Hotubaa i kogunuana mokokaitana tee iwaajibuaka, manga hakuna, tee haejati

dhadhina manga uumatina Aulata'ala (pasala 5-7); (2) apomasusuakea i sapulu rua mia murina Isa to akarajaa tugasina (pasala 10); (3) manga ibarati to kadhaangiana Aulata'ala wakutuuna Aulata'ala aparintangi mboomo Raja (pasala 13); (4) kaadharina to ma'anana mboomo murina Isa (pasala 18); tee (5) kaadhari to aahiri zamani tee o umbaana Anana Maanusia (pasala 24-25).

Antona

Kaburina siwuluna Isa Al Masi tee laahiriana
1:1--2:23

Karajaana Yahya apapebhaho *3:1-12*

Papebhahona tee kawuju to Isa *3:13--4:11*

Kalaianina Isa i tanga-tangana ra'eatina Galilea
4:12--18:35

Minaaka i Galilea sakawana i Yerusalem *19:1--20:34*

I eo-eo kapadhaa i Yerusalem *21:1--27:66*

Bhanguana Isa tee patiumbana karona *28:1-20*

Manga Sarona Opuana Isa Al Masi

1:1-17

(Luk. 3:23-38)

¹ Siimo manga opuana Isa Al Masi, siwuluna Daud, siwuluna Ibrahim. Minaaka i Ibrahim sakawana i Daud, manga sarona opuana Isa sumai mboomo sii:

² Ibrahim akoanaakamo Ishak, Ishak akoanaakamo Yakub, Yakub akoanaakamo Yuda tee manga witinaina,

³ Yuda akoanaakamo Peres tee Zerah. Inana Peres tee Zerah isarongiaka Tamar. Peres akoanaakamo Hezron, Hezron akoanaakamo Ram,

⁴ Ram akoanaakamo Aminadab, Aminadab akoanaakamo Nahason, Nahason akoanaakamo Salmon,

⁵ Salmon akoanaakamo Boas. Inana Boas isarongiaka Rahab. Boas akoanaakamo Obed. Inana Obed isarongiaka Rut. Obed akoanaakamo Isai,

⁶ Isai akoanaakamo Raja Daud, Raja Daud akoanaakamo Sulaiman minaaka i iaiarona Uria;

⁷ Sulaiman akoanaakamo Rehabeam, Rehabeam akoanaakamo Abia, Abia akoanaakamo Asa,

⁸ Asa akoanaakamo Yosafat, Yosafat akoanaakamo Yoram, Yoram akoanaakamo Uzia,

⁹ Uzia akoanaakamo Yotam, Yotam akoanaakamo Ahas, Ahas akoanaakamo Hizkia.

¹⁰ Hizkia akoanaakamo Manasye, Manasye akoanaakamo Amon, Amon akoanaakamo Yosia,

¹¹ Yosia akoanaakamo Yekhonya tee manga witinaina wakutuuna miana Israel atobhanaka i tana Babel,

¹² Yekhonya akoanaakamo Sealtiel sapatdhana miana Israel atobhanaka i tana Babel. Sealtiel akoanaakamo Zerubabel,

¹³ Zerubabel akoanaakamo Abihud, Abihud akoanaakamo Elyakim, Elyakim akoanaakamo Azor,

¹⁴ Azor akoanaakamo Zadok, Zadok akoanaakamo Akhim, Akhim akoanaakamo Eliud,

¹⁵ Eliud akoanaakamo Eleazar, Eleazar akoanaakamo Matan, Matan akoanaakamo Yakub,

¹⁶ Yakub akoanaakamo Yusuf, Yusuf sumai umanena Siti Mariam, minaaka i Siti Mariam sumai apalaahirimo Isa Al Masi. Ma'anana Al Masi "Raja ipilina Aulata'ala to apasalaamatiaka uumatina."

¹⁷ Jadi bhari-bharia siwuluna apepuu minaaka i Nabii Ibrahim sakawana i Raja Daud dhaangia sapulu pata siwulu, tee apepuu minaaka i Raja Daud sakawana wakutuuna miana Israel atobhanaka i tana Babel siwuluna dhaangia sapulu pata mia uka, tee mboo sumai uka minaaka i wakutuuna miana Israel atobhanaka i tana Babel sakawana Al Masi dhaangia sapulu pata mia siwuluna.

Laahiriana Isa Al Masi

1:18-25

(Luk. 2:1-7)

¹⁸ Mboo siimo tulatulana laahiriana Isa Al Masi. Inana siitumo Siti Mariam, apoporaee tee Yusuf. Maka indapo manga incia akawi, garaaka Siti Mariam abhawa-bhawamo. (Yusuf inda amataua ande Siti Mariam abhawa-bhawa roonamo kuasana Rohina Aulata'ala).

¹⁹ Yusuf poraena sii mia mobanara, jadi bheahaejatimo abhotuki Siti Mariam, maka inda amarobhoakea, mamudhaakana Siti Mariam inda amaea i aroana mia bhari.

²⁰ Maka tangasaana afikiri giu incia sumai, malaa'ekatina Kawasana Opu apatiumba karona i nuncana pongipina tee apogau, "E Yusuf, anana Daud, bholi umaeka utarima Siti Mariam amembali bhawinemu roonamo o anaana ibhawa-bhawana itu minaaka i Rohina Aulata'ala Momangkilo.

21 Incia bheapalaahiri anaana umane tee ingkoo usarongiakea Isa,* roonamo Inciamo mopasalaamatina uumatina minaaka i dosana manga."

22 Bhari-bharia sumai amembali mamudhaakana apamondoa Firimanina Kawasana Opu ipakawaakana i nabiina,

23 "Kamatea! Samia kabuabua bheabhawabhawa tee apalaahiri samia Anaana umane tee manga mia bheasarongiakea Imanuel,"

(ma'anana, "Aulata'ala apobhawa tee ingkita.")

24 Sabhanguna Yusuf minaaka i koleana, incia apewaumo opea iparintangiakana malaa'ekatina Kawasana Opu. Incia atarimamea Siti Mariam to amembali bhawinena.

25 Moomini mboo sumai, incia sadhaadhaa inda aporomuakea sakawana Siti Mariam apalaahiri anaana sumai. Salaahirina Anaana sumai, Yusuf asarongiakamea Isa.

2

Manga Mia Ahalii Nujumu minaaka i Timbu

2:1-12

¹ Isa alaahiri i Bait Lahim i Tana Yudea i zamanina pamarintana Raja Herodes. Kasiimpomo aumbamo i kota Yerusalem pia mia ahalii nujumu minaaka i lipu maridho i Timbu.

² Manga incia sumai apekaabha-abhamo kooni, "Tapai Rajana miana Yahudi siimpo molaahirina

1:21 1:21 Luk. 1:31. * **1:21 1:21** Isa: Ma'anana Isa pogauna Ibrani, "Kawasana Opu apasalaamatiaka." **1:23 1:23** Yes. 7:14.

1:25 1:25 Luk. 2:21.

itu? Ingkami padhamo takamatea kalipopona abhete i Timbu tee ingkami taumba iwe sii mamudhaakana tasomba Incia."

³ Sanampuu Raja Herodes arangoa hali incia sumai, atokidhamo mpuu tee uka bhari-bharia manga mia momboorena i Yerusalem.

⁴ Sumaimo Raja Herodes aromusaka manga imamu maoge tee manga ahalii Hukumu Taurati miana Yahudi. Kasiimpomo aabhamo manga kooni, "Bhealaahiri iapai Al Masi?" Ma'anana Al Masi, "Raja ipilina Aulata'ala to apasalaamatiaka uumatina."

⁵ Lawanimo manga kooni, "I kampo Bait Lahim, i Tana Yudea roonamo mboo sumaimo motoburina i nuncana kaburina samia nabii kooni,

⁶ 'E Bait Lahim kota i Tana Yudea,
sampeampearo ingkoo mencuana momaid-
hiidhina i tanga-tangana manga incia
moparintana i Yudea,
roonamo minaaka ingkoo bheabhangu samia
momembalina kapala
to mowuluna uumatiku Israel.' "

⁷ Sapadhana incia sumai, Raja Herodes akembamo manga mia ahalii nujumu sumai maka inda atomatau i mia bhari tee aemani fikiri manga lentuaka naepia kalipopo sumai apepuu atokamata.

⁸ Kasiimpo atumpumea manga incia alingka i kota Bait Lahim, "Lingkakomiu peeloa o Anaana sumai pekalape. Ande upokawaakea, dhawuaku lele mamudhaakana iaku kumembali kusombaia."

⁹ Sarangona opea ipogauakana raja, alingkamo manga incia. Sanampuu o kalipopo ikamatana abhete i Timbu sumai atiumba pendua tee apor-ikanaakea manga incia, kasiimpo aunto i bha-wona tampana Anaana sumai.

¹⁰ Wakutuuna kalipopo sumai atokamata pen-dua, manga incia akaunde-undemo mpuu.

¹¹ Kasiimpo apesuomo manga incia i bhanua sumai, akamata Anaana sumai tee Siti Mariam inana. Saanampuu asujumo manga incia i aroana Anaana sumai. Manga incia abungkale sorongana harataa kasiimpo apasaraakaakea to Anaana sumai bulawa, dhupa, tee polona kau mawondu.

¹² Alaloi pongipina manga audhaniakamea mamudhaakana bholi ambuli i Raja Herodes. Sumaimo manga ambuli i lipuna manga alalo i dhala mosagaanana.

Apalai i Mesir *2:13-15*

¹³ Sapadhana manga mia ahalii nujumu apalausaka lingkaana manga incia, malaa'ekatina Kawasana Opu apatiumbaaka karoni i Yusuf i nuncana pongipina. Kooni, "Bhangumo, aalea Anaana itu tee inana, tee upalaiakea i Mesir. Kasiimpo umbooreakea iwe sumai sampe kudhawu lele to ingkoo, roonamo Raja Herodes tangasaana apeelo Anaana incia itu bheapabinasea."

¹⁴ Sumaimo Yusuf abhangu tee alingkaakea malo sii abhaweana Anaana sumai tee inana apalai-akea i Mesir.

¹⁵ Manga incia amboore iwe sumai sampe Herodes amate. Tee mboo sumai amondomo Firimanina ipakawaakana Kawasana Opu alaloi nabiina, "Iaku kukemba Anaku minaaka i Mesir."

Pekamatena Manga Anaana i Bait Lahim

2:16-18

¹⁶ Wakutuuna Herodes amataua ande manga ahalii nujumu sumai agau-gau, incia a'amaramo mpuu. Incia aparintaakamo manga suludaduna to apekamate bhari-bharia anaana umane moko'umuruna rua tao i tambe i kampo Bait Lahim tee i lipu i saripina. Umuru incia sii apokana tee wakutuuna itarimana minaaka i manga miana ahalii nujumu.

¹⁷ Tee mboo sumai amondomo Firimani ipakawaakana Nabii Yeremia,

¹⁸ "I lipu Rama atorango suarana mia motangina imaporoakana inca, akakee-kee tee amaasi incana.

Rahel atangisi manga anana, manga anana sumai amatego, sabutuna inda dhaangia o mia momembalina mohiburua."

Ambuli minaaka i Mesir

2:19-23

¹⁹ Wakutuu Herodes amatego, malaa'ekatina Kawasana Opu ambuli apatiumbaaka karoni i Yusuf i nuncana pongipina i Mesir.

²⁰ Incia apogau, "Bhangumo, alamea Anaana sumai tee inana tee umbulimo i tana Israel, roon-amo manga mia mohaejatina mopekamatena Anaana sumai amatego."

²¹ Saanampuu abhangumo Yusuf, aalamea Anaana sumai tee inana tee ambuli i tana Israel.

²² Maka wakutuuna arango Arkhelaus amembali raja i Poropinsi Yudea abholosi Herodes, amana, Yusuf amaekamo to alingka iwe sumai. Sapadhana incia sumai, Yusuf atarima kaudhania alaloi pongipina tee alingkamo i Poropinsi Galilea.

²³ Incia amboore i kampo isarongiaka Nazaret tee mboo sumai amondomo Firimanina ipakawaakana alaloi manga nabii, "Incia bheasarongia miana Nazaret."

3

Nabii Yahya Mopapebhahona Manga Mia Motoba

3:1-12

(Mrk. 1:1-8; Luk. 3:3-9,15-17; Yah. 1:19-28)

¹ Wakutuu incia sumai aumbamo Nabii Yahya mopapebhahona manga mia motoba. Incia apakawaaka lele minaaka i Aulata'ala to manga mia i Tana Matuuna Yudea, koonina,

² "Tobamo, roonamo amakasumo Pamarintana Aulata'ala!"

³ Inciamo ipogauakana Nabii Yesaya wakutuuna incia apogau,

"Atorango suarana mia mokagora-gorana i tana matuu,

'Pasiapuakea o dhala to Kawasana Opu!

Pekakatea o dhala bheilaloina!" "

⁴ Pakeana Nabii Yahya atokarajaa minaaka i buluna unta tee o kamandana minaaka i

kuli. Sainamo kinandena minaaka i kabhoro tee golana uwanina koo.*

⁵ Kasiimpo aumbamo manga mia bhari minaaka i Yerusalem, minaaka i saangua Tana Yudea, tee minaaka i sakaaratea Umala Yordan to apokawaakea.

⁶ Manga incia a'akui dosana tee apapebhahoa Nabii Yahya i Umala Yordan.

⁷ Wakutuuna Nabii Yahya akamata abhari manga mia minaaka i rua rombongana agama Yahudi isarongiaaka rombongana Farisi† tee uka Saduki‡ aumba uka to atopapebhaho, incia apogaumo, "E ingkomiu mboomo fe'elina ulo! Incema mopaumbakomiu ande umembali upalai minaaka i amarana Aulata'ala bhemoumbana?"

⁸ Sumaimo ingkomiu ukobhake momalape to bukutiina utobamo

⁹ tee bholimo upogau i nuncana ngangaramiu kooni, 'Iaku kubebasi minaaka i kahukumuna Kawasana Opu roonamo Nabii Ibrahim dhaangiapo opuaku!' So'alina ingkomiu o siwu-

* **3:4 3:4** Kananeana dhadhina Nabii Yahya apokana mboo kananeana Nabii Ilyas i zamani mangenge. † **3:7 3:7** *rombongana Farisi*: Rombongana Farisi saangu rombongana agama Yahudi mosadiana mopotaangiakana bhari-bharia parintana Nabii Musa tee uka opea iranganina opuana manga miana Yahudi. Bhari-bharia Hukumuna Taurati tee adatina opuana tabeana atoose mpuu-mpuu. ‡ **3:7 3:7** *Saduki*: Rombongana Saduki dhaangia saangu rombongana kapalana agama Yahudi. Manga incia soo aparacaea tee lima boku bhaa-bhaana i Pojanjia Mangenge isarongiaka Kitabi Taurati iburina Nabii Musa, maka inda aparacaea tee manga kitabina nabii mosagaanana. Manga incia inda aparacaea maanusia bheadhadhi pendua saphadhana amate. Kamata Mrk. 12:18-27. **3:9 3:9** Yah. 8:33.

luna Nabii Ibrahim mencuana opeopea, roon-amo kupogau tee ingkomiu, Aulata'ala amembali apadhaangia anaana to Ibrahim minaaka i manga bhatu sii.

¹⁰ Sii-sii o ndamu atopasiapumo i kulesena kau. Bhari-bharia puuna kau inda mokobhakena malape bheatopale tee atobhanaka i nuncana waa.

¹¹ Iaku kupapebhahokomiu tee uwe to bukutiina ingkomiu utobamo, maka dhaangia bhemoumbana sapadhana iaku momalangana kuasana minaaka i iaku, to kubungkale sandalina uka iaku inda kulaenga. Incia bheapapebhahokomiu tee Rohina Aulata'ala Momangkilo tee waa§ mamudhaakana ingkomiu umangkilo minaaka i dosamiu.

¹² Katepi dhaangia i limana tee Incia bheapekangkilo tampana papogaana ompolena gandum. Gandum bhearombusakea i nuncana kampirina, maka bhari-bharia kulina bheatunua i waa inda momate."

Isa Apapebhahoa Nabii Yahya

3:13-17

(Mrk. 1:9-11; Luk. 3:21-22; Yah. 1:32-34)

¹³ Kasiimpo aumbamo Isa minaaka i Galilea aporope i Umala Yordan. Iwe sumai Incia apokawa tee Nabii Yahya tee aemani to apapebhahoa.

3:10 3:10 Mat. 7:19. § **3:11 3:11** I aeati incia sii, waa amembali gambarana Aulata'ala, siitumo Incia amembali apekangkilo mia minaaka i manga dosana, mboomo uka o waa akoguna to apekangkilo bulawa minaaka i manga zatu mosagaanana.

¹⁴ Maka o Yahya a'usaha amendeu aose opea iemanina Isa tee apogau, "Satotuuna tabeana iaku mofaraluuna bheupapebhahoaku, maka apokia Ingkoo moumbana i iaku?"

¹⁵ Apogaumo Isa, "Inda apokia giu incia sumai atokarajaa roonamo tapewau mboo sii rampaakanamo bhari-bharia o peeluana Aulata'ala." Sarangona opea ipogauakana sumai, Nabii Yahya uka aose opea ipogauakana Isa.

¹⁶ Sapadhana apapebhahoa, Isa alimbamo minaka i uwe. Wakutuu incia sumai uka o laiana atobungkale tee Incia akamatamo Rohina Aulata'ala Momangkilo asapo mboomo manumanu jarajara i bhawona.

¹⁷ Kasiimpo atorangomo suara minaka i sorogaa mopogauna, "Siimo o Anaku imaasiakaku tee Inciamo ipeeluku."

4

Kawuju i Tana Matuu

4:1-11

(Mrk. 1:12-13; Luk. 4:1-13)

¹ Sapadhana incia sumai o Isa abhawe Rohina Aulata'ala apangara i tana matuu mamudhaakana acobaia Ibilisi mokapalaikina manga seetani.

² Pata pulu eo, pata pulu malo o Isa apoasa kasiimpo anamisimo kaara.

³ Ibilisi mowujuna aumba tee apogau, "Roonamo Ingkoo o Anana Aulata'ala, tumpua manga bhatu sii amembali roti."

3:17 3:17 Bhaa. 22:2; Zab. 2:7; Yes. 42:1; Mat. 12:18; 17:5; Luk. 9:35.

⁴ Maka o Isa alawani, "I nuncana Hukumu Taurati padhamo atoburi, 'Maanusia adhadhi mencuana tangkanamo minaaka i roti, maka minaaka i bhari-bharia firimani ibhoasakana Aulata'ala.' "

⁵ Kasiimpo Ibilisi abhawa Isa i Yerusalem, kota mangkilona miana Yahudi tee adhikaia i bum-bunga Baitulla.

⁶ Pogauna Ibilisi, "Roonamo Ingkoo Anana Aulata'ala, pakotibua o karomu i tambe sii! Roonamo padhamo atoburi i nuncana Kitabi Momangkilo, 'Aulata'ala bheatumpu manga malaa'ekatina to ajaganiko,' tee uka, 'Manga malaa'ekati bheatanampeakako tee limana mamudhaakana o aemu inda akangkanai bhatu.' "

⁷ Isa apogau, "Dhaangia uka motoburina i nuncana Hukumu Taurati, 'Bholi u'uji Kawasana Opu, Aulata'alamu.' "

⁸ Kasiimpo Ibilisi abhawa Isa i bhawona gunu momalanga mpuu tee apakamataakea bhari-bharia pamarinta i dunia sii tee sagala giu kamuliangina.

⁹ Apogaumo Ibilisi, "Bhari-bharia sumai kudhawuakea to Ingkoo, somanamo Ingkoo usuju tee usombaaku."

¹⁰ Kasiimpo Isa alawani, "Dhencumo Ibilisi! Roonamo i nuncana Hukumu Taurati padhamo atoburi, 'Sombamo i Kawasana Opu, Aulata'alamu tee tangkanamo i Incia usambahea.' "

¹¹ Sabutuna o Ibilisi sumai adhencumo minaaka i Isa tee manga malaa'ekati aumbamo to

alaiania.

Isa Apepuungi Karajaana i Galilea

4:12-17

(Mrk. 1:14-15; Luk. 4:14-15)

¹² Wakutuuna Isa arango Nabii Yahya atorako, Incia alingkamo i Poropinsi Galilea.

¹³ Incia abholi kampo Nazaret kasiimpo amboore i kampo Kapernaum modhaangiana i saripina Tawo Galilea i Tana Zebulon tee Tana Naftali.

¹⁴ Tee mboo sumai amondomo Firimani ipakawaakana Nabii Yesaya,

¹⁵ "Tana Zebulon tee Tana Naftali,
dhala i tawo, i sawetana Umala Yordan
i lipuna Galilea, tampa imbooresina manga
lipu mosagaanana mencuana miana Israel.

¹⁶ Manga mia momboorena i nuncana kalalanda
padhamo akamata kainawa momainawa
mpuu,

tee manga mia momboorena isalibumbuna
ajalana,
padhamo apatiumbaakea cahea
momainawa."

¹⁷ Minaaka i wakutuu incia sumai o Isa apepu-
umo apakoleleaka, "Tobamo, roonamo Pamarin-
tana Aulata'ala amakasumo!"

Isa Akemba Manga Murina Bhaa-bhaana

4:18-22

(Mrk. 1:16-20; Luk. 5:1-11)

¹⁸ Wakutuuna Isa tangasaana adhala i bhi-
wina Tawona Galilea, Incia akamatamo rua mia

umane mopowitinai, siitumo Simon isarongiaka uka Petrus tee Andreas o witinaina. Manga incia tangasaana atudhaaka jalana i tawo, roonamo manga incia sii o pande jalana ikane.

¹⁹ Kasiimpo Isa apogau i manga incia, "Maimo ose Iaku tee bhekupamembalikomiu o pande jalana maanusia."

²⁰ Manga incia alausaka abholia o jalana kasiimpo aose Incia.

²¹ Isa alingka torosu kasiimpo akamatamo rua mia umane mopowitinai mosagaanana, saron a o Yakub tee Yahya. Manga incia apoose tee amana mokosaroakana Zabdi tangasaana alapelape jalana i nuncana bhangka. Isa akembamo manga incia uka,

²² sabutuna manga incia alausaka abholia o bhangkana tee abholi o amana kasiimpo aose Isa.

Isa Aadhari tee Apaunto Panyakina Manga Mia Bhari

4:23-25

(Luk. 6:17-19)

²³ Isa alingka atipua bhari-bharia lipu i Poropinsi Galilea. Incia aadhari i manga tampana ibaadatina miana Yahudi tee apakawaaka Lele Malape Pamarintana Aulata'ala, tee apaunto sagala giuna panyaki tee apaunto kapiina manga mia mobalacina badana.

²⁴ Lelena Isa atorango i saangua lipuna Poropinsi Siria. Kasiimpo manga mia mokopanyaki, mia mosukara, mia ipesuaikina

seetani, mia ikangkanaina kapii mate manu tee o mia morempa abhawea i aroana, bhari-bharia manga mia incia sumai apauntoa o kapiina.

²⁵ Abhari mpuu o mia moosea i wakutuu incia sumai. Dhaangia moumbana minaaka i Poropinsi Galilea, dhaangia mominaakana i Dekapolis, mominaakana i Yerusalem, mominaakana i Yudea, tee mominaakana i sawetana Umala Yordan.

HOTUBAA I GUNU PASALA 5--7

5

Bhoasaka Momasanaa

5:1-12

(Luk. 6:20-23)

¹ Wakutuuna Isa akamata mia bhari sumai, Incia apenemo i bhawona kabumbu. Sauncurana, aumbamo manga murina.

² Isa apepuumo aadhari manga incia,

³ "Amasanaamo manga mia misikini i aroana Aulata'ala,
roonamo manga incia amembalimo uumatina Kawasana Opu i nuncana Pamarintana Aulata'ala.

⁴ Amasanaamo manga mia momaasina incana,
roonamo Aulata'ala bheapekaogea incana.

⁵ Amasanaamo manga mia momaluluna incana,
roonamo manga incia bhemotarimana tin-aurakana alamu sii.

- 6 Amasanaamo manga mia momaara tee momatuuna bhorokona to apewau peeluana Aulata'ala,
roonamo Aulata'ala bheapekambosu manga incia.
- 7 Amasanaamo manga mia modhawuakana kaasi,
roonamo manga incia bheatarima kaasi uka.
- 8 Amasanaamo manga mia momangkilona incana,
roonamo bheakamatea Aulata'ala.
- 9 Amasanaamo manga mia mobhawana kasanaa i tanga-tangana maanusia,
roonamo manga incia bheatosarongi manga anaana Aulata'ala.
- 10 Amasanaamo manga mia monaraka roonamo bheapewau peeluana Aulata'ala,
roonamo manga incia amembalimo uumatina Kawasana Opu i nuncana Pamarintana Aulata'ala.
- 11 Umasanaamo ingkomiu, ande rampaakanamo Iaku utomangkatu, utosikisaa, tee afitanaakomiu mia.
- 12 Ukaunde-undemo tee umasanaamo, roonamo fahalamiu amaoge i sorogaa. I zamani mangenge uka manga nabii atosikisaa."

Garana Dunia tee Kainawana Dunia

5:13-16

(Mrk. 9:50; Luk. 14:34-35)

- 13 "Ingkomiumo o garana dunia. Maka ande o gara sumai amembali amatawaa, tee opea

o gara sumai amembali atopekapara pendua? Dhaanamo o gara sumai indamo tee gunana, kasiimpo atobhanaka tee alanda-landakia mia.

¹⁴ Ingkomiumo o kainawana dunia. Kota modhaangiana i bhawona gunu inda amembali atobuniaka.

¹⁵ Roonamo inda dhaangia o mia moparorena padamara kasiimpo atutubhiakea langka. Incia bheadhikaia o padamara sumai i aena padamara mamudhaakana amembali asuluwi bhari-bharia mia i nuncana bhanua.

¹⁶ Mboo sumai uka tabeana o kainawamiu akocahea i aroana mia mamudhaakana manga incia akamatea o giu malape ipewaumiu, tee apujimo Amamiu i sorogaa."

Isa tee Hukumuna Taurati

5:17-48

(Luk. 6:27-36)

¹⁷ "Bholi uabhaia ande kuumba to kupanainda Hukumu Taurati atawa kupanainda kitabina manga nabii. Umbaaku mencuana to kupanainda manga giu incia sumai, maka to kupamandoa.

¹⁸ Satotuuna kupogau tee ingkomiu, kangen-gena o laiana tee alamu indapo amofu, inda saangu horofu maidhiidhi atawa satanda titi uka bheatohapusu minaaka i Kitabi Taurati ande bhari-bharia indapo atopamondo.

¹⁹ Sumaimo, incema mopanaindana sala saangu parintana Taurati moomini momaidhiidhina mpuu, tee aadhariakea i mia

5:14 5:14 Yah. 8:12; 9:5. **5:15 5:15** Mrk. 4:21; Luk. 8:16; 11:33.

5:16 5:16 1Ptr. 2:12. **5:18 5:18** Luk. 16:17.

mosagaanana to apewau mboo sumai, incia bheapotibhaaka kauncuramaka moporitambe mpuu i nuncana Pamarintana Aulata'ala. Maka, incema moosena parintana Taurati tee aadhariakea i mia mosagaanana to apewau mboo sumai uka, incia bheapotibhaaka kauncuramaka momalanga i nuncana Pamarintana Aulata'ala.

²⁰ Sumaimo Iaku kupogau tee ingkomiu, ande ingkomiu inda uose peeluana Aulata'ala alabhi minaaka i manga ahalii Hukumu Taurati tee manga miana Farisi, ingkomiu inda umembali upesua i nuncana Pamarintana Aulata'ala."

²¹ "Ingkomiu padhamo urangoa ipakawaakana Aulata'ala to opu-opuata, 'Bholi upekamate mia! Incema-incema mopekamatena mia tabeana atohukumu.'

²² Maka Iaku kupogau tee ingkomiu, incema-incema mo'amarana tee witinaina, incia tabeana atohukumu.* Tee incema-incema momangkatuna witinaina tee apogau, 'E kaafiri!,' tabeana atobhawa i aroana i Mahakama Agama, tee incema-incema mopogauna, 'E kabhongo-bhongo,' tabeana atopapesua i waana narakaa."

²³ "Sumaimo, ande tangasaana ubhawa pasombaamu i tampana tunuana kurubani, saanampuu utoudhanimo tee kasalahamu i witinaimu,

²⁴ bholimea o pasombaamu sumai i aroana tampana tunuana kurubani, kasiimpo ulingkapo

5:21 5:21-26 Luk. 12:57-59. **5:21 5:21** Limb. 20:13; Kap.

5:17. * **5:22 5:22** Dhaangiapo uka manga kaburi moman-geenge mopogauna, "Maka kupogau tee ingkomiu, incema-incema mo'amarana tee witinaina inda ako'alasa, incia bheatohukumu."

porikana upoma'afuaka tee witinaimu, kasiimpo umbuli pendua to upasombaaka kurubanimu i aroana Aulata'ala."

²⁵ "Madheimo upoma'afuaka tee bhalimu sumai kananteana dhaangiapo upobhawa tee incia tangasaana i dhala mamudhaakana o bhalimu sumai inda apasaraakaako i pangadila, kasiimpo haakimu apasaraakako i suludaduna pangadila tee atorongkuko.

²⁶ Iaku kupogau tee ingkomiu, satotuuna ingkomiu inda sampeampearo bheutopalimba mi-naaka iwe sumai ande ingkomiu indapo upomea bhari-bharia dhosamiu."

²⁷ "Ingkomiu padhamo urangoa o firimani ipakawaakana, 'Bholi upewau zinaa.'

²⁸ Maka Iaku kupogau tee ingkomiu, incema-incema mokamatana bhawine tee apeelua, sumaimo mia incia sumai padhamo apewau zinaa i nuncana ngangarandana.

²⁹ Rampaakanamo sumai ande o mata kaanamu apasaladhalako, pintokia tee ubhanakea! Roonamo salabhina ukailanga sambali matamu tee ukailanga saangua badamu bhemitopapesuana i nuncana narakaa.

³⁰ Mboomo uka o lima kaanamu ande apasaladhalako, tumpoa tee ubhanakea! Roonamo salabhina ukailanga sambali limamu tee ukailanga saangua badamu bhemitopapesuana i nuncana narakaa."

³¹ "Tee padhamo afirimaniakea uka, 'Incema-incema mobhotukina bhawinena, tabeana aporikana adhawuakea sura kabhotu to bhawinena sumai.'

³² Maka Iaku kupogau tee ingkomiu, incema-incema mobhotukina bhawinena, tee o bhawinena sumai inda apewau zinaa, maka rampaakanamo pewauna umanena incia apewau zinaa. Sumaimo ande o bhawine incia sumai akawi, mokawiakea apokanamo uka apewau zinaa."

³³ "Ingkomiu padhamo urangoa o firimani ipakawaakana to manga opu-opuata, 'Bholi usumpa gau-gau, maka ukenia o sumpamu i aroana Kawasana Opu.'

³⁴ Maka Iaku kupogau tee ingkomiu, bholi sampeampearo uposumpa, malape uposumpaaka laiana, roonamo laiana sumai o kauncuramakana Aulata'ala,

³⁵ atawa o posumpaaka alamu, roonamo alamu sumai polandakana aena Aulata'ala, atawa uposumpaaka Yerusalem, roonamo Yerusalem sumai o kota mbooresana Kawasana Opu, Raja Maoge,

³⁶ tee bholi uposumpaaka bhaamu, roonamo ingkoo inda amembali upekaputi atawa upekaeta satake buluamu uka.

³⁷ Jadi soo upogaumo, 'Umbe' atawa 'Inda.' Bholi urangania o pogaumiu, ande dhaangia o labhina sumaimo aminaaka i Ibilisi."

³⁸ "Ingkomiu padhamo urangoa o firimani

5:31 5:31 Mat. 19:7; Mrk. 10:4. **5:32 5:32** Mat. 19:9; Mrk. 10:11-12; Luk. 16:18; 1Kor. 7:10-11. **5:34 5:34** Yak. 5:12; Yes. 66:1; Mat. 23:22. **5:35 5:35** Yes. 66:1; Zab. 48:3. **5:38 5:38** Limb. 21:24.

ipakawaakana mboo sii, 'Mata bholosiakea mata tee o nginci bholosiakea nginci.'

³⁹ Maka sii-sii kupogau tee ingkomiu, bholi uewangi mia mopewauna kadhaki tee ingkomiu, maka ande dhaangia motapana bhaga kaanamu, taroakea uka atapa bhaga kaaimu,

⁴⁰ tee ande dhaangia o mia motuntuko roonamo apeelu bajumu, dhawuakamea uka jubamu uka to incia.

⁴¹ Ande dhaangia o mia mopakisaako to usodhaakea barana karidhona sakilo, sumaimo usodhaakamea o bharana karidhona rua kilo.

⁴² Ande dhaangia o mia moemanina baramu, dhawuakea, tee ande dhaangia o mia moadhana baramu, bholi umendeua."

⁴³ "Ingkomiu padhamo urangoa o firimani ipakawaakana, 'Maasiakea o sabhangkamu tee ubancimea o musumu.'

⁴⁴ Maka laku kupogau tee ingkomiu, maasiakea o bhalimiu tee udo'aakea manga mia mosikisaakomiu.

⁴⁵ Tee mboo sumai, ingkomiu amembalimo anaana Amamiu i sorogaa, roonamo Aulata'ala apabhete matanaeo mencuana tangkanamo to mia malape, maka to mia madhaki uka. Incia uka apasapo wao mencuana tangkanamo to mia mosaalihi maka to mia mokodosa uka.

⁴⁶ Ande ingkomiu tangkanamo umaasiaka mia momaasiakakomiu, bholi uharapu bheutarima fahala minaaka i Aulata'ala. Roonamo manga pande enena balasitee uka apewau mboo sumai!

⁴⁷ Mboo sumai uka ande ingkomiu tangkanamo udhawu salamu to manga witinaimiu, opea o fahalamiu? Roonamo manga mia inda momatauna

Aulata'ala uka apewau mboo sumai!

⁴⁸ Rampaakanamo sumai tabeana o pem-ingkuimiu amondo, apokana mboomo Amamiu i sorogaa amondo."

6

Kaadharina to Tadhawu Sadakaa

6:1-4

¹ "Udhania pekalape, bholi ukarajaa ibaadati i aroana manga mia tee uharapu mamudhaakana atontoko manga incia. Roonamo ande mboo sumai, ingkoo inda bheupotibhaaka fahala minaaka i Amamu i sorogaa.

² Jadi ande ingkomiu bheudhawu sadakaa i mia misikini, bholimo upakoleleakea o giu incia sumai mboomo ipewauna manga mia munaafiki. Manga incia sadia apewau mboo sumai i nuncana tampana ibaadati tee i dhala oge, mamudhaakana apujia mia. Udhania, Manga incia padhamo atarima kapujia minaaka i manga mia, tee inda bheatarima fahala minaaka i Aulata'ala.

³ Maka ande ingkomiu bheudhawu sadakaa, bholi amataua lima kaaimiu opea ipewauna lima kaanamiu.

⁴ Ande mboo sumai, sadakaamiu inda atokamata, tee o Amamiu mokamatana giu inda motokamata sumai, bheabalasia o pewaumiu."*

6:1 6:1 Mat. 23:5. * **6:4 6:4** Dhaangiapo uka manga kaburina momangengena apogau kooni, "Kasiimpo Amamiu mokamatana pewauna motobuniakana, bheabholosikomiu tee fahala i tangatangana mia bhari."

*Kaadharina to Do'a**6:5-15**(Luk. 11:2-4)*

⁵ Wakutuuna udo'a, bholi mboo manga mia munaafiki. Manga incia sadia ado'a tee akabhale-bhale i tampana ibaadati tee i simpangana dhala oge mamudhaakana akamatea mia. Iaku kupogau tee ingkomiu, satotuuna o siimo fahala ipokawaakana manga incia.

⁶ Maka wakutuuna udo'a, upesua i nuncana kamara, tutubhia o bhamba tee udo'a i Amamiu inda motokamatana sumai. Kasiimpo Amamiu mokamatana giu inda motokamata sumai, abholosiakakomiu tee fahala.†

⁷ Wakutuuna udo'a, bholi uengu-engua mboomo kananea ipewauna manga mia inda momatauna Aulata'ala. Roonamo manga incia aabhia o do'ana bheatopearangoi ande aengu-engua.

⁸ Jadi bholi mboo manga incia, roonamo Amamiu amataumea porikana opea ifaraluumiu wakutuu ingkomiu indapo uemani i Incia.

⁹ Jadi udo'amo mboo sii:

'E Amamami i sorogaa,
Atomuliangimo o saromu.

¹⁰ Umbamo pamarintamu,
amembalimo opea ipeelumu
i alamu mboomo i sorogaa.

¹¹ Manga dhawuaka kinande eo sii sakawana,

6:5 6:5 Luk. 18:10-14. † **6:6 6:6** Dhaangiapo uka manga kaburina momangengena apogau kooni, "Kasiimpo Amamiu mokamatana pewauna motobuniakana, bheabholosikomiu tee fahala i tanga-tangana mia bhari."

¹² tee u'amponia o kasalahamami mboomo ingkami ta'amponi kasalahana mia mosala tee ingkami.

¹³ Bholi manga bhawa i nuncana kapancoba, maka manga rambasaka minaaka i giu momadhaki.

[Roona Ingkoomo mokopamarintana, mokuuasana tee momuliana sa'umurua. Amin.][‡]

¹⁴ Ande ingkomi u'amponi dosana mia mosala tee ingkomi, sumaimo Amamiu i sorogaa uka bhea'amponi dosamiu.

¹⁵ Maka ande ingkomi inda u'amponi dosana mia mosagaanana, sumaimo Amamiu i sorogaa uka inda bhea'amponi dosamiu."

Kaadharina to Poasa
6:16-18

¹⁶ "Mboomo uka wakutuuna ingkomi bheupoasa. Bholi apongkurubhi o roumiu mboomo manga mia munaafiki. Manga incia abhaliia o rouna mamudhaakana akamatea mia ande manga incia tangasaana apoasa.

¹⁷ Maka wakutuuna bheupoasa, bhanuia o roumiu tee umina-minaikia o buluamiu,

¹⁸ mamudhaakana inda tee momataua upoasa, tabeana o Amamiu inda motokamatana sumai momataua. Kasiimpo Amamiu mokamatana giu

[‡] **6:13 6:13** Dhaangiapo uka manga kaburi momangenge inda dhaangia tee aeati incia sii. **6:14 6:14** Mrk. 11:25.

inda motokamata sumai bheabholosiakakomiu tee fahala.§

Kaadharina to Tarombusaka Harataa

6:19-24

¹⁹ "Bholi urombusaka harataa to karomiu i dunia, iapai o ane tee rase amembali apekadhakia, tee o mia manako amembali arunggaia tee amanakoa.

²⁰ Maka urombusaka harataa to karomiu i sorogaa, iapai inda dhaangia o ane tee rase mopekadhakia tee inda dhaangia o mia manako momembalina morunggaia tee momanakoa.

²¹ Roonamo iapai o harataamu atodhika, iwe itu uka o incamu adhaangia!

²² Mata sumai o kanturuna bada. Ande o matamu amangkilo, sumaimo saangua badamu amainawa.

²³ Maka ande o matamu amarawu, sumaimo saangua badamu agalapu apoposa. Jadi, ande o kanturu i nuncana badamu sumai malalanda, ahandamo o kalalandana kagalapu sumai.

²⁴ Inda dhaangia o bhatua momembalina mokaarajaana tee mpuu-mpuuna incana i rua mia opu mopolasa, roonamo bhatua sumai dhaanamo bheamarika sala samia minaaka i rua mia opuna sumai, tee amaasiaka sala samia minaaka i manga incia. Atawa ata'ati i sala samia opuna, maka inda ata'ati i opuna mosagaanana.

§ **6:18 6:18** Dhaangiapo uka manga kaburi momangenge atoburi mboo sii, "Kasiimpo Amamiu mokamatana pewauna motobuniakana, bheabholosiakakomiu tee fahala i tanga-tangana mia bhari." **6:19 6:19** Yak. 5:2-3. **6:19 6:19-21** Luk. 12:33-34.

6:22 6:22-23 Luk. 11:34-36. **6:24 6:24** Luk. 16:13.

Rampaakanamo sumai, ingkomiu inda amembali sampearo ulaiani Aulata'ala tee uka ulaiani harataana dunia sii."

Kaadharina to Bholi Umeriaka Naile Naipua

6:25-34

(Luk. 12:22-31)

²⁵ "Rampaakanamo sumai Iaku kupogau tee ingkomiu, bholi umeri to dhadhimiu, tee opea to ikandemiui tee isumpumiui atawa opea to ipakemiui. Roonamo o dhadhi alabhi minaaka i kinande tee o bada alabhi minaaka i pakea!

²⁶ Kamatea o manu-manu i laiana. Manga incia inda apombula, inda ahewi, tee inda arombusaka kinande i nuncana kampirina, maka adhambaakea tee apakandea Amamiu i sorogaa! Buaka ingkomiui inda ulabhi ukoharagaa minaaka i manu-manu sumai?

²⁷ Incema mominaakana i tangatangamiui roonamo ameri incana amembali amarambeakea saidhe umuruna?

²⁸ Pokia ingkomiui umeri to pakeamiui? Kamatea o kamba-kamba motuwuna i inawu. Kamba-kamba sumai inda akarajaa tee inda atanu kapa to apamembalia kambari,

²⁹ maka Iaku kupogau tee ingkomiui, Raja Sulaiman tee bhari-bharia karangkaeana indamo apakana pakea momangadana mboomo kamba-kamba sumai!

³⁰ Jadi, ande mboo sumai o Aulata'ala apapaojo rumpu i inawu, modhaangiana i eo sii tee naileaka atobhanakamo i nuncana waa, sumaimo Incia dhaanamo adhawuakakomiui pakea molabhi, e manga mia inda moparacaea!

³¹ Roonamo sumai, bholimo umeri tee upogau, 'Opea bheikandemami?,' atawa, 'Opea bheisumpumami?,' atawa 'Opea bheipakemami?'

³² Manga giu incia sumai sadia apajerea manga mia inda momatauna Aulata'ala, maka o Amamiu i sorogaa amataua ande ufaraluu bhari-bharia sumai.

³³ Maka uporikanapo upeelo Pamarintana Aulata'ala tee uose peeluana, sumaimo Incia bheadhawuakako bhari-bharia giu mosagaanana uka to ingkomiu.

³⁴ Bholimo umeri tee opea momembalina naile, takawapea uka kasiimpo tafikiria. Jadi o kasukara i eo sii podhomo to eo sii."

7

Kaadharina Tahaakimu Mia

7:1-5

(Luk. 6:37-38,41-42)

¹ Bholi uhaakimu mia mosagaanana, mamudhaakana inda ahaakimukomiu Aulata'ala.

² Roonamo ande uhaakimu mia mosagaanana, mboo siitumo uka Aulata'ala bheahaakimukomiu. Tee opea ingkomiu u'ukuru mia mosagaanana, mboo sumai uka Aulata'ala bheapakea o ka'ukuru incia sumai to ingkomiu.

³ Pokia ingkoo ukamata rewuna kau i matana witinaimu, maka sapale balo-balo i nuncana matamu inda umataua?

⁴ Tuaapa umembali upogau tee witinaimu, 'Mai kupalimbaia o rewuna kau i nuncana matamu',

maka i matamu karomu dhaangia tee sapale balo-balo?

⁵ E munaafiki! Palimbapo porikana sapale balo-balo minaaka i matamu karomu, mamudhaakana atinda upokamata to upalimbaaka rewuna kau i matana witinaimu."

Hali Momangkilo tee Mokoharagaa

7:6

⁶ Bholi udhawuaka bara momangkilomiu i mantoa tee bholi utudhaaka muntiamiu i aroana bhawu mamudhaakana o bara mokoharagaa sumai inda alanda-landakiakea aena, kasiimpo o kodhadhi sumai ambuli abhembarukomiu.

Kaadharina to Taemani Do'a

7:7-11

(Luk. 11:9-13)

⁷ Emanimo, sumaimo bheadhawuakea to ingkomiu; peelo, sumaimo bheupotibhaakea; bhokua, sumaimo o bhamba bheatobungkale to ingkomiu.

⁸ Roonamo o mia moemani bheatarimaia, mia mopeelo bheapotibhaakea, tee o mia mobhokuna bhamba bheabungkaleakea bhamba.

⁹ Incema i tanga-tangamiu modhawuakana bhatu to anana, garaaka o anana sumai aemani roti?

¹⁰ Atawa adhawuakea ulo garaaka incia aemani ikane?

¹¹ Jadi, ande ingkomiu momadhakina pe-wauna umatau to upekadhawuaka momalapena to anamiu, ntaranamo uka o Amamiu i sorogaa! Atantumo Incia bheapekadhawuaka momalapena to manga mia moemanina i Incia.

*Dhala Mobanara**7:12-14*

¹² Pewaumo to mia mosagaanana opea ipeelumiu manga incia apewau to karomiu, roonamo mboomo sumai o kaadharina Hukumu Taurati tee Firimani ipakawaakana Aulata'ala alaloi manga nabiina.

¹³ Pesuamo ulaloi bhamba maseke, roonamo o bhamba momaewa tee o dhala momaoge aporope i dhala ibinasaaka, tee abhari o mia molaloia.

¹⁴ Sainamo o bhamba momaseke tee o dhala monaraka satotuuna o dhala moporopena i dhadhi sa'umurua, tee tangkanamo saidhe o mia mopotibhaakea."

*Kaadhari Mosaladhala**7:15-23*

¹⁵ "Pengkaanaka tee manga nabii gau-gau. Manga incia aumba i ingkomiu aporouaka dumba, maka satotuuna o ngangarandana manga incia mboomo serigala momasega.

¹⁶ Ingkomiu bheumatau manga incia sumai minaaka i fe'elina. Rumpu mokorui inda akobhakeaka bhakena angguru, tee o rumpu mokorui inda akobhakeaka bhakena kau ara.

¹⁷ Bhari-bharia puuna kau momalape, bheakobhakeaka bhake momalape, sainamo puuna kau momadhaki, bheakobhakeaka bhake momadhaki uka.

¹⁸ Puuna kau momalape inda amembali akobhakeaka bhake momadhaki, tee o puuna kau

momadhaki inda amembali akobhakeaka bhake momalape.

¹⁹ Bhari-bharia puuna kau inda mokobhakeakana bhake momalape bheatopale tee atobhanaka i nuncana waa.

²⁰ Jadi, ingkomiu bheumatau nabii gau-gau sumai minaaka i fe'elina.

²¹ Inda bhari-bharia mia mogoraakaaku, 'E Opu, E Opumami,' bheapesua i nuncana Pamarintana Aulata'ala, maka tangkanamo manga mia mopewauna peeluana Amaku i sorogaa.

²² I eona kiaamati abhari o mia bhemogorana, 'E Opu, e Opumami, ingkami padhamo tapake saromu tapakawaaka kasameana Aulata'ala, tee tapake saromu tapadhencu seetani, tee tapadhaangia bhari giu inda momentela.'

²³ Maka i wakutuu incia sumai Iaku bheku-jujuru tee kulawani, 'Iaku inda kumataukomiu! Dhencu minaaka i aroaku, e manga mia mope-wauna kadhaki!' "

Mia Mo'arifu tee Mia Mokabhongo-bhongo

7:24-27

(Luk. 6:47-49)

²⁴ "Mia morangona pogauku sii tee aosea, incia apokana mboomo mia mo'arifu mopakarona bhanuana i bhawona bhatu momatangka.

²⁵ Wakutuuna akowao aumba o mawa tee ngalu makaa ajoroi bhanua sumai, maka o bhanua sumai inda amarungga roonamo atopakaro i bhawona bhatu momatangka.

²⁶ Maka o mia morangona pogauku sii tee inda aosea, incia apokana mboomo mia mokabhongo-bhongo, mopakarona bhanuana i bhawona bhone.

²⁷ Wakutuuna akowao aumba o mawa tee ngalu makaa ajoroi bhanua sumai, sabutuna o bhanua sumai amarungga tee bhari-bharia amadhaki."

Namisina Morangoa

7:28-29

²⁸ Sapadhana aadhari, manga mia modhaangiana iwe sumai amentemo mpuu arango kaadharina,

²⁹ roonamo mboomo mia mokokuasa o Isa aadhari manga incia, inda mboomo manga ahali Hukumu Taurati.

8

Isa Apauntoaka Samia Mokopanyakina Kulidhaa

8:1-4

(Mrk. 1:40-45; Luk. 5:12-16)

¹ Sasapona Isa minaaka i kabumbu, abhari o mia mopologo-logona moosea.

² Wakutuu incia sumai aumbamo samia mokopanyakina kuli dhaa. Mia incia sumai asujumo i aroana Isa apoose apogau, "Opu, ande uunda, Opu amembali upekangkiloaku!"

³ Isa apaulu limana, adhingku mia incia sumai tee apogau, "Kuunda, mangkilomo!" Wakutuu incia sumai uka o panyaki kuli dhaana ailamo.

⁴ Kasiimpo Isa apogau tee incia, "Udhania, hali incia sii bholi apetulatulaakea i incemapo uka! Maka ulingkamo tee upatokamataaka karomu i imamu, kasiimpo upasombaaka kurubani mboomo iparintaakana Nabii Musa, to bukutiina ande ingkoo padhamo atopekangkilo."

Isa Apaunto Panyakina Samia Bhatuana Kapalana Suludadu i Kapernaum

8:5-13

(Luk. 7:1-10; Yah. 4:46-53)

⁵ Wakutuuna Isa apesua i Kota Kapernaum, aumbamo samia kapalana suludaduna Roma apokawa tee Incia tee aemani,

⁶ "E Opu, bhatuaku amapii i bhanua. Incia apotidhole arempa i kolemana tee anarakaa mpuu."

⁷ Apogaumo o Isa, "Iaku bhekuumba kupauntoa."

⁸ Lawanina kapalana suludadu sumai, "E Opu, iaku inda kulaenga kutarimako i bhanuaku, maka soo upogaumo moomini sanganga mamudhaakana aunto panyakina bhatuaku sumai.

⁹ Roonamo iaku sii o mia iparinta, maka dhaangia uka manga suludadu i tambe to iparintaku. Ande kupogau i sala samia suludadu sumai, 'Lingka!,' incia bhealingka, tee ande kupogau tee samiana uka, 'Maipo!,' incia bheaumba, atawa kupogau tee bhatuaku, 'Karajaapea sii!,' incia bheakarajaiaa."

¹⁰ Arango giu incia sumai, Isa amentemo. Kasiimpo apogau tee manga mia moosea, "Satotuuna

Iaku kupogau tee ingkomiu, Iaku indapo kuka-mata o mia momaogena iimani mboo sii i tanga-tangana miana Israel.

¹¹ Iaku kupogau uka tee ingkomiu, bheabhari o mia moumbana minaaka i timbu tee i bhara, kasi-impō manga incia auncura akande apobhawa tee manga Nabii Ibrahim, Ishak, tee Yakub i nuncana Pamarintana Aulata'ala.

¹² Sainamo manga uumati mopadhana ipili to mopesuana i nuncana Pamarintana sumai bheatobhanaka i nuncana kagalapu mopoposa, i tampa incia sumai dhaangia tee tangi momaporo tee mopakiri-kirina ngincina."

¹³ Kasiimpō Isa apogau tee kapalana suludadu sumai, "Mbulimo, tee amembalimo mboomo opea iparacaeamu." Sumaimo i wakutuu incia sumai uka aunto panyakina bhatuana sumai.

Isa Apaunto Kapiina Ina Maniana Petrus tee Manga Mia Mosagaanana

8:14-17

(Mrk. 1:29-34; Luk. 4:38-41)

¹⁴ Wakutuuna apesua i bhanuana Petrus, Isa akamatamo ina maniana Petrus amagari buluna i kolemana.

¹⁵ Incia akeni limana bhawine sumai, sabutuna ailamo o kagarina buluna. Kasiimpō bhawine sumai abhangu tee alaiani Isa.

¹⁶ Wakutuuna magarihi, abhari o mia ipesuaik-ina rohi madhaki abhawe i aroana Isa. Maka sangangamea o Isa apogau sabutuna alimbamo manga rohi madhaki sumai, Incia apaunto uka

kapiina bhari-bharia manga mia momapii iwe sumai.

¹⁷ Tee mboo sumai amondomo o firimani ipakawaakana alaloi Nabii Yesaya, "Incia moangkana kapiita tee mopauntona panyakita."

Kaadharina to Taose Isa

8:18-22

(Luk. 9:57-62)

¹⁸ Wakutuuna Isa akamata mia bhari apolibu-libuakea, Incia atumpumo manga murina to apolimba i sawetana tawo.

¹⁹ Kasiimpo aumbamo samia ahali Hukumu Taurati apogau tee Incia, "E Guru, iaku bhekuose iapaipo lingkaamu."

²⁰ Lawanina Isa, "Serigala dhaangia tee liana tee o manu-manu dhaangia tee poteona, maka o Anana Maanusia inda dhaangia dhingkanana to adhika bhaana."

²¹ Kasiimpo dhaangia samia o murina mosagaanana mopogauna tee Incia, "E Opu, undaakaaku kulingkapo porikana kukoburu amaku."

²² Maka o Isa apogau, "Osemo Iaku, taroakamo mia mate akoburua manga mia mate."

Ngalu Makaa Apauntoa

8:23-27

(Mrk. 4:35-41; Luk. 8:22-25)

²³ Kasiimpo Isa akompamo i nuncana bhangka tee manga murina uka aosea.

²⁴ Sanampuu amakaamo o ngalu i tawo sumai, sabutuna o bhangkana manga incia arambirambitakea ewo. Wakutuu incia sumai o Isa tangasaana akole.

25 Kasiimpo manga murina alingkamo abhangua tee apogau, "E Opu, manga pasalaa-matipo! Ingkita tabinasamo!"

26 Apogaumo o Isa i manga incia, "Pokia ingkomiu umaeka, e manga mia mokurana paracaea?" Kasiimpo akakaromo o Isa tee agoram-pangi ngalu tee tawo sumai, sabutuna o tawo sumai amembalimo amalino mpuu.

27 Manga murina amentemo tee apogau, "Mia tuaapa o mia incia sii, sampe o ngalu tee tawo uka aose parintana?"

Rua Mia Ipesuaikina Seetani Apauntoa

8:28-34

(Mrk. 5:1-20; Luk. 8:26-39)

28 Kasiimpo akawamo o Isa i sawetana tawo, i lipuna miana Gadara.* Iwe sumai Incia apokawa tee rua mia o mia ipesuaikina seetani siimpo moumbana minaaka i manga liana koburu. Manga incia amasega mpuu, sabutuna inda dhaangia o mia mobaranina molalona i dhala incia sumai.

29 Manga incia alimba tee akakee-kee, "Opea ifaraluumu tee ingkami, e Anana Aulata'ala? Buaka o uumbamu iwe sii to usikisaa ingkami moomini indapo akawa o henggana?"

30 Inda amaridho minaaka i manga incia dhaangia tee bhawu mobhari mpuu tangasaana apeelo kinandena.

* **8:28 8:28** Dhaangiapo uka manga kaburi momangenge mopogauna, 'Kasiimpomo Isa akawamo i sawetana tawo, i lipuna miana Gergesa.'

³¹ Kasiimpo manga seetani sumai aemanimo i Isa, "Ande Ingkoo bheupadhencu ingkami, sumaimo manga undaakamo to tapesuaiki manga bhawu sumai."

³² Pogauna Isa tee manga incia, "Lingkamo!" Kasiimpo alimbamo manga seetani sumai tee apesuaiki manga bhawu sumai. Lausakamo bhari-bharia bhawu i nuncana gulumana† sumai abuntuli tee amandawu minaaka i pimpi apesua i nuncana tawo sanampuu atondumo tee amatego i nuncana uwe.

³³ Manga mojaganina bhawu sumai apalai i kota, tee apetulatulaakamo bhari-bharia kaja-dia sumai, tee uka apetulatulaaka manga mia ipesuaikina seetani i saao.

³⁴ Sumaimo bhari-bharia miana kota alingka to apokawaaka Isa. Sapadhana apokawaakea, manga mia iwe sumai aemani mpuu mamudhaakana o Isa alingka tee abholi lipuna manga incia.

9

Mia Morempa Apauntoa o Kapiina

9:1-8

(Mrk. 2:1-12; Luk. 5:17-26)

¹ Isa akompa i nuncana bhangka kasiimpo apolimba i sawetana tawo ambuli i kampona karona.*

² Sakawana iwe sumai, dhaangia tee mia mobhawaakea mia morempa mopotidholena i bhawona kolemana. Wakutuuna akamata

† 8:32 8:32 *gulumana*: Sarombonga maanusia atawa o binata.

* 9:1 9:1 Kampo Kapernaum.

iimanina manga incia, apogaumo Isa tee mia morempa sumai, "Tawakalamo anaku! Dosamu ato'amponimo."

³ Sarangona incia sumai, dhaangia pia mia o ahalii Hukumu Taurati mopogauna i nuncana ngangarandana, "Mia incia sii ahina Aulata'ala."

⁴ Isa amataua opea ifikirina manga incia. Ram-paakanamo sumai Incia apogau, "Pokia fikirimiu amadhaki mboo itu i nuncana ngangarandamiu?"

⁵ Iapai momamudhana, kupogauaka, 'Dosamu ato'amponimo,' atawa kupogauaka, 'Bhangumo tee ulingkamo!?"

⁶ Mamudhaakana umataua i dunia sii Anana Maanusia akokuasa to a'amponi dosana mia," - kasiimpomo apogaumo Incia i mia morempa sumai, "Bhangu, aangkea kolemanu itu tee umbulimo i bhanuamu!"

⁷ Mia morempa sumai abhangumo kasiimpo ambuli i bhanuana.

⁸ Wakutuuna mia bhari akamata giu incia sumai, manga incia amaekamo kasiimpo apuji Aulata'ala modhawuakana kuasa momaoge mboo sumai to maanusia.

Matius Pande Enena Balasitee Aose Isa

9:9-13

(Mrk. 2:13-17; Luk. 5:27-32)

⁹ Wakutuuna alingka minaaka iwe sumai, Isa akamatamo samia saronu o Matius tangasaana auncura i pos to aene balasitee. Isa apogau tee incia, "Osemo Iaku!" Sabutuna o Matius akakaromo tee aosea.

¹⁰ Wakutuuna Isa tangasaana akande i bhanuana Matius, aumbamo bhari manga pande enena balasitee tee manga mia mokodosa akande apobhawa-bhawa tee Isa tee manga murina.

¹¹ Wakutuuna manga miana Farisi akamata giu incia sumai, manga incia apogaumo tee murina Isa, "Apokia o Gurumiu akande apobhawa-bhawa tee manga pande enena balasitee tee mia mokodosa?"

¹² Giu iabhaakana manga miana Farisi sumai arangoa Isa, kasiimpomo Incia apogau, "Mia momalapena namisina inda afaraluu dhotoro, maka o mia momapii mofaraluuna dhotoro.

¹³ Jadi, ulingkamo tee upengkaadhariakea o ma'anana firimani incia sii, 'Ipeeluku o kaasi, mencuana udhawuakaaku kurubani pasombaa,' roonamo umbaaku mencuana to kukemba manga mia mosaalihi, maka kuumba to kukemba manga mia mokodosa."

Kaadharina Tapoasa

9:14-17

(Mrk. 2:18-22; Luk. 5:33-39)

¹⁴ Kasiimpomo manga murina Nabii Yahya aumba apokawa tee Isa tee aabha, "Apokia ingkami tee manga miana Farisi sadia tapoasa, sainamo manga murimu inda apoasa?"

¹⁵ Lawanina Isa, "Amembali buaka o sabhangkana panganti umane asukara wakutuuna panganti umane sumai dhaangiapo apobhawa-bhawa tee manga incia? Tantumo inda! Maka bheakawa o wakutuuna panganti umane sumai

aalea minaaka i tanga-tangana manga incia. I wakutuumo incia sumai manga incia siimpo bheapoasa.

¹⁶ Inda dhaangia o mia motampolina bhaju momalusa tee atampoliakea sabhenci kae mobhaau, roonamo kae katampoli sumai bheabhenci bhaju sumai, sabutuna o kabhencina bheahanda amaoge.

¹⁷ Tee uka inda dhaangia o mia molalina uwena angguru mobhaau i nuncana kadhu kuli to angguru momangenge roonamo ande mboo itu, o uwena angguru mobhaauna bheapasaki kadhu kuli to angguru momangenge sumai, roonamo o uwena angguru mobhaau bheabhenci kadhu kuli sumai, sabutuna o uwena angguru sumai bheatobusaka tee o kadhu kuli sumai bheahan-curu. Jadi o uwena angguru mobhaau tabeana atodhika i nuncana kadhu kuli mobhaau uka, mamudhaakana o uwena angguru tee kadhu kuli sumai inda amadhaki."

Anana Kapalana Tampana Ibaadati

Bhawine Momapiina Abusakaaka Raa

9:18-26

(Mrk. 5:21-43; Luk. 8:40-56)

¹⁸ Tangasaana o Isa apogau tee murina Nabii Yahya, aumbamo samia kapalana tampana ibaadati, kasiimpo asuju i aroana Isa tee apogau, "Anaku bhawine siimpomo amate, maka uumbamo tee udhikaia limamu i bhawona anaku mamudhaakana incia bheadhadhi pendua."

¹⁹ Kasiimpo Isa akakaro tee aosemo kapalana tampana ibaadati sumai apobhawa-bhawa tee manga murina.

²⁰ I tangana dhala, dhaangia samia bhawine ikangkanaina kapii busakaaka raa kangengena sapulu rua tao. Bhawine sumai amaju apekaka-sumo i Isa minaaka i talikuna kasiimpomo ad-hingkumo tapana jubana,

²¹ roonamo incia apogau i nuncana ngangaran-dana, "Somanamo kudhingku tapana jubana, bheauntomo o kapiiku."

²² Kasiimpomo Isa abhalili tee akamata bhawine sumai tee apogau, "Pekatangkea o incamu anaku, iimanimu mopauntona kapiimu!" Waku-tuu incia sumai uka o bhawine sumai auntomo o kapiina.

²³ Wakutuuna o Isa akawa i bhanuana kapalana tampana ibaadati sumai tee akamata manga mia motowiina suli tee abhari o mia mosukara tangasaana atangi,

²⁴ apogaumo o Isa, "Limbamo bhari-bharikomi, roonamo o ana bhawine sii inda amate, maka incia soo akole." Maka bhari-bharia mia iwe sumai apotawaiki Isa.

²⁵ Sapadhana manga mia bhari sumai atumpua alimba, Isa apesuamo. Incia akeni limana ana bhawine sumai, kasiimpo incia abhangumo.

²⁶ Sabutuna atoresamo o lele incia sumai i saangua lipu.

Isa Apaunto Matana Rua Mia Momawilo
9:27-31

²⁷ Wakutuuna Isa alingka minaaka iwe sumai, dhaangia rua mia o mia momawilo moosea, apoose akakee-kee manga incia apogau, "E Anana Daud, manga maasiakapo!"

²⁸ Sapesuana o Isa i nuncana saangu bhanua, rua miaia o mia momawilo sumai aumbamo i aroana. Apogaumo o Isa, "Buaka ingkomiu uparacaea ande Iaku kumembali kupaunto kapi-imiu?" Alawanimu manga incia "Umbe Opu, ingkami taparacaea!"

²⁹ Kasiimpo Isa adhingkumo matana mia momawilo sumai poose apogau, "Amembalimo mboomo opea i nuncana iimanimiu."

³⁰ Sabutuna manga incia apokamatamo tee Isa asasimea mpuu, "Udhanua, bholi dhaangia o mia momatauna kajadia incia sii!"

³¹ Maka manga incia alingka apakoleleaka opea mopadhana ipewauna Isa i saangua lipu sumai.

Samia Mobheana Apauntoa o Kapiina
9:32-34

³² Salingkana mia momawilo sumai, dhaangia o mia mobhea roonamo ipesuaikina seetani abhawe i Isa.

³³ Sapadhana apadhencu seetani minaaka i mia mobhea sumai, mia sumai amembalimo apogau. Manga mia bhari amente, kasiimpo apogau, "Indapo tee takamata o giu mboo sii i Israel."

³⁴ Maka manga miana Farisi apogau, "Incia apadhencu seetani tee kuasana kapalana manga seetani."

Kaasina Isa to Mia Bhari
9:35-38

³⁵ Kasiimpo Isa alingka i bhari-bharia kota tee i desa-desa i lipu sumai tee aadhari i tampana ibaadati, apakawaaka Lele Malape Pamarintana Aulata'ala, tee apaunto sagala giuna panyaki tee apaunto kapiina bhari-bharia manga mia mobalacina badana.

³⁶ Wakutuuna Isa akamata manga mia bhari sumai, Incia amaasimo incana roonamo mia bhari sumai amatemo akalana tee inda dhaangia motulungia, mboomo dumba inda tee mogembal-aakea.

³⁷ Kasiimpo Isa apogau tee manga murina, "Hasilina timpua abhari, maka motimpuna said-hemea.

³⁸ Rampaakanamo sumai, emanimo i Opu Mokoinawuna sumai, mamudhaakana alamboko manga pande timpu to atimpuaka timpuana."

10

Isa Akemba Sapulu Rua Mia Rasulu

10:1-4

(Mrk. 3:13-19; Luk. 6:12-16)

¹ Saangu wakutuu o Isa akembamo sapulu rua miaia murina tee adhawuakea kuasa to manga incia mamudhaakana amembali apadhencu rohi madhaki tee apaunto sagala giuna panyaki tee manga mia mokakuranga.

² Siimo o saronu sapulu rua miaia manga rasulu sumai: Simon isarongiaka uka Petrus, tee witinaina mokosaroakana Andreas, kasiimpo

Yakub bin Zabdi tee witinaina mokosaroakana Yahya.

³ Filipus tee Bartolomeus, Tomas tee Matius moenena balasitee, Yakub bin Alfeus, tee Tadeus.*

⁴ Kasiimpo Simon mia moewaakana lipuna Israel,[†] tee Yudas Iskariot mia mohianatina Isa naile itu.

Isa Alamboko Sapulu Rua Mia Rasulu

10:5-15

(Mrk. 6:6b-13; Luk. 9:1-6)

⁵ Kasiimpo Isa alamboko sapulu rua mia murina sumai tee aposamea i manga incia, "Bholi ulingka i lipuna mia mencuana Yahudi tee uka bholi upesua i manga kotana miana Samaria.

⁶ Maka ulingkamo i manga dumba momambuu minaaka i uumatina Israel.

⁷ Lingkamo tee upakoleleakamea to manga incia, ande o 'Pamarintana Aulata'ala amakasumo.'

⁸ Pauntoa manga mia momapii, padhadhia manga mia momate, pekangkiloa manga mia mokopanyakina kuli dhaa, tee upadhencua manga seetani. Ingkomi utarima kuasa incia sii inda upomeaia, rampaakanamo sumai ingkomi tabeana ulingka tee upewau giu mopokana to manga mia mosagaanana tee bholi uemani ponambo.

* **10:3 10:3** Dhaangiapo uka manga kaburi momangengena apogau kooni, "Lebaeus isarongiakana Tadeus". † **10:4 10:4** Simon sii aose sarambonga ra'eatina Israel mo'usahaakana mamudhaakana lipuna Israel inda akuasaia pamarintana Roma. **10:7 10:7-15** Luk. 10:4-12.

⁹ Bholi ubhawa doi bulawa, doi pera atawa doi tambaga i nuncana kadhu-kadhuna kaman-damiu.

¹⁰ Bholi ubhawa tasina bhaku i nuncana lingkaamiu, bholi ubhawa rua pasa pakea, tee bholi ubhawa sandali atawa o katuko roon-amo mia mokarajaa alaenga apotibhaaka pon-ambona.

¹¹ Ande upesua i saangu kota atawa i kampo, peelomo mia moundana motarimakomiu, kasi-impō umbooremo iwe sumai sampe akawa eona to ulingka tee ubholi tanpa incia sumai.

¹² Wakutuuna upesua i nuncana bhanuana mia, uposalamu porikana i mokobhanuana.

¹³ Ande o miana bhanua sumai aunda atari-makomiu, sumaimo kabarakati minaaka i ingkomiu bheanamisia uka manga incia, maka ande amendeukomiu, sumaimo kabarakatimiu sumai bheambuli pendua i karomiu.

¹⁴ Ande dhaangia o mia momendeukomiu tee inda aperangoi pogaumiu, tantamakamea o ngawu minaaka i aemiu wakutuuna bheulingka minaaka i bhanua atawa minaaka i kota incia sumai.

¹⁵ Satotuuna, Iaku kupogau tee ingkomiu, i eona kiaamati o hisabu mosapona i bhawona kota Sodom tee Gomora[‡] bhealabhi o kagaa-gaana minaaka i hisabu bhemosapona i bhawona kota incia sumai."

10:10 10:10 1Kor. 9:14; 1Tim. 5:18. **10:14 10:14** Tul. 13:51.

10:15 10:15 Bhaa. 19:24-28; Mat. 11:24. [‡] **10:15 10:15** *Sodom tee Gomora*: siitumo rua kota mopewauna madhaki i zamani Nabii Ibrahim tee aahirina apahancurua tee waa masodhona mpuu minaaka i Aulata'ala. Kamatea Bhaa. 19:28.

Kanarakaa Bheinamisina Manga Murina

10:16-33

(Mrk. 13:9-13; Luk. 12:2-9; 21:12-19)

¹⁶ "Kamatea, Iaku kulambokokomiu mboomo dumba i tanga-tangana serigala, rampaakanamo sumai ingkomiu tabeana uko'akala mboomo ulo tee amakate o ngangarandamiu mboomo jara-jara.

¹⁷ Maka ukoengati, roonamo dhaangia manga mia bhemopasaraakaakana ingkomiu i manga majilisina agama Yahudi, tee ingkomiu bheutosikisaa i tampana ibaadatina manga incia.

¹⁸ Rampakaanamo Iaku, ingkomiu bheutob-hawa i aroana manga gubernuru tee manga raja to umembali sakusiiku i aroana manga incia tee i aroana manga lipu mosagaanana mencuana Yahudi.

¹⁹ Ande manga incia apasaraakakomiu, bholi umaeka tee opea bheipogauakamiu, roonamo i wakutuu incia sumai uka bheapaumbaakakomiu opea to ipogauakamiu.

²⁰ Roonamo mencuanamo ingkomiu bhemopogauna i wakutuu incia sumai, maka o Rohina Amamiu modhaangiana i nuncana karomiu mopogauna.

²¹ Mia bheapasaraakaaka witinaina karona to atopekamate, tee samia ama bheapasaraakaaka anana. Tee manga anana bheaewangi mancuanana tee bheapasaraakaakea mamudhaakana atopekamate.

²² Bhari-bharia mia bheabancikomiu rampaakanamo saroku, maka incema-

incema mopotaangina tee aoseaku sakawana kapadhaana kanarakaa incia sii, sumaimo incia bheasalaamati.

²³ Ande manga incia asikisaakomiu i saangu kota, palaimo i kota mosagaanana. Roonamo satotuuna kupaumbakomiu, indapo upadha umbeliki bhari-bharia kotana Israel, o Anana Maanusia aumbamo.

²⁴ Samia muri inda akolabhi tee guruna, tee samia bhatua inda akolabhi tee mokobhanuana.

²⁵ Amalapemo to samia muri ande amembali apokana tee guruna, atawa samia bhatua amembali apokana tee opuna. Jadi ande Iaku ibaratina opu mokobhanuana asarongiakea Baalzebul mokapalana manga seetani, ntaranamo uka tee ingkomiu manga mia i nuncana bhanuaku!

²⁶ Rampaakanamo sumai bholi umaeka i manga incia, roonamo opea itutubhi bheatobungkale, tee opea ibuniaka bheatomatau.

²⁷ Opea ipogauakaku tee ingkomiu i nuncana kalalanda, pakawaakea o hali incia sumai i nuncana kainawa, tee opea ipokamuntuiakaku i talingamiu, pakoleleakea i mia bhari minaaka i padhana bhanuamiu.

²⁸ Bholi umaeka tee manga incia momembalina mopekamatena bada, maka inda kapoia to apekamatea rohi. Salabhina umaeka i Incia mokuasaina tee mopabinasana rohi tee bada i nuncana narakaa.

10:24 10:24 Luk. 6:40; Yah. 13:16; 15:20. **10:25 10:25** Mat. 9:34; 12:24; Mrk. 3:22; Luk. 11:15. **10:26 10:26** Mrk. 4:22; Luk. 8:17.

²⁹ Bhari-bharia mia amataua o harahagaana rua mbaa ntomintomi amembali atoaso tee satibha doi momaidhiidhi! Maka moomini mboo sumai, inda sambaa uka minaaka i manu-manu sumai amembali akotibu i tana ande inda apeelua o Amamiu.

³⁰ Bhari-bharia bulua modhaangiana i bhaamiu uka atogagari.

³¹ Sababuna sumai bholi umaeka, roonamo ingkomiu alabhi ukoharagaa minaaka i ntomintomi abhari.

³² Incema-incema mo'akuiaku i aroana maanusia, Iaku uka bheku'akuia i aroana Amaku i sorogaa.

³³ Maka incema-incema inda mo'akuiaku i aroana maanusia, Iaku uka inda bheku'akuia i aroana Amaku i sorogaa."

Mencuana Kasanaa maka o Poewangia

10:34-42; 11:1

³⁴ "Bholi uabhia ande kuumba i dunia sii to kubhawa udhadhi upomalape. Iaku kuumba mencuana to kubhawa udhadhi upomalape, maka kubhawa ewanga.

³⁵ Roonamo kuumba to kupapogaa ana umane minaaka i amana, ana bhawine minaaka i inana, tee ana mania bhawine minaaka i ina maniana.

³⁶ Tee musuna samiana satotuuna manga mia i nuncana bhanuana karonu.

³⁷ Incema-incema alabhi amaasiaka amana tee inana minaaka i Iaku, atawa alabhi amaasiaka anana umane tee anana bhawine minaaka i Iaku, sumaimo incia inda alaenga to amembali muriku.

³⁸ Incema-incema momendeuna mosodhana kau salibna tee aose Iaku, sumaimo incia inda alaenga to apobhawa tee Iaku.

³⁹ Incema-incema mopotaangiakana inyawana, incia bheakailanga inyawana, maka incema-incema mokailangana inyawana rampaakanamo Iaku, incia bheapokawaaka dhadhi mobakaa.

⁴⁰ Incema-incema mopepagokomiu, incia apepago Iaku, tee incema-incema mopepagoaku, incia apepago Incia molambokoaku.

⁴¹ Incema-incema mopepagona samia nabii tee aabhia mboomo samia nabii, incia bheapotibhaaka fahala mboomo kaogena fahala ipotibhaakana samia nabii, tee incema-incema mopepagona mia mosaalihi roonamo kata'atina, incia bheapotibhaaka fahala mboomo kaogena fahala ipotibhaakana mia mosaalihi.

⁴² Tee incema-incema mopekadhawuakana uwe isumpuna moomini soo satonde uwe magari to mia momaidhiidhi sii roonamo incia moosena Iaku, sumaimo Iaku kupogau tee ingkomiu, sato-tuuna incia dhaanamo bheapotibhaakea o fahala."

11

¹ Sapadhana apakawaaka kasameana i sapulu rua mia murina, Isa alingkamo minaaka iwe sumai kasiimpo adhariaaka tee apakawaaka Lele Malape i manga kota mosagaanana.

*Isa tee Nabii Yahya Mopapebhahona Manga
Mia Motoba*

11:2-19

(Luk. 7:18-35)

² I nuncana katorongku, Nabii Yahya arangomo sagala giu ipewauna Al Masi. Kasiimpo incia atumpu manga murina

³ mamudhaakana aabha i Isa, "Ingkoomo bhe-moumbana sumai, atawa dhaangiapo uka taan-tagi mosagaanana?"

⁴ Lawanina Isa, "Mbulimo tee upaumbaakea i Nabii Yahya bhari-bharia giu mopadhana iran-gomiu tee ikamatamiu:

⁵ Mia mawilo amembali apokamata, mia morempa amembali alingka, mia mokopanyak-ina kuli dhaa ambuli aunto, mia mabhongo ambuli aporango, mia mate apadhadhia pendua, tee o Lele Malape minaaka i Aulata'ala apakole-leakea to manga mia misikini.

⁶ Amasanaa mpuu manga mia inda momende-una Iaku."

⁷ Salingkana manga murina Nabii Yahya sumai, apepuumo Isa apogau i manga mia bhari sumai kadhaangiana Nabii Yahya, "To opea ingkomiu ulingka i tana matuu? To ukamata sapale lumai itowiina ngalu? Tantumo inda!

⁸ Ingkomiu ulingka iwe sumako mamudhaakana bheukamata opea? To ukamata mia mopakena pakea mangada? Mia mopakena pakea mangada mboo sumai tabeana amboore i maligena raja.

⁹ Jadi ulingka iwe sumai to ukamata opea? To ukamata samia nabii? Iaku kupogau tee

ingkomiu, incia alabhi minaaka i samia nabii.

¹⁰ Roonamo incia padhamo atoburi i nuncana Kitabi Momangkilo, 'Kamatea, Iaku kutumpu tumpuaku aporikanaaka Ingkoo, incia mopasiapuakana dhalamu iaroamu.'

¹¹ Satotuuna kupogau tee ingkomiu, i dunia sii indapo mina dhaangia mia motalona kaogesana Nabii Yahya mopapebhahona manga mia motoba. Moomini mboo sumai, mia momaidhi-idhina mpuu i nuncana Pamarintana Aulata'ala, amaoge incia tee Nabii Yahya.

¹² Minaaka i wakutuu umbaana Nabii Yahya sampemo sii-sii, Pamarintana Aulata'ala apolibu-libuakamea tee mia molibu-libua sumai gauna bhearampasia, mamudhaakana akuasaia.

¹³ Sababuna bhari-bharia Nabii tee kitabi Hukumu Taurati apakawaaka firimanina Aulata'ala sampemo umbaana Nabii Yahya.

¹⁴ Tee ande ingkomiu utarimaia, Nabii Yahya sumai satotuuna o Nabii Ilyas* bhemoumbana naile itu.

¹⁵ Incema mokotalingana, siitumo morangona!

¹⁶ Tee opea kupapokanea manga mia i zamani sii-sii? Manga incia sii mboomo anaana mokatoro-torona i dhaoa tee akagora-gora i manga sabhangkana,

¹⁷ 'Ingkami tatowii suli to ingkomiu, maka inda umanari,

11:12 11:12-13 Luk. 16:16. **11:14 11:14** Mat. 17:10-13; Mrk. 9:11-13. * **11:14 11:14** *Nabii Ilyas*: I zamanina Isa, manga ra'eatina afikiri Nabii Ilyas bhemoumbana to apasiapuaka bhari-bharia to umbaana Al Masi.

ingkami talaguaka manga lagu momaasi, maka ingkomiu inda usukara.'

¹⁸ Nabii Yahya aumba, apoasa inda akande atawa asumpu tee manga mia apogau kooni, 'Incia apesuaikia seetani!'

¹⁹ Kasiimpo Anana Maanusia aumba, Incia akande tee asumpu tee apogaumo manga incia kooni, 'Incia samia momaso'ona tee mopandesumpuna, sabhangkana manga moenena bala-sitee tee mia mokodosana.' Moomini mboo sumai hikimati akobukutii atotuu alaloia pewauna.

Isa Atunda Pia Angu Kota

11:20-24

(Luk. 10:13-15)

²⁰ Kasiimpo apepuumo Isa audhaniaka manga kota momendeuna motoba, garaaka i manga kota sumai Incia apewau bhari mpuu muuzizati.

²¹ "Cilakamo ingkoo kota Khorazim! Cilakamo ingkoo kota Bait Saida! Roonamo ande i kota Tirus tee i kota Sidon amembali manga muuzizati amembali i tanga-tangamiu, amangengemo manga incia apake kaena kadhu goni tee adhika ngawuna tana i bhawona bhaana to tandana manga atoba.

²² Maka kupogau tee ingkomiu, o eona kiaamati manga mia minaaka i Kota Tirus tee Kota Sidon bheatarima hisabu momagaagaa minaaka i hisabu bheitarimamiu!

²³ Tee ingkoo kampo Kapernaum! Buaka ufikiri bheapapeneko sampe i laiana? Inda! Malaha tabeana abhanakako i narakaa, roonamo ane dhaangia manga muuzizati modhaangiana i tanga-tangamiu amembali uka i kota Sodom,

tantumo o kota incia sumai dhaangiapo sampe sii-sii.

²⁴ Roonamo itu kupogau tee ingkomiu, o eona kiaamati, hisabu to lipuna Sodom bheamembali amagaagaa minaaka i hisabu bheitarimamiu."

Isa Akemba Manga Mia Aumba i Karona Mamudhaakana Asalaamati

11:25-30

(Luk. 10:21-22)

²⁵ Wakutuu incia sumai Isa ado'amo kooni, "Uma, E Kawasana Opu mokuasaina laiana tee tana! Kuemani sukuru i Ingkoo roonamo bhari-bharia sumai Ingkoo urahasiakea minaaka i manga mia moko'akalana tee moko'ilimuuna maka Ingkoo ususuakea i manga mia maidhiidhi.

²⁶ Siitumo imalapeakana incamu Uma.

²⁷ Amaku padhamo apasaraakaaka bhari-bharia to Iaku, tee inda samia momatauna o Anana tangkanamo o Ama, tee inda samia momatauna Ama tangkanamo Anana tee manga incema Anana mai apeelu bheasusuaka.

²⁸ Maimo umba tee Iaku, ingkomiu momangulena tee mosodhana bhawa momatamona, mamudhaakana bhekudhawuakakomi kalalesa.

²⁹ Osea parintaku mboomo karambau atarima kancodhaa. Pengkaadhari minaaka i Iaku, roonamo Iaku sii kumalulu tee malape incaku, kasi-impomo ngangarandamiu bheamalalesamo.

³⁰ Roonamo kancodhaaku amasanaa, tee bhawaku amagaa-gaamo."

12

Manga Murina Isa Atobhe Gandum i Eona Saputuu

12:1-8

(Mrk. 2:23-28; Luk. 6:1-5)

¹ Saangu wakutuu i eona Saputuu*, Isa alalo i inawuna gandum tee manga murina apepuumo atobhe gandum sumai, kasiimpo manga akande roonamo amaara.

² Sakamatana incia sumai manga miana Farisi (saangu rombongana agama Yahudi) apogaumo i Isa kooni, "Kamatea! Manga murimu akara-jaamo o giuna iharamuaka i eona Saputuu.

³ Isa alawanimi kooni, "Indapo mina buaka ingkomiu ubaca opea ipewauna Raja Daud waku-tuu incia tee manga mia moosena incia amaara?

⁴ Incia apesua i Kema Momangkilona Aulata'ala kasiimpo akande roti ipasombaaka i Aulata'ala. Garaaka satotuuna manga incia inda amembali, tangkanamo manga imamu momembalina mokandena roti incia sumai.

⁵ Atawa indapo mina buaka ingkomiu ubaca i nuncana kitabi Hukumu Taurati ande eona Saputuu, manga imamu mokarajaana i Baitulla akarajaa giu iharamuaka, maka inda apasalea manga.

⁶ Kupogau tee ingkomiu mboo sii: Iwe sii dhaangia molabhina kaogena minaaka i Baitulla.

* **12:1 12:1** I nuncana kitabi hukumuna Taurati, Aulata'ala alarangia manga mia Israel akarajaa i eona Saputuu mamud-haakana manga amembali aponiunto tee asomba i Karona.

⁷ Ande totuu ingkomiu umataumea ma'anana firimani incia sii, 'Peeluaku satotuuna tapomaa-maasiaka tee mencuana kurubani,' tantumo ingkomiu inda bheuhukumu mia inda mosalana.

⁸ Roonamo Anana Maanusia akokuasa i eona Saputuu."

Isa Apaunto Manga Mia i Eona Saputuu

12:9-15a

(Mrk. 3:1-6; Luk. 6:6-11)

⁹ Sapadhana alingka minaaka iwe sumai, Isa apesuamo i tampana ibaadatina manga.

¹⁰ Iwe sumai dhaangia samia umane momatena saweta limana. Pia-pia mia apee-peelo kasalahana Isa tee aabhamo kooni, "Amembali upaunto mia ande eona Saputuu?"

¹¹ Maka Isa apogau i manga incia kooni, "Ande dhaangia samia minaaka i ingkomiu mokodumbana sambaa tee akotibu i nuncana bhalo i eona Saputuu, buaka inda ukeni tee uangkea to upalimbaia?

¹² Siitumo, amaali haragaana maanusia tee dumba! Roonamo itu, amembali tapewau kalape i mia ande eona Saputuu."

¹³ Kasiimpo Isa apogau tee mia momatena saweta limana kooni, "Pekakatea limamu!" Mia incia sumai apekakatemea, tee limana sumai auntomo mboomo limana sawetana.

¹⁴ Kasiimpo alimbamo manga miana Farisi sumai tee apepuumo amufakati to apekamate Isa.

15a Maka roonamo Isa amataua haejatina manga, kasiimpo adhencumo minaaka iwe sumai.

Isa Bhatuana Kawasana Opu

12:15b-21

15b Abhari mpuu mia moosena Isa tee bhari-bharia apauntomea.

16 Maka Isa asasia manga apetulatulaakea o incema karonā i manga mia mosagaanana.

17 Tee mboo sumai amembalimo opea ipogauakana Nabii Yesaya,

18 "Kamatea, siitumo bhatuaku ipiliku, tee kumaasiakea momalapena i ngangarandaku, Bhekudhikaia o Rohiku i bhawona, tee Incia mopakawaakana ka'adili i manga lipu.

19 Incia inda bheapogera atawa apekee, tee manga mia inda bhearangoa suarana i manga dhala.

20 Sapale lumai momalutena inda bheakatukia, tee o sumbu momareana inda bheapekamatea, sampe Incia amangantaloakea ka'adili sumai.

21 Bhari-bharia lipu bheadhikamo harapuna tee Incia."

Isa tee Baalzebul

12:22-37

(Mrk. 3:20-30; Luk. 6:43-45; 11:14-23; 12:10)

22 Kasiimpo abhawamea i Isa samia ipesuaikina seetani. Mia incia sumai amawilo tee abhea. Kasiimpo Isa apauntoakamea, sanampuu mobheana tee mawilona sumai apogaumo tee apokamatamo.

²³ Manga mia bhari sumai amentemo, kasiimpo apogaumo manga kooni, "Incia sii aipomo o Anana Daud?"

²⁴ Maka manga miana Farisi arango incia sumai apogaumo manga, "Mia incia sii apadhencu manga seetani tee kuasana Baalzebul, kapalana manga seetani."

²⁵ Maka Isa amataua fikirina manga incia kasiimpo apogau, "Bhari-bharia pamarintana ande apotatagali dhaanamo bheabinasa tee bhari-bharia lipu atawa mokobhanuana apotatagali inda apotaangi.

²⁶ Mboo sumai uka, ande seetani apadhencu seetani, incia bheapogaa-gaamo tee ambulimo bheaewangi karonu. Ande mboo sumai, tuaapa o pamarintana Ibilisi mokapalana seetani amembali apotaangiakea?

²⁷ Jadi, ande Iaku kupadhencu seetani tee kuasana Baalzebul, tee kuasana incema manga moosekomiu itu mopadhencuna seetani? Roonamo itu, manga moosekomiu bheapasala ingkomiu.

²⁸ Maka ande Iaku kupadhencu seetani tee kuasana Rohina Aulata'ala Momangkilona, ma'anana Pamarintana Aulata'ala aumbamo i tanga-tangamiu.

²⁹ Iaku iwe sii mboomo musuna Ibilisi moumbana to arampasi harataana. Tuaapa amembali mia apesua i nuncana bhanuana mia makaa to arampasi harataana sumai ande mia makaa sumai indapo porikana atobhoke? Sapadhana atobhoke, kasiimpomo incia amembali arampasi

harataana sumai.

³⁰ Incema-incema inda moposaanguna tee Iaku satotuuna abhali Iaku tee incema-incema inda mohambaaku wakutuuna kuwulu rombongan dumbaku, ma'anana incia apapogaa-gaaia!

³¹ Sumaimo mamudhaakana umataua ku-pogau tee ingkomiu, bhari-bharia dosa tee kahina ibhoasakana maanusia bheatoamponi! Maka ande incia ahina Rohina Aulata'ala, incia inda amembali ato'amponi.

³² Ande o mia apogauaka sala saangu bheae-wangiaka Anana Maanusia, amembali amponia. Maka ande incia aewangi Rohina Aulata'ala Mo-mangkilona tee pogauna, incia inda amembali ato'amponi, malape i zamani sii-sii tee zamani moubana.

³³ Ande ingkomiu udhambaaka puuna kau tee malape, puuna kau sumai bheakohasiliaka bhake malape, tee uka ande udhambaaka puuna kau tee madhaki, puuna kau sumai bheakohasiliaka bhake madhaki, roonamo puuna kau tamataua minaaka i bhakena.

³⁴ Ingkomiu siwuluna ulo, tuaapa bheupogauaka giu momalapena ande ingkomiu umadhaki? Opea ipogauakana muncu itu, siitumo molimbana minaaka i ngangarandamiu!

³⁵ Mia malape bheapogauaka o giu momalapena roonamo abukeaka kalape adhikaia i nuncana fikirina, tee uka mia madhaki apogauaka giu momadhakina roonamo incia abukeaka kadhaki adhikaia i nuncana fikirina.

12:30 12:30 Mrk. 9:40. **12:32 12:32** Luk. 12:10. **12:33 12:33**
Mat. 7:20; Luk. 6:44. **12:34 12:34** Mat. 3:7; 15:18; 23:33; Luk.
3:7; 6:45.

³⁶ Maka kupogau tee ingkomiu, i wakutu-una eona kiaamati bheaumba, bhari-bharia mia tabeana atanggoa opea ipogauakana manga inda mokogunana.

³⁷ Roonamo pogaumu ingkoo bheapabanarako, tee roonamo pogaumu sumai uka ingkoo bheahukumuko."

Katandaina Nabii Yunus

12:38-42

(Luk. 11:29-32)

³⁸ Kasiimpo pia-pia mia ahali Hukumu Taurati tee manga miana Farisi apogau kooni, "Uma guru, ingkami gauta takamatako upewau saangu tanda."

³⁹ Maka Isa alawani, "Amadhaki mpuu tee adhorohaka manga mia i zamani sii-sii! Ingkomiu uemani i Iaku to kupewau tanda giu inda momentela, maka inda bhekudhawuakakomiu tanda tabeana tandana Nabii Yunus.

⁴⁰ Mboomo Nabii Yunus modhaangiana i nuncana kompona ikane maoge kangengena talu eo talu malo, mboomo sumai uka tee Anana Maanusia bheadhaangia i nuncana kompona tana kangengena talu eo talu malo naile itu.

⁴¹ I eona kiaamati bheaumba ra'eatina Niniwe bheapabhangua apobhawa tee manga mia i zamani sii-sii tee ahukumua manga incia. Sababuna manga miana Niniwe sumai atobamo minaaka i dosa-dosana manga, sawakutuuna Nabii Yunus apakawaaka kasameana Kawasana Opu i manga incia, sainamo iwe sii dhaangia molabhina maoge minaaka i Nabii Yunus.

⁴² I eona kiaamati, bheaumba Ratu Sheba minaaka i saangu lipu i Salata itu bheapabhangua apobhawa tee manga mia i zamani sii-sii tee ahukumua uka. Sababuna Ratu minaaka i tapanu alamu sumai aporadhamii aumba to arango hikimatina Nabii Sulaiman, sainamo iwe sii dhaangia molabhina maoge minaaka i Nabii Sulaiman."

Mbuliana Rohi Madhaki

12:43-45

(Luk. 11:24-26)

⁴³ "Ande o rohi madhaki alimbamo minaaka i sala samia, rohi sumai bheapekalingka-lingka i tampa-tampa momatuu to apeelo poniuntoana, maka inda apokawaakea.

⁴⁴ Kasiimpo rohi madhaki apogau kooni, 'Iaku bhekumbuli i bhanua ibholiku.' Sapadhana incia ambuli i bhanua sumai, apotibhaakea akosomo, atosambure, tee areko ato'atoro.

⁴⁵ Sabutuna alingkamo tee abhawa pitu rohi mosagaanana molabhina kadhakina minaaka i incia tee manga apesua tee amboore i nuncana mia sumai. Aahirina, kadhaangiana mia incia sumai ambulimo madhaki mpuu minaaka i bhaa-bhaana, tee sumaimo uka bheamembali tee mia i zamani sii-sii."

Isa tee Inana tee Manga Witinaina Umame

12:46-50

(Mrk. 3:31-35; Luk. 8:19-21)

⁴⁶ Tangasaana Isa apogau tee manga mia bhari sumai, aumbamo inana tee manga witinaina umame. Manga incia akakaro i sambali tee aemani bheapogau tee Incia.

⁴⁷ Sala samia minaaka i mia bhari sumai apogaumo tee Isa kooni, "Kamatea, inamu tee manga witinaimu umane dhaangia i sambali. Manga incia gauna apogau tee Ingkoo."

⁴⁸ Kasiimpo Isa alawanimu, "Incema inaku? Incema witiwitinaiku?"

⁴⁹ Kasiimpo asusumo manga murina tee apogau, "Siimo inaku tee manga witinaiku."

⁵⁰ Mia mopewauna peeluana Amaku i sorogaa, inciamo witinaiku umane, witinaiku bhawine, tee inaku."

13

Ibaratina Samia Mohewina Wine

13:1-23

(Mrk. 4:1-20; Luk. 8:4-15)

¹ I eo incia sumai uka Isa abholi bhanua sumai kasiimpo alingka i saripina tawo tee akatoro-toro iwe sumai.

² Abhari mpuu o mia moporomu-romuna i saripina. Rampaakanamo sumai, Incia alingka auncura i nuncana bhangka, sainamo manga mia bhari sumai sadhaadhaa akabhale-bhale i saripina tawo.

³ Abhari o giu iadhariakana Isa to manga incia alaloi ibarati. Pogauna, "Rangoa! Dhaangia samia pande poinawu alingka to ahewi wine.

⁴ Wakutuuna wine sumai ahewia, sagaa aman-dawu i dhala. Kasiimpo aumba o manu-manu akandea sakawana atopadha.

⁵ Dhaangia uka momandawuna i tampa mokobhatu-bhatu inda mokotana. Sumaimo o

wine sumai amadhei atuwu roonamo saidhemea o tanana.

⁶ Maka wakutuuna akangkanaia kapanena eo, penembula sumai amalaumo tee amakengku roonamo inda akokulese.

⁷ Dhaangia uka o wine momandawuna i rumpu mokorui-rui atuwu, saanampuu o rumpu mokorui-rui sumai ajulu o kaogena kasiimpo aopi penembula sumai.

⁸ Maka dhaangia uka o wine momandawuna i tana mosuburu, kasiimpo atuwu tee akobhake: dhaangia mokohasiliakana bhake saatu kali lipa, dhaangia mokohasiliakana nama pulu kali lipa, tee dhaangia uka talu pulu kali lipa."

⁹ Sapadhana apetulatulaaka ibarati incia sumai, Isa apogaumo, "Incema-incema mokotalingana, perangoimea!"

¹⁰ Kasiimpo manga murina aumba aabha i Isa, "E Opu, apokia upake ibarati wakutuu uadhari manga incia?"

¹¹ Lawanina Isa, "To ingkomiu o rahumati sumai atodhawuaka mamudhaakana umataua o rahasiana Pamarintana Aulata'ala, sainamo to manga mia mosagaanana inda bheadhawuakea.

¹² Roonamo o mia mokopewauana, bhearangania pekabhari tee incia bheapotibhaaka ataralabhi-labhi. Maka o mia inda mokopewauana, opeapo modhaangiana i karona bheaalea uka.

¹³ Rampaakanamo sumai, manga incia kuadharia tee ibarati. Roonamo wakutuuna atonto, manga incia inda apokamata, tee

wakutuuna arangoa, manga incia inda amataua
tee ama'anaia.

¹⁴ Tee mboo sumai amondomo firimani
ipakawaakana alaloi Nabii Yesaya,
'Ingkomiu bheurangoa torosu,
maka inda uma'anaia;
ingkomiu bheukamatea torosu,
maka sadhaadhaa inda ufahamua.

¹⁵ Roonamo ngangarandana lipu incia sumai
amakundumo,
talingana manga incia amatamo aporango,
tee o matana manga incia apopiromo,
mamudhaakana o matana manga incia inda
apokamata,
tee o talingana manga incia bholi aporango,
tee o fikirina manga incia bholi ama'anaia
tee ngangarandana,
tee bholi ambuli i karoku
mamudhaakana Iaku bhekupauntoakea
manga incia.'

¹⁶ Maka amasanaamo matamiu roonamo
apokamatamo, tee o talingamiu aporangomo.

¹⁷ Sumaimo satotuuna Iaku kupogau tee in-
gkomiu, abhari o nabii tee manga mia mosaalihi
gauna akamata opea ikamatamiu, maka inda
akamatea tee gauna arango opea irangomiu
maka inda arangoa.

¹⁸ Rampaakanamo sumai, rangomea o
ma'anana ibaratina mia mohewina wine sumai.

¹⁹ Wine momandawuna i dhala ibaratina
manga mia morangona firimanina Pamarintana
Aulata'ala maka inda amataua o ma'anana. Maka

momadhakina aumbamo, Ibilisi mokapalana seetani, to arampasia o wine ihewi sumai i nuncana ngangarandana.

²⁰ Kasiimpo wine momandawuna i tampa mokobhatu-bhatu inda tee mokotana ibaratina o mia morangona firimani tee atarimaia akaunde-unde.

²¹ Maka o firimani incia sumai inda akokulese i nuncana ngangarandana, sumaimo inda am-atangka tee apotaangi sabantaramea. Kasiimpo wakutuuna akawa o kasukara tee kanarakaa rampaakanamo firimani sumai, incia alausaka abholi iimanina.

²² Kasiimpo o wine momandawuna i tanga-tangana rumpu mokorui-rui ibaratina o mia morangona firimani, maka o kameriakana tee parakarana dunia tee kagau-gauna karangkaea aopi firimani sumai sabutuna inda akobhake.

²³ Sainamo o wine momandawuna i tana mo-suburu ibaratina o mia morangona firimani sumai tee amataua o ma'anana, kasiimpo akobhake saatu kali lipa, nama pulu kali lipa, tee talu pulu kali lipa."

Ibaratina Rumpu Padha i Tanga-tangana Inawuna Gandum

13:24-30

²⁴ Dhaangia saangupo uka ibarati ipakawaakana Isa to manga incia, "Pamarintana Aulata'ala sumai amembali ato'ibaratiaka mboomo mia mohewina wine momalape i inawuna.

²⁵ Maka wakutuuna bhari-bharia mia tangasaana akole, aumbamo musuna to ahewi

rumpuna padha i tanga-tangana winena gandum sumai kasiimpo alingka.

²⁶ Wakutuuna gandum sumai atuwumo tee apepuumo akobhake, rumpuna padha sumai atokamata uka.

²⁷ Kasiimpomo aumbamo manga bhatuana mokoinawuna sumai tee aabha kooni, 'Opu, buaka o wine ihewimu i tanga-tangana inawumu sumai o wine malape? Minaaka iapai o rumpu padha sumai?'

²⁸ Alawanimio mia mokoinawuna sumai kooni, 'Siitu pewauna musuku.' Kasiimpo apogaumo manga bhatuana sumai i mia mokoinawuna kooni, 'Faraluu tahobutia rumpu padha sumai?'

²⁹ Maka alawanimio kooni, 'Bholi ara atohobuti uka tee laena gandumku ande uhobuti rumpu padha sumai!

³⁰ Taroakamea atuwu apobhawa sampe akawa wakutuuna timpua, dhaampo bhekupaumbaia manga mia motimpuna: Porikana urombusakea o rumpu padha sumai kasiimpo ubhokea to utunua, kasiimpomo urombusaka manga gandumku sumai, kasiimpo udhikaia i nuncana kampiriku."

Ibaratina Ompolena Langa tee Ragi

13:31-35

(Mrk. 4:30-34; Luk. 13:18-21)

³¹ Isa apakawaakamo saangu ibarati mosagaanana i manga mia bhari kooni, "Pamarintana Aulata'ala ibaratina mboo sii: Samia aala saompole langa kasiimpomo apombulaia inawuna.

³² Ompolena langa sumai satotuuna o wine momaidhiidhina mpuu maka ande atuwumo incia amembali penembula momaogena i tanga-tangana penembula tawana kau mosagaanana. Langa incia sii amembali puuna kasiimpo manu-manu akarajaa poteona i manga rahana."

³³ Isa apetulatulaaka saangu ibarati mosagaanana i manga incia kooni, "Pamarintana Aulata'ala ibaratina mboo sii: Samia bhawine aala ragi, kasiimpo ajaloa tee tariguna patapulu litere kabharina sampe ajulu apene bhari-bharia!"

³⁴ Bhari-bharia iadhariakana i manga mia bhari, Isa apake ibarati, moomini mboo sumai inda dhaangia saangu hali inda apakawaakea tee ibarati i manga incia,

³⁵ mamudhaakana amembalimo ipogauakana o nabiina,
"Iaku kupake ibarati ande kupogau;
bhekupakawaaka o giu ibuniaka wakutuuna kamembalina dunia sii."

Isa Apokawaakamo Ma'anana Ibaratina Rumpu Padha i Tanga-tangana Gandum

13:36-43

³⁶ Sapadhana incia sumai, Isa abholimo manga mia bhari sumai alingka apesua i nuncana bhanua. Kasiimpo aumbamo manga murina aabha kooni, "Manga paumbaaka tee ingkami ma'anana ibarati rumpu padha motuwuna i tanga-tangana gandum i saao."

³⁷ Isa alawanim kooni, "Mia mohewina wine malape sumai satotuuna Anana Maanusia.

³⁸ Inawu sumai satotuuna dunia sii, tee wine momalapena sumai satotuuna manga mia mope-suana i nuncana Pamarintana Aulata'ala. Manga rumpu sumai satotuuna manga mia moosena Ibilisi mokapalana seetani,

³⁹ tee musu mopombulana o rumpu sumai sato-tuuna Ibilisi. Wakutuuna timpua satotuuna eona kiaamati tee manga mia motimpuna satotuuna manga malaa'ekati.

⁴⁰ Sumaimo rumpuna padha atorombusaka porikana kasiimpo atunua i nuncana waa, mboo sumai uka eona kiaamati naile itu.

⁴¹ Anana Maanusia bheatumpu manga malaa'ekatina i tanga-tangana uumatina tee aromusakea bhari-bharia mia motondana mia sagaanana i dhala inda mototuuna mamudhaakana apewau dosa tee manga mia mopewauna kadhaki.

⁴² Manga incia bhari-bharia bheabhanakea i nuncana dhalika mokowaana; iwe sumai dhaangia motangina tee mopakiri-kirina ngincina naile itu.

⁴³ Wakutuu incia sumai, manga mia moba-narana bheakocaheamo mboomo matanaeo i nuncana pamarintana Amana manga. Incema mokotalingana, siitumo morangona!"

Ibaratina Harataa Motokuburu tee Muntia Mokoharagaa

13:44-46

⁴⁴ Pamarintana Aulata'ala ibaratina mboo sii: Dhaangia harataa motokoburuna i nuncana inawu. Kasiimpo apokawaakea sala samia tee apapesuaia pendua i nuncana tana. Kasiim-pomo rampaakana kaunde-undena, o mia sumai

alingka aasoa bhari-bharia pewauana kasiimpo aaliaka inawu sumai.

⁴⁵ Pamarintana Aulata'ala ibaratina mboo sii: Samia pande dhaga apeelo muntia momakesana.

⁴⁶ Wakutuuna apokawaaka saangu muntia mokoharagaana mpuu, lausakamo incia alingka aasoa bhari-bharia pewauana kasiimpo aaliaka saangu muntiana sumai.

Ibaratina Jala Maoge

13:47-52

⁴⁷ "Pamarintana Aulata'ala ibaratina mboo sii: Dhaangia jala ibhakesakana i tawo kasiimpomo manga apotibhaakamo sagala giuna ikane.

⁴⁸ Sabukena o jala sumai, asoromea i saripina tawo, kasiimpo auncuramo manga tee o ikanena sumai apapogaa-gaamea. Momalapena adhikaia i nuncana langka tee momadhakina abhanakea manga.

⁴⁹ Mboo sumai uka giuna ande eona kiaa-mati, manga malaa'ekati bhealingka apapogaaia manga mia momadhakina minaaka i manga mia mobanarana.

⁵⁰ Kasiimpo manga mia madhaki sumai abhanakea i nuncana dhalika mokowaa. Iwe sumai manga incia bheatangi tee bheapakiri-kiri ng-incina.

⁵¹ Isa aabha, "Buaka ingkomiu umatau uma'anai bhari-bharia giu incia sumai?"

Alawanimu manga incia, "Umbe, tamataua!"

⁵² Kasiimpo Isa apogau, "Rampaakanamo sumai, bhari-bharia ahaliina Hukumu Taurati apengkaadharia giuna Pamarintana Aulata'ala moko'ibaratina mboo sii: Samia mokobhanuana apalimba harataana, malape o harataana

mobhaau atawa o harataana momangenge minaaka i tampana."

Isa Inda Atotarima i Kampo Nazaret

13:53-58

(Mrk. 6:1-6; Luk. 4:16-30)

⁵³ Sapadhana Isa apetulatulaaka manga ibarati sumai, Incia alingkamo minaaka iwe sumai.

⁵⁴ Kasiimpo ambuli i kampona karona i Nazaret. Iwe sumai Incia alingka aadhari i tampana ibaadati, tee manga mia morangona Incia iwe sumai aposamentemo tee apogaumo, "Minaaka iapai o mia incia sii apotibhaaka hiki-mati tee kuasa to apewau manga muuzizati sii?

⁵⁵ Buaka Incia sii o anana pande tuka kau? Buaka Incia sii o anana Siti Mariam tee manga witinaina umane satotuuna Yakub, Yusuf,* Simeon, tee Yuda?

⁵⁶ Tee buaka manga witinaina bhawine am-boore iwe sii uka tee ingkita? Minaaka iapai Incia apotibhaakea bhari-bharia siitu?"

⁵⁷ Jadi manga amendeumea Isa. Kasiimpo Isa apogau i manga incia kooni, "Samia nabii atohoromati iapai-iapai, tabeana i kampona karona atawa i bhanuana karona."

⁵⁸ Jadi Isa inda apewau manga muuzizati bhari iwe sumai sababuna manga inda aparacaea.

* **13:55 13:55** Dhaangiapo uka manga kaburi momangenge apogau kooni, "Yahya" atawa "Yoses".

14

Nabii Yahya Mopapebhahona Manga Mia Motobana Atopekamate

14:1-12

(Mrk. 6:14-29; Luk. 9:7-9)

¹ Wakutuu incia sumai o Herodes Rajana lipu Galilea arangomo lelana Isa.

² Kasiimpo incia apogau tee manga bhatuana, "Mia incia sii satotuuna o Nabii Yahya mopapebhahona manga mia motoba. Incia modhadhina pendua minaaka i tanga-tangana manga mia mate. Rampaakanamo sumai, Incia akokuasa apadhaangia muuzizati tee giu inda momentela."

³ Roonamo Raja Herodes padhamo atumpu to arako Nabii Yahya, kasiimpo abhokea, tee apapesuaia i nuncana katorongku. Herodes apewau giu incia sumai roonamo masalana tee Herodiah, bhawinena Filipus, witinaina karona.

⁴ Sababuna Nabii Yahya padhamo audhaniaka Raja Herodes mboo sii, "Inda amembali ukawi tee Herodiah!"

⁵ Satotuuna Herodes gauna bheapekamate Yahya, maka incia amaeka i manga mia bhari, roonamo manga incia aabhi Yahya samia nabii.

⁶ Maka wakutuuna kariaana eona laahiri ana Raja Herodes, amenarimo anana Herodiah bhawine i tanga-tangana manga kakembana tee apekasanaamo mpuu incana Herodes.

⁷ Kasiimpo Raja Herodes asumpamo to adhawuakea opea iemanina anana bhawine.

⁸ Sapadhana awujua inana, o anana bhawine sumai apogaumo, "Dhawuakaaku o bhaana Nabii Yahya mopebhahona iwe sii i bhawona saangu tala."

⁹ Sarangona iemanina anana sumai, Raja Herodes ambulimo asoso mpuu incana. Maka roonamo incia atolaumo asumpa i aroana manga kakembana, incia aparintaakea mamudhaakana opea iemanina kabuabua sii adhawuakea.

¹⁰ Incia atumpu mia to alingka i katorongku mamudhaakana atumpo bhaana Nabii Yahya.

¹¹ Kasiimpo bhaana Yahya sumai aalea tee adhikaia i bhawona tala, adhawuakea i kabuabua sumai, kasiimpo kabuabua sumai abhawe aapambulia to inana.

¹² Sapadhana incia sumai, manga murina Nabii Yahya aumba aala maeatina tee akoburumea. Kasiimpo manga alingka to apaumbaaka hali incia sumai i Isa.

*Isa Adhawuaka Kinande i Lima Rewu Mia
14:13-21*

(Mrk. 6:30-44; Luk. 9:10-17; Yah. 6:1-13)

¹³ Sarangona lele incia sumai, Isa asawimo i bhangka samia-miana tee alingka minaaka iwe sumai to aumba i saangu tampa momalino. Maka sapadhana manga mia abhari arango giu incia sumai, manga incia abholimea manga kotana tee alingka akawa Isa alaloi dhala tana.

¹⁴ Wakutuuna Isa asapo minaaka i bhangka tee akamata manga mia mobharina mpuu iwe sumai, Incia amaasimo incana i manga incia. Kasiimpo Incia apaunto manga mia mapii i tanga-tangana manga incia.

¹⁵ Satobhelena eo manga murina aumba tee apogau kooni, "O eo bheasoomo tee tanpa incia sii amalino. Utumpua manga mia sii alingka mamudhaakana amembali aali kinande to karona i kampo-kampo."

¹⁶ Maka Isa alawanimi, "Inda faraluu manga incia molingkana. Ingkomiumo modhawuna manga incia kinande!"

¹⁷ Manga murina alawanimi, "Ingkami tangkanamo lima angu roti tee rua mbaa ikane."

¹⁸ Isa apogaumo, "Bhawe incia itu iwe sii."

¹⁹ Kasiimpo Incia atumpu mia bhari sumai auncura i bhawona rumpu tee aalamo lima angu roti tee rua mbaa ikane sumai, kasiimpo apotingara i laiana tee aemani sukuru i Aulata'ala. Sapadhana incia sumai, Incia aweta-wetamo roti lima anguna sumai tee limana. Kasiimpo Isa adhawuakea i manga murina to apapodhawudhawuakamea i manga mia bhari sumai.

²⁰ Manga incia akande sakawana amambosu. Sapadhana akande, manga incia arombusakamea labhina kinande sumai; dhaangia sapulu rua angu bhaki abuke.

²¹ Mokandena waktuu incia sumai kera-kera lima rewu mia umane, indapo atolentu tee bhawine tee anana.

Isa Adhala i Bhawona Uwe

14:22-33

(Mrk. 6:45-52; Yah. 6:16-21)

²² Sapadhana incia sumai, alausakamo Isa atumpu manga murina asawi i bhangka tee alingka porikana apolimba i sawetana tawo,

sainamo Incia atumpumo manga mia bhari sumai ambuli.

²³ Sapadhana atumpu mia bhari sumai ambuli, Isa apangaramo i bhawona gunu samia-miana to ado'a. Wakutuuna akawa malo, Isa dhaangiapo iwe sumai samia-miana.

²⁴ Sainamo bhangka isawikina manga murina Isa amaridhomo. Bhangka incia sumai arambirambitakamea ewo, roonamo ngalu inda sapoaro tee ropena bhangka.

²⁵ Wakutuuna raneeo, Isa aumba i manga incia adhala i bhawona uwe.

²⁶ Sanampuu manga murina akamata Isa adhala i bhawona uwe atokidhamo tee apekeemo kooni, "Kanjoli, kanjoli!," tee akakee-keemo roonamo amaeka.

²⁷ Maka Isa lausakamo alawani kooni, "Tanangipo! Siimo Iaku, bholi umaeka."

²⁸ Kasiimpo Petrus apogaumo, "Opu, ande to-tuu siitumo Ingkoo, tumpuaku bhekuumba i Ingkoo tee kudhala i bhawona uwe."

²⁹ Lawanimo Isa, "Umbamo!" Jadi Petrus asapo minaaka i bhangka alingka i bhawona uwe tee aumbatimo Isa.

³⁰ Maka wakutuuna Petrus akamata ngalu maoge i tawo sumai incia amaekamo tee apepu-umo atondu. "E Opu, pasalaamatiaku!"

³¹ Isa lausakamo apaulu limana tee akenimeaa tee apogau kooni, "E, ingkoo mokurana moparacaeaaku, pokia uraguakaku?"

³² Kasiimpo rua-rua miaia asawimo i nuncana bhangka, tee ngalu sumai auntomo.

³³ Manga mia i nuncana bhangka sumai asu-

jumo asomba i Isa kooni, "Satotuuna Ingkoo sii o Anana Aulata'ala."

Isa Apaunto Manga Mia Mapii i Kampo Genesaret

14:34-36

(Mrk. 6:53-56)

³⁴ Sakawana i sawetana tawo, manga incia apolandamo i kampo Genesaret.

³⁵ Wakutuu manga mia iwe sumai akamatea moumbana sumai o Isa, manga incia apakole-leakamea i saangua lipu, kasiimpo abhawamea i Incia bhari-bharia mia momapiina.

³⁶ Manga mia aemani i Isa mamudhaakana aundaakea adhingkua, moomini soo tapana jubana, tee bhari-bharia modhingkuna jubana ambulimo aunto kapiina.

15

Parintana Aulata'ala tee Manga Adatina Miana Israel

15:1-20

(Mrk. 7:1-23)

¹ Wakutuu incia sumai, aumbamo i Isa sarombonga miana Farisi tee manga ahalii Hukumu Taurati minaaka i Yerusalem tee aabha kooni,

² "Apokia manga mia mooseko apewau giu ipepaliaka i nuncana adatina manga opuata? Wakutuuna akande manga inda aporikana apewanu."

³ Alawanimu Isa kooni, "Pokia ingkomiu inda uose parintana Aulata'ala sababuna upeelu bheuose adati minaaka i manga opuamiu?"

⁴ Sababuna Aulata'ala aparintangiakea, 'Adatia amamu tee inamu,' tee uka, 'Incema-incema mopeonina amana atawa inana, incia bheato-hukumu mate.'

⁵ Maka ingkomiu uadhariaaka: incema-incema mopogauna i mancuanana, 'Opea satotuuna tabeana to kudhawuaka i amaku tee inaku, padhamo kupasombaaka to Aulata'ala.'

⁶ Tee mboo sumai, upogau i mia incia sii indamo faraluu ahoromatia amana tee inana. Jadi, rampaakanamo adati minaaka i manga opuamiu, ingkomiu inda u'akuia kakuasana firimanina Aulata'ala.

⁷ E manga mia munaafiki! Totuumo opea ipakawaakana Nabii Yesaya to ingkomiu,

⁸ 'Lipu incia sii apujiaku tangkanamo i bhiwina, garaaka i nuncana ngangarandana amaridho tee laku.

⁹ Asia-siamo manga asomba i laku, roonamo kaadharina manga minaaka i parintana maanusia.' "

¹⁰ Kasiimpo Isa akembamo manga mia bhari sumai tee apogau i manga incia, "Rangoa mamudhaakana upahamua:

¹¹ mencuana mopesuana i nuncana ngangana monaajisiakana mia, tabeana molimbana minaaka i ngangana, siitumo monaajisiakana mia."

¹² Kasiimpo manga murina Isa aumbamo apogau tee Incia kooni, "Umataua buaka manga miana Farisi amapiiakea incana arango pogaumu i saao?"

¹³ Isa alawanimu, "Bhari-bharia penembula inda ipombulana o Amaku i sorogaa bheato-hobuti tee kulesena.

¹⁴ Bholimo umaheruakea manga miana Farisi sumai. Manga incia siitu podhomo manga kapala momawilona. Ande mia mawilo atonda mia mawilo, rua-rua miaia bheakotibu i nuncana bhalo."

¹⁵ Apogaumo Petrus tee Incia kooni, "Tulungi tadhawu ingkami ma'anana minaaka ibarati incia siitu."

¹⁶ Lawanimo Isa, "Buaka ingkomu indapo uka umataua uma'anaia?

¹⁷ Inda umataua buaka mopesuana i nuncana nganga, kasiimpo asapo i kompo, kasiimpo atobhanaka i jamba?

¹⁸ Maka molimbana minaaka i nganga aminaaka i ngangaramu. Siitumo mopamembalina mia anaajisi.

¹⁹ Sababuna minaaka i ngangarama aumbatiko manga fikiri madhaki mboomo fikirina maanusa to apekamate mia, azina, apasunda, amanako, adhawuaka kasakusi mogau-gau, tee afitanaa mia.

²⁰ Manga giu incia sumai mopamembalina mia anaajisi, maka mencuana roonamo mia akande garaaka indapo apewanu."

Bhawine Miana Kanaan Moparacaeana Isa

15:21-28

(Mrk. 7:24-30)

²¹ Kasiimpo Isa alingka minaaka iwe sumai tee apekakasu i kota Tirus tee Sidon.

²² Kasiimpo aumbamo samia bhawine miana Kanaan tee agora kooni, "E Opu, Anana Daud, maasiakaaku! Anaku bhawine apesuaikia see-tani tee anarakaa mpuu."

²³ Maka o Isa inda alawani moomini sanganga. Kasiimpo manga murina akasuimo Isa tee aemani, "Tumpua bhawine sumai alingka, roon-amo incia aose talikuta apoose akakee-kee.

²⁴ Isa alawani, "Iaku alambokoaku tangkanamo to manga dumba mokailanga minaaka i lipuna Israel."

²⁵ Maka o bhawine sumai aumba tee asuju i aroana Isa tee apogau, "E Opu, tulungiaku."

²⁶ Isa alawani, "Inda amalape taala kinandena anana tee tatudhaaka to mantoa."

²⁷ Alawanimu bhawine sumai, "Totuumo Opu, maka manga mantoa uka akande bhilaa moman-dawuna minaaka i mejana opuna."

²⁸ Kasiimpo Isa apogau tee incia kooni, "Ina, amaoge mpuu iimanimu! Amembalimo mboo opea ipeelumu!" Wakutuu incia sumai uka, anana bhawine sumai auntomo kapiina.

Isa Apaunto Abhari Mpuu Mia Mapii

15:29-31

²⁹ Isa alingkamo minaaka iwe sumai tee akambeli-mbelimo i saripina tawo i Galilea. Kasiimpo Incia apangaramo i bhawona gunu tee auncura iwe sumai.

³⁰ Kasiimpo abhari mpuu mia moumbatia tee abhawa mia morempa, mia mawilo, mia makempa, mia mobhea, tee dhaangiapo uka abhari mia momapii mosagaanana. Kasiimpo

manga mia mapii sumai adhikaia i aena Isa, tee Incia apauntomea bhari-bharia.

³¹ Manga mia bhari iwe sumai amentemo mpuu wakutuu akamata mia mobhea apogaumo, mia makempa aunto mo kapiina, mia morempa alingkamo, tee mia mawilo apokamatamo. Kasiimpo manga incia apujimo Aulata'alana lipuna Israel.

Isa Adhawu Kinande i Pata Rewu Mia
15:32-39
(Mrk. 8:1-10)

³² Kasiimpo Isa agoraakamo manga murina tee apogau, "Iaku amaasi incaku tee manga mia bhari sii. Talu eomo manga incia apobhawa-bhawa tee Iaku, tee sii-sii manga incia inda tee kinandena. Iaku kumendeu kutumpu manga incia ambuli tee kaara, ancotala amalimpu i dhala."

³³ Kasiimpo manga murina aabhamo i Incia, "Tapai tapokawaaka kinande i tampana kalinoa sii to manga mia bhari mboo sii?"

³⁴ Isa aabha i manga incia, "Pia angu o roti modhaangiana i ingkomu?" Alawanimu manga incia, "Pitu angu roti tee pia mbaa ikane maidhiidhi."

³⁵ Kasiimpo Isa atumpumo manga mia bhari sumai auncura i bhawona tana.

³⁶ Kasiimpo Isa aala pitu angu roti tee ikanena, kasiimpo aemani sukuru i Aulata'ala. Sapadhana incia sumai aweta-wetamo roti tee ikane sumai tee limana, kasiimpo adhawuakea i manga murina tee manga incia apapodhawudhawuakamea i manga mia bhari sumai.

³⁷ Bhari-bharia manga incia sumai akande sakawana amambosu, kasiimpo manga aro-musakamea labhina kinande sumai. Bhari-bharia dhaangiapo pitu langka abuke.

³⁸ Kabharina mia mokandena wakutuu incia sumai dhaangia pata rewu umane indapo atolentu tee bhawine tee anaana.

³⁹ Kasiimpo sapadhana Isa atumpu manga mia bhari sumai ambuli, Incia akompamo i bhangka tee alingka i lipu Magadan.*

16

Manga Miana Farisi tee Miana Saduki Aemani Tanda Inda Momentela

16:1-4

(Mrk. 8:11-13)

¹ Kasiimpo manga miana Farisi tee miana Saduki (rua angu rombongana agama Yahudi) aumba tee gauna bheapasala Isa. Manga incia aemani mamudhaakana Isa apatokamataakea saangu tanda minaaka i sorogaa.

² Isa alawani, "Wakutuuna soonaeo, ingkomiu bheupogau, 'Naile bheamalape tee inda bheakowao, roonamo laiana amale'i.'

³ Tee wakutuuna saeona ingkomiu upogau, 'Eo sii bheakowao, roonamo laiana amale'i tee amaulu.' Bhanguna laiana umembali upaposalea maka o tanda-tandana zamani inda umataua.

⁴ Amadhaki mpuu tee adorohaka manga mia i zamani sii-sii! Ingkomiu uemani i Iaku to

* **15:39 15:39** Dhaangiapo uka manga kaburi momangenge apogau kooni, "i lipu Magdala." **16:1 16:1** Mat. 12:38; Luk. 11:16. **16:2 16:2-3** Luk. 12:54-56. **16:4 16:4** Mat. 12:39; Luk. 11:29.

kupewau tanda giu inda momentela maka inda bhekudhawuakakomiu tanda tabeana tandana Nabii Yunus." Sapadhana apogau mboo sumai, Isa alingka abholi manga incia.

So'ali Ragina Manga Miana Farisi tee Miana Saduki

16:5-12

(Mrk. 8:14-21)

⁵ Wakutuuna manga murina Isa apolimba i tawo, manga incia amalingu abhawa roti.

⁶ Isa apogaumo i manga incia, "Pengkaanaka tee ragina manga mia minaaka i rombongana Farisi tee Saduki."

⁷ Manga incia apepuumo apogau samia tee mosagaanana, "Incia apogau mboo sumai roon-amo ingkita inda tabhawa roti."

⁸ Isa amataua opea ipogauakana manga, sabutuna Incia apogaumo, "E ingkomiu manga mia mokurana paracaea, pokia ingkomiu upogauaka so'ali inda tee roti?"

⁹ Buaka ingkomiu uka indapo uma'anaia? Tu-aapa ingkomiu inda udhania tee roti lima angu iweta-wetaku to lima rewu mia? Pia bhaki labhina roti iromusakamiu?

¹⁰ Tee tuaapa uka pitu angu roti to pata rewu mia sumai? Pia langka labhina roti iromusakamiu?

¹¹ Tuaapa ingkomiu inda uma'anaia opea ipogauakaku tee ingkomiu mencuana to so'ali roti? Pengkaanaka tee ragina manga miana Farisi tee miana Saduki!"

¹² Aahirina manga murina Isa sumai ama'anamea pogauna Isa atumpu manga incia apengkaanaka mencuana to so'ali ragi ipake to akarajaaka roti, maka to kaadharina manga miana Farisi tee miana Saduki.

Kangakuna Petrus

16:13-20

(Mrk. 8:27-30; Luk. 9:18-21)

¹³ Sakawana i saripina lipu Kaisarea Filipi, Isa aabhamo i manga murina kooni, "Onina mia, incema buaka o Anana Maanusia sumai?"

¹⁴ Manga incia alawanimi kooni, "Dhaangia mopogauna 'Nabii Yahya' mopapebhahona manga mia motoba. Mosagaanana apogau 'Nabii Ilyas', tee mosagaanana uka apogau 'Nabii Yeremia atawa sala samia minaaka i manga nabii.' "

¹⁵ "Maka ande ingkomiu samia, Iaku sii incema?," aabha Isa i manga incia.

¹⁶ Simon Petrus alawanimi, "Ingkoo satotuna Al Masi* (Raja mopasalaamatina), Anana Aulata'ala modhadhina!"

¹⁷ Apogaumo Isa, "Masanaamo ingkoo, Simon o anana Yunus! Sababuna mencuana maanusia mopaumbaakako o giu incia sumai i karomu, tabeana Amaku i sorogaa.

16:14 16:14 Mat. 14:1-2; Mrk. 6:14-15; Luk. 9:7-8. * **16:16**
16:16 *Al Masi:* Ma'anana Al Masi i nuncana onina Ibrani, "Mia imina-minaiki bhaana sumai," roonamo i zamani mangenge adatina ra'eatina Israel musitii amina-minaiki bhaana mia momembalina raja bhaau sumai atawa samia nabii. Ra'eatina Israel amangengemo aantagi Al Masi.

¹⁸ Tee kupogau tee ingkoo, ingkoo satotuuna Petrus tee i bhawona bhatu pasi sii bhekupakaro uumatiku tee manga bhambana narakaa inda bheakuasaia.

¹⁹ I karomu bhekudhawuakako kakuasa mboomo kunci to Pamarintana Aulata'ala. Tee kunci sii, opea ibhokemu i dunia sii bheatobhoke i sorogaa tee opea ilapasimu i dunia sii bheatolapasi uka i sorogaa."

²⁰ Sapadhana incia sumai Isa audhaniakamo manga murina mamudhaakana inda apaumbaaka i manga incema kooni satotuuna Inciamo Al Masi.

*Kangakuna Bhaa-bhaana to Kanarakaana Isa
tee Manga Saratina Moosena Incia*

16:21-28

(Mrk. 8:31-37; 9:1; Luk. 9:22-27)

²¹ Sapadhana wakutuu incia sumai, Isa apepu-umo apaumbaakea satotuuna i manga murina tabeana karon a lingka i Yerusalem tee anamisi abhari mpuu kanarakaa minaaka i manga mancuana mia Yahudi, manga imamu maoge, tee manga ahalii Hukumu Taurati. Incia bheatopekamate, maka kamondona talu eo Incia bheabhangumo.

²² Kasiimpo Petrus ahelamo Isa i saripina tee apepuumo audhaniaka Incia kooni, "Sio-siomo Aulata'ala apekaridhoakako o giu incia sumai, Kawasana Opu! Giu incia sumai bholi akangkanai karomu!"

²³ Isa abhalili kasiimpo apogau i Petrus kooni, "Lingka minaaka iwe sii, Ibilisi mokapalana

seetani! Ingkoo ujoli-joliaku roonamo fikir-imu itu fikirina maanusia, mencuana fikirina Aulata'ala!"

²⁴ Kasiimpo Isa apogaumo i manga murina kooni, "Ande dhaangia o mia moundana mooseaku, tabeana apesapuaka peeluana karona samia, asodhaia kau salibna tee aose Iaku.

²⁵ Roonamo incema-incema gauna bheapasalaamatiaka inyawana karona, bheakailanga inyawana karona; maka incema mokailangana inyawana roonamo Iaku, incia bheapotibhaakea pendua.

²⁶ Opea labana ande sala samia apotibhaaka bhari-bharia dunia maka akailanga inyawana? Atawa sala samia amembali adhawuaka opea to kabholosina inyawana?

²⁷ Roonamo Anana Maanusia bheaumba i nuncana kamuliangina Amana apoose tee manga malaa'ekatina; tee wakutuu incia sumai Incia bheabhologi bhari-bharia mia mboomo fe'elina manga incia.

²⁸ Satotuuna Iaku kupogau tee ingkomiu, i tanga-tangamiu moumbana iwe sii dhaangia inda momatena ande indapo akamata Anana Maanusia moumbana mboomo Raja i nuncana pamarintana.

17

Isa Atomuliangi i Bhawona Gunu

17:1-13

(Mrk. 9:2-13; Luk. 9:28-36)

16:24 16:24 Mat. 10:38; Luk. 14:27. **16:25 16:25** Mat. 10:39; Luk. 17:33; Yah. 12:25. **16:27 16:27** Zab. 62:13; Mat. 25:31; Rom. 2:6.

¹ Nama eo kasiimpomo Isa abhawa Petrus, Yakub tee Yahya witinaina, apobhawa-bhawa tee manga incia apangara i saangu gunu moma-langa mamudhaakana agaati. Iwe sumai manga apogaa tee manga murina mosagaanana.

² Kasiimpomo Isa abhaliimo rouna i aroana matana manga; rouna akocahea mboomo matanaeo tee jubana amembalimo amaputi amangkilo mpuu.

³ Sanampuu apatiumbaakamo karonna manga Nabii Musa tee Nabii Ilyas tangasaana apogau tee Isa.

⁴ Kasiimpomo Petrus apogau tee Isa, "E Opu, malape ingkita iwe sii. Ande Ingkoo upeelu, iaku bhekupakaro talu angu kema iwe sii: saangu to Ingkoo, saangu to Nabii Musa, tee saangu to Nabii Ilyas."

⁵ Tangasaana Petrus dhaangiapo apogau, ta'ina ngalu momainawana asalibumbumo manga incia tee minaaka i ta'ina ngalu sumai arangomo suara apogau kooni, "Siimo o Anaku imaasi-akaku. Incia apekasanaa ngangarandaku. Perangoia Incia!"

⁶ Wakutuuna manga murina arango suara sumai manga incia amaekamo mpuu tee lausaka atopakumo i tana.

⁷ Maka Isa aumba tee adhingku manga incia kasiimpomo apogau, "Bhangumo, bholi umaeka!"

⁸ Wakutuuna apabhangua rouna, manga incia inda akamata incema-incema tabeana Isa.

⁹ Wakutuuna manga incia asapo minaaka i gunu sumai, Isa asameamo i manga incia, "Bholi upaumbaaka i manga incemapo uka opea ikamatamiu i saao, ande indapo Anana Maanusia abhangu minaaka i tanga-tangana mia mate."

¹⁰ Kasiimpo manga murina aabhamo tee Incia kooni, "Ande mboo itu, apokia manga ahali Hukumu Taurati apogau kooni, 'Nabii Ilyas tabeana moumbana porikana?'"

¹¹ Isa alawanim kooni, "Satotuuna, Nabii Ilyas aumba tee incia bheaposintuwuaka bhari-bharia."

¹² Iaku kupogau tee ingkomiu, Nabii Ilyas padhamo aumba, tangkanamo manga mia indamo atandaia. Sumaimo manga incia apewaua peepeeluana incana, mboo sumai uka tee Anana Maanusia bheanarakaa i limana manga incia."

¹³ Wakutuuna incia sumai manga murina ama'anaima opea ipogauakana Isa to Nabii Yahya mopapebhahona manga mia motoba.

Isa Apaunto Kapiina Samia Ana Umane Minaaka i Panyaki Mate Manu

17:14-21

(Mrk. 9:14-19; Luk. 9:37-43)

¹⁴ Wakutuuna Isa tee talu mia murina ambuli i manga mia bhari sumai, samia umane aumba asuju i aroana Isa tee apogau kooni,

¹⁵ "Opu, maasiakapea anaku sii. Incia amapii mate manu. Ande akawea kapii mate manuna, anarakaa mpuu kasiimpo incia menturu akotibu i nuncana waa tee menturu uka i nuncana uwe.

16 Iaku padhamo kubhawe a i manga murimu, maka manga incia inda amembali apauntoa."

17 Kasiimpo apogaumo Isa kooni, "E ingkomiu, manga mia inda moparacaeana tee mosaladhana, naepia kangengena bhekumboore i tangatangamiu? Tee naepia kangengena bhekusabara to ingkomiu? Bhawe anaana itu iwe sii!"

18 Kasiimpo Isa aparintangimo rohi madhaki i nuncana anaana sumai alimba tee rohi madhaki alimbamo lausaka aunto anana sumai i wakutuu incia sumai uka.

19 Kasiimpomo manga murina aumba i Isa wakutuuna manga agaati tee aabha kooni, "Pokia ingkami inda amembali tapadhencu rohi madhaki sumai?"

20 Isa alawanimi, "Sababuna ingkomiu manga mia mokurana paracaea. Udhania! Ande iimanimiu kaogena mboomo ompolena langa, ingkomiu amembali upogau tee gunu sii, 'Dhencu iwe Sumako!' Dhaanamo gunu sii bheadhencu. Inda dhaangia saangu uka inda momembalina to ingkomiu."

21 *Giu incia sii inda amembali atopadhencu tabeana tee do'a tee tapoasa.

Kapaumbaakana Rua Mpearo to Kanarakaana Isa

17:22-23

(Mrk. 9:30-32; Luk. 9:43-45)

17:20 17:20 Mat. 21:21; Mrk. 11:23; 1Kor. 13:2. * 17:21 17:21 Dhaangiapo uka manga kaburi momangenge tee aeati 21 mopogauna kooni, "Rohi madhaki giu incia sii inda amembali atopadhencu tabeana tado'a tee tapoasa."

22 Wakutuuna Isa tee manga murina apobhawa-bhawa i Galilea, Isa apogau tee manga incia kooni, "Anana Maanusia bheapasaraakaakea i limana maanusia

23 tee manga incia bheapekamatea, maka i eo talu eona Incia bheapabhangua." Sarangona incia sumai, manga murina amaasimo mpuu incana.

Isa Apomea Balasitee to Baitulla
17:24-27

24 Wakutuuna Isa tee manga murina aumba i kampo Kapernaum, aumbamo mia moenena balasiteena Baitulla i Petrus kasiimpo apogau, "Buaka gurumiu inda apomea balasitee mboo kaoge rua pera dirham sumai?†"

25 Lawanimo Petrus, "Incia apomea!" Wakutuuna Petrus apesua i bhanua, Isa aabha porikana, "E Simon, tuaapa fikirimu? Minaaka i incema manga raja dunia sii aemani balasitee? Minaaka i manga anana karonā atawa minaaka i mia mosagaanana?"

26 Lawanimo Petrus kooni, "Mia mosagaanana." Kasiimpo Isa apogau, "Ande mboo itu, manga anana inda faraluu apomea.

27 Maka mamudhaakana ingkita inda tapamembali manga incia asala ma'ana, lingkamo upekabua i tawo. Aalea ikane ipotibhaakamu bhaa-bhaana tee bungkalea ngangana. I nuncana bheupotibhaaka doi mboo

17:24 17:24 Limb. 30:13; 38:26. † 17:24 17:24 Rua pera dirham mboomo ponambona samia mokaarajaanā rua eo kangengena.

kaoge pata pera dirham. Aalea doi sumai tee upomeaka i manga incia to Iaku tee to ingkoo."

18

Incema Momaogena i Nuncana Pamarintana Aulata'ala

18:1-5

(Mrk. 9:33-37; Luk. 9:46-48)

¹ Wakutuu incia sumai, manga murina aumba i Isa tee aabha, "Incema momaogena i nuncana Pamarintana Aulata'ala?"

² Kasiimpo Isa akemba samia anaana maidhiidhi tee adhikaia i tanga-tangana manga incia.

³ Isa apogau, "Satotuuna kupogau tee ingkomiu, ande ingkomiu inda utoba tee umembali mboomo anaana maidhiidhi sii, ingkomiu inda membali upesua i nuncana Pamarintana Aulata'ala.

⁴ Sababuna sumai, incema-incema mopapori-tambena karona mboomo anaana maidhiidhi sii, sumaimo incia momaogena i nuncana Pamarintana Aulata'ala,

⁵ tee incema-incema motarimana o anaana mboo sii rampaakanamo saroku ma'anana incia motarimaaku."

Pengkaanaka tee Manga Giu Imembaliakana Tapewau Dosa

18:6-11

(Mrk. 9:42-48; Luk. 17:1-2)

⁶ Incema-incema mopasaladhalana anaana maidhiidhi moparacaeana tee Iaku sii to apewau dosa, salabhina o bhorokona aloeakea bhatuna

kagili kasiimpo tapatondua i nuncana tawo momandala.

⁷ Acilakamo o dunia sii tee sagala giu mopamembalina o mia akodosa! Totuumo o giu incia sumai sadia dhaangia, maka acilakamo mpuu o mia mopadhaangiaia!

⁸ Ande o lima atawa aemu imembaliakamu ukodosa, tumpoa tee ubhanakea. Roonamo salabhina udhadhi tee sambali limamu atawa sambali aemu, tee udhadhi tee ruambalia lima tee aemu maka utotudhaaka i nuncana waana narakaa inda bhemomatena.

⁹ Ande o matamu imembaliakamu upewau dosa, pintokia tee ubhanakea. Roonamo salabhina udhadhi tee sambali matamu tee udhadhi tee ruambalia matamu, maka utotudhaaka i nuncana waana narakaa.

¹⁰ "Udhanian, bholi uhina incemapo uka mi-naaka i manga anaana maidhiidhi sii. Roonamo laku kupogau tee ingkomiu, malaa'ekatina manga incia sadia atonto rouna Amaku i sorogaa."

¹¹ *Roonamo Anana Maanusia aumba to apasalaamati mia momambu.

Ibaratina Dumba Momambu

18:12-14

(Luk. 15:3-7)

¹² Pogauna Isa, "Tuaapa o fikirimiu? Ande dhaangia o mia mokodumbana saatu mbaa, kasiimpo dhaangia sambaa momambuuna, opea

18:8 18:8 Mat. 5:30. **18:9 18:9** Mat. 5:30. * **18:11 18:11** Dhaangiapo uka manga kaburi momangengena tee aeati 11 mopogauna kooni, "Roonamo Anana Maanusia aumba apasalaamatiaka mosaladhala."

bheipewauna mia incia sumai? Dhaanamo incia bheabholi dumba siopulu siombaana sumai i gunu, kasiimpo alingka apeelo dumbana momambuuna sumai.

¹³ Wakutuuna apotibhaakea pendua, incia alabhi aundeaka dumbana sambaana sii tee aundeaka dumbana siopulu siombaana inda momambuuna sumai.

¹⁴ Mboomo uka o Amamiu i sorogaa inda apeelua dhaangia samia uka minaaka i manga anaana maidhiidhi sii momambuu."

Poudhaudhaniaka tee Manga Witinai

18:15-20

¹⁵ "Ande o witinaimu apewau dosa i ingkoo, udhaniakea tee bholi arangoa mia, podhomo ingkomiu rua mia momataua. Ande aperangoia o pogaumu, sumaimo upotibhaakamea pendua o witinaimu sumai.

¹⁶ Maka ande inda aperangoiko, ukembamo samia atawa rua mia o mia to mosabhangkako, roonamo ande ubhawa samia atawa rua mia sakusii, giu incia sumai amembali asaha.

¹⁷ Ande incia amendeu atoudhaniaka, pakawaakamea o giu incia sumai i manga jama'a. Maka ande incia dhaangiapo uka amendeu aperangoi iudhaniakana jama'a, sumaimo abhimeaa incia mboomo mia inda momatauna Aulata'ala atawa samia pande enena balasitee.

¹⁸ Iaku kupogau tee ingkomiu, satotuuna opea ibhokemiu i dunia sii bheatobhoke uka i sorogaa tee opea ilapasimiu i dunia sii bheatolapasi uka i sorogaa.

¹⁹ Iaku kupogau uka tee ingkomiu, ande dhaangia rua mia o mia minaaka i tangatangamui i dunia sii apomufakati to aemani saangu hali, sumaimo opea iemanina sumai bheapakawaakea o Amaku i sorogaa.

²⁰ Sababuna iapai rua mia atawa talu mia aporomu roonamo Iaku, Iaku dhaangia i tangatanga manga."

Ibaratina to Ka'amponi

18:21-35

²¹ Kasiimpo Petrus aumba i Isa tee aabha, "E Opu, ande o witinaiku apewau dosa i iaku, sakawana pia mpearo kuamponi incia? Sampe pitu mpearo?"

²² Lawanina Isa, "Iaku kupogau tee ingkoo, mencuana tangkanamo soo pitu mpearo, maka sakawana pitu pulu pitu mpearo.

²³ Roonamo Pamarintana Aulata'ala sumai amembali ato'ibaratiaka mboomo samia raja bhemopolentuakana dhosana manga bhatuana.

²⁴ Wakutuuna apepuu apadhaangia polentuana sumai, dhaangia o bhatua motobhawana i aroana raja, mia incia sumai akodhosa sapulu rewu talenta†.

²⁵ Maka roonamo o bhatua sumai inda akapoia apomea dhosana, raja sumai aparintaakea mamudhaakana o bhatua sumai atoaso tee bhawinena tee manga anana, tee bhari-bharia pewauana to apomeaaka dhosana.

18:21 18:21-22 Luk. 17:3-4. † **18:24 18:24** Sapulu rewu talenta mboomo ponambona samia mokarajaana sapulu lima tao kangengena.

26 Kasiimpo asujumo bhatua sumai i aroana raja tee apogau, "Sabaraakaakupo opu, bhari-bharia dhosaku dhaanamo kupomeaia."

27 Akamata giu incia sumai o raja amaasimo incana i bhatuana sumai, sabutuna apabebasimea o bhatuana sumai minaaka i bhari-bharia dhosana.

28 Maka wakutuuna o bhatua sumai alimba, incia apokawa tee bhatua mosagaanana mokodhosana tee incia saatu tibha pera dinar.‡ Bhatua sii akeniakamo tee apisiki bhorokona sabhangkana kasiimpo apogau, 'Pomeaia o dhosamu!'

29 Sabutuna o sabhangkana sumai asujumo i aroana tee apogau, 'Sabaraakaakupo, bhari-bharia dhosaku dhaanamo kupomeaia!'

30 Maka o bhatua sumai amendeua, kasiimpo apasaraakaakea o sabhangkana sumai i nuncana katorongku sakawana apomeaia o dhosana.

31 Akamata giu incia sumai, manga bhatua mosagaanana amaasimo mpuu incana kasiimpo apakawaakea o kajadia incia sumai i raja.

32 Sarangona giu incia sumai, o raja akembamo bhatua mopadhana ipabebasina dhosana sumai tee apogau, 'E bhatua momadhaki, bhari-bharia dhosamu padhamo kuhapusua roonamo uemani mpuu i iaku.

33 Sumaimo ingkoo uka tabeana umaasiaka sabhangkamu sumai mboomo iaku kumaasiaka ingkoo!'

‡ 18:28 18:28 Dhoi saatu tibha pera dinar mboomo ponambona samia mokarajaana saatu eona kangengena.

³⁴ Opu sumai a'amaramo mpuu tee bhatua momadhakina sumai kasiimpo apasaraakaakea i manga mia pande sikisaa to asikisaaia sampe incia aepadhaia apomeaia bhari-bharia dhosana.

³⁵ Sumaimo o Amaku i sorogaa bheapewau mboo sumai uka tee ingkomiu samia-samia, ande inda u'amponi witinaimiu ampuu-mpuu i ngan-garandamiu."

19

Kaadharina Isa to Mia Bhempobholina tee Bhawinena

19:1-12

(Mrk. 10:1-12)

¹ Sapadhana apakawaaka bhari-bharia kaadharina sumai, Isa abholi Galilea kasiimpo alingka i Poropinsi Yudea i sawetana Umala Yordan.

² Abhari mpuu o mia moosea, tee Incia apaunto kapiina manga mia iwe sumai.

³ Kasiimpo aumbamo manga mia minaaka i rombongana Farisi gauna acobai Isa. Manga incia aabha, "Amembali buaka o mia abholi bhawinena tee sagala giu alasa?"

⁴ Lawanina Isa, "Buaka ingkomiu padhamo ubacea, 'Incia mopewauna maanusia minaaka i bhaa-bhaana apamembalia manga o umane tee bhawine?'

⁵ Tee afirimani, 'Siitumo sababuna, ana umane bheabholi amana tee inana tee aposaangu tee bhawinena, sabutuna rua-rua miaia aposaangu amembali asaangu.'

⁶ Tee mboo sumai manga incia mencu-
namo arua mia, maka amembalimo asaangu.
Rampaakanamo sumai, opea ipaposaanguna
Aulata'ala inda amembali apapogaaia maanu-
sia."

⁷ Pogauna manga incia tee Isa, "Ande mboo itu,
apokia o Nabii Musa aparintaaka to adhawuakea
sura kabhotu ande o mia bheapobholi tee bhaw-
inena?"

⁸ Lawanina Isa, "Roonamo kakaana incamiu o
Nabii Musa aundaakakomiu ubholi bhawinemiu,
maka bhaa-bhaana inda mboo sumai.

⁹ Sumaimo Iaku kupogau tee ingkomiu,
incema-incema mobholina bhawinena,
mencuana rampaakanamo zinaa, kasiimpo
akawi tee bhawine mosagaanana, sumaimo
incia apewau zinaa."

¹⁰ Pogauna manga murina, "Ande mboo sumai
o pokaiana umane tee bhawinena, salabhina
bholimo akawi."

¹¹ Maka o Isa alawani, "Inda bhari-bharia mia
amembali atarimaia o ma'anana pogau incia sii,
maka soo manga mia mopotibhaakana ma'ana
minaaka i Aulata'ala.

¹² Dhaangia o mia inda akawi roonamo mboo
sumaimo kadhaangiana minaaka i salaahirina,
dhaangia uka o mia inda akawi roonamo mi-
naaka ipewauna mia mosagaanana, tee dhaan-
gia uka o mia apewau karon a mboo sumai
soo kapeeluna karon mamudhaakana amem-
bali akarajaa to Pamarintana Aulata'ala. Incema-
incema momembalina atarima ma'anana, si-

itumo bheatarimaia kaadhari incia sii."

Isa Abarakati Manga Anaana

19:13-15

(Mrk. 10:13-16; Luk. 18:15-17)

¹³ Kasiimpo dhaangia manga mia mobhawana manga anaana maidhiidhi i aroana Isa, mamudhaakana adhikaia limana i bhawona tee ado'aaka manga incia, maka manga murina a'amaraiki manga mia incia sumai.

¹⁴ Maka Isa apogau, "Taroakamea manga anaana sumai, bholi ujoli-jolia aumba i Iaku, roonamo manga miamo mboo sumai bhemope-suana i nuncana Pamarintana Aulata'ala."

¹⁵ Kasiimpo Incia adhikamea limana i bhawona manga anaana sumai tee abarakatimea, tee alingka minaaka iwe sumai.

Mia Mangura Morangkaea

19:16-26

(Mrk. 10:17-27; Luk. 18:18-27)

¹⁶ Saangu wakutuu dhaangia samia umane moubhana i aroana Isa tee apogau, "Guru, faraluu kupewau malape tuaapa buaka mamudhaakana kupotibhaaka dhadhi sa'umurua?"

¹⁷ Lawanina Isa, "Apokia mbakana uabhakiakaaku opea manga giu momalape? Tangkanamo saangu o giu momalape. Maka ande gaumu upesua i nuncana dhadhi sa'umurua, ta'atia bhari-bharia parintana Aulata'ala."

¹⁸ Aabhamo mia sumai i Isa, "Manga parinta iapai?" Lawanina Isa, "Bholi upekamate, bholi

uzina, bholi umanako, bholi udhawuaka sakusii mokoparana.

¹⁹ U'adatia amamu tee inamu, tee umaasiakea musirahamu mboomo umaasiaka karomu."

²⁰ Pogauna mia mangura sumai, "Bhari-bharia sumai padhamo kuosea, opea uka mokurana?"

²¹ Pogauna Isa, "Ande ingkoo gaumu inda tee kasalahamu, ulingkamo tee uasoa bhari-bharia pewauamu kasiimpo ubage-bageakea o doina to manga mia misikini, tee mboo sumai ingkoo bheupotibhaaka harataa i sorogaa. Sapadhana incia sumai, maimo uose Iaku!"

²² Sapadhana arango pogauna Isa, mia mangura sumai alingkamo tee amaasi mpuu incana, roonamo abhari o harataana.

²³ Kasiimpo Isa apogau tee manga murina, "Satotuuna Iaku kupogau tee ingkomiu, mia morangkaea amarasai mpuu apesua i nuncana Pamarintana Aulata'ala.

²⁴ Sampearopo uka kupogau tee ingkomiu, amamudha sambaa unta apesua i bhalona sorumba tee mia morangkaea apesua i nuncana Pamarintana Aulata'ala."

²⁵ Arango giu incia sumai, manga murina aposamentemo mpuu, kasiimpo manga incia aabha, "Ande mboo itu, incema momembalina ipasalaamati?"

²⁶ Isa atonto manga incia tee apogau, "To maanusia o giu incia sii inda mungki, maka to Aulata'ala sagala giu amembali."

*Ponambona to Mia Moosena Isa**19:27-30**(Mrk. 10:28-31; Luk. 18:28-30)*

²⁷ Kasiimpo Petrus apogau tee Isa, "Ingkami tabholimea bhari-bharia o pewauamami tee taose Ingkoo e Opu, jadi opea bheipotibhaakamami?"

²⁸ Pogauna Isa, "Satotuuna Iaku kupogau tee ingkomiu, i dunia mobhaau, wakutuuna o Anana Maanusia bheauncura i kauncuramakana momulia, ingkomiu bheuuncuramiki sapulu rua angua kauncuramaka to u'adili sapulu rua angua lipuna Israel.

²⁹ Incema-incema mobholina bhanuana, witinaina umane, witinaina bhawine, amana, inana, manga anaana, atawa o inawuna rampaakanamo Iaku, incia bheatarimaia pendua saatu kali lipa tee bheapotibhaaka dhadhi sa'umuruu.

³⁰ Maka abhari o mia mobhaa-bhaana bheamembali mo'aahirina, tee mia mo'aahirina bheamembali mobhaa-bhaana."

20

*Ibaratina to Manga Mia Moalana Ponambo i Inawuna Angguru**20:1-16*

¹ "Pamarintana Aulata'ala ibaratina mboomo samia mokoinawuna angguru molingkana saeona mpuu to apeelo manga mokarajaana to inawuna angguruna.

19:28 19:28 Mat. 25:31; Luk. 22:30. **19:30 19:30** Mat. 20:16; Luk. 13:30.

² Sapadhana apomambotuaka ande o ponambona manga mia mokarajaana sumai satibha dinar saeo, atumpumea manga alingka i inawuna angguruna.

³ Kera-kera arambi sio mata saeona, incia alingka pendua i dhaoa tee akamata dhaangiapo uka manga mia mosagaanana akatoro-toro inda akarajaa.

⁴ Kasiimpo apogau tee manga mia incia sumai, 'Lingkamo i inawuna angguruku, dhaampo kudhawuakakomiu ponambo molaenga.' Sabutuna manga mia incia sumai alingkamo.

⁵ Kera-kera arambi sapulu rua mata pontanga eo tee arambi talu mata konowia, incia alingkamo uka tee apewau hali mopokana mboomo ipewauna i saao.

⁶ Kera-kera sakawana arambi lima mata konowia, incia alimbamo uka pendua tee akamata dhaangiapo uka manga mia mosagaanana mokatoro-torona. Kasiimpo aabhamo i manga mia incia sumai, 'Pokia ingkomiu saeoa ukatoro-toro iwe sii tee inda ukarajaa opeopea?'

⁷ Lawanina manga mia sumai, 'Roonamo inda dhaangia o mia manga mophonambona to takarajaa.' Kasiimpo apogaumo mokoinawuna sumai, 'Lingkamo i inawuna angguruku.'

⁸ Samagaribina, mokoinawuna angguru sumai apogaumo tee mandorona, 'Kembaia manga mokarajaana sumai tee upomeaia o ponambona, pepuu minaaka moubana mo'aahirina sampe moubana mobhaa-bhaana.'

⁹ Kasiimpo aumbamo mokarajaana pepuu

arambi lima mata konowia, tee samia-samia atarima ponambona, siitumo satibha dinar.

¹⁰ Kasiimpo aumbamo uka mokaarajaana minaaka saeona mpuu, manga incia afikiri bheatarima akolabhi, garaaka manga tangkanamo adhawuakea satibha dinar uka.

¹¹ Sapadhana atarima doi sumai, manga incia akamburu-mburumo tee mokoinawuna.

¹² Manga incia apogau, "Mia mopesuana mo'aahirina tangkanamo sajamu akarajaa, maka ingkoo upapokanea o ponambona tee ingkami momatamona karajaana tee saeoa tapotaangi tee kapanena eo.'

¹³ Mokoinawuna angguru sumai alawani i sala samia minaaka i manga incia, 'E sabhangka, mencuana iaku inda mo'adili i ingkoo. Roonamo kuabhia ingkita padhamo tapomambotu ande o ponambomu to ukarajaa saeo satibha dinar.

¹⁴ Sii-sii alamea o ponambomu tee ulingkamo. Padhamo kudhawuaka o ponambo apokana tee ponambomu i manga mia moumbana mo'aahirina roonamo kupeelu.

¹⁵ Buaka iaku inda amembali kupewau pepeeluaku tee manga pewauaku? Atawa ugigibulu roonamo kalapena incaku?'

¹⁶ Tee mboo sumai kamembalina manga mia mo'aahirina bheamembali mobhaa-bhaana tee mia mobhaa-bhaana bheamembali mo'aahirina."

*To Talu Mpearo o Isa Apogauaka Kanarakaana
20:17-19
(Mrk. 10:32-34; Luk. 18:31-34)*

¹⁷ Wakutuuna tangasaana apene i Yerusalem, Isa akemba sapulu rua mia murina tee apaporomu-romua agaati minaaka i manga mia moosea. Kasiimpo Isa apogau tee manga incia,

¹⁸ "Sii-sii tapene i Yerusalem tee Anana Maanusia bheatopasaraakaaka i manga imamu maoge tee i manga ahali Taurati kasiimpo Incia bheatohukumu mate.

¹⁹ Manga incia bheapasaraakaaka Anana Maanusia i limana mia mencuana Yahudi, mamudhaakana Incia aele-elea, asambia tee aloemea i kau salib, maka kamondona talu eo Incia bheapabhangua."

Iemanina Inana Yakub tee Yahya

Mencuana Apekaparinta maka Alaiani

20:20-28

(Mrk. 10:35-45)

²⁰ Kasiimpo aumbamo bhawinena Zabdi tee rua mia ana umanena i aroana Isa kasiimpo asuju tee aemani i Incia.

²¹ Pogauna Isa, "Opea iemanimiu?" Alawanimu o bhawinena Zabdi sumai, "Dhawuakea parinta mamudhaakana rua mia ana umaneku sii amembali auncura i nuncana pamarintamu naile itu, samiana auncura i weta kaanamu tee samiana uka auncura i weta kaaimu."

²² Isa alawani, "Ingkomiu inda umataua opea iemanimiu. Buaka ingkomiu ukapoia usumpu i tonde mokoantoakana kanarakaa bheisumpuku?" Lawanina manga incia, "Takapoia."

²³ Isa apogaumo i manga incia, "Totuumo o tonde to isumpuku sumai bheusumpua uka, maka parakara mouncurana i weta kaanaku tee i weta kaaiku, inda kukohaku pekadhawuaka. Kauncuramaka sumai bheatodhawuaka i manga mia mopadhana ipasiapuakana Amaku."

²⁴ Wakutuu sapulu mia murina mosagaanana arango incia sumai, manga incia a'amara i manga rua miaia witinaina umane sumai.

²⁵ Rampaakanamo sumai o Isa akembamo manga incia kasiimpo apogau, "Ingkomiu umataua manga mokuasaina minaaka i manga lipu inda momatauna Aulata'ala aparintangi ra'eatina manga tee lima ase, tee manga kaogesana akuasaia i bhawona manga incia.

²⁶ Maka ingkomiu inda membali mboo sumai sababuna o mia gauna bheamaoge i tanga-tangamiu, tabeana amembali bhatuamiu

²⁷ tee incema-incema gauna bheamembali mia momalangana kauncuramakana i tanga-tangamiu, incia tabeana amembali bhatuamiu.

²⁸ Apokana tee Anana Maanusia aumba mencuana to atolaiani, maka to alaiiani tee apasaraakaaka inyawana to apabebasi mia bhari."

Isa Apaunto Rua Mia Momawilona

20:29-34

(Mrk. 10:46-52; Luk. 18:35-43)

²⁹ Wakutuuna Isa tee manga murina alimba mi-naaka i kota Yerikho, mia abhari mpuu aporomurumu aosea.

³⁰ Iwe sumai dhaangia rua mia o mia mawilo mouncurana i saripina dhala. Sarangona lele ande o Isa bhealalo iwe sumai, agoramo manga incia, "E Opu, e Anana Daud, manga maasi-akapo!"

³¹ Abhari o mia mo'amaraikia mamudhaakana inda amarobho, maka soo ahanda kakaana agora, "E Opu, e Anana Daud, manga maasi-akapo!"

³² Kasiimpo Isa aunto tee akemba mia mawilo sumai. Isa apogau, "Opea ipeelumiu to kupewaua to ingkomiu?"

³³ Alawanimu manga incia, "E Opu, ingkami gaumami tapokamata."

³⁴ Isa amaasimo incana, kasiimpo adhingku matana manga mia mawilo sumai, wakutuu incia sumai uka manga incia amembalimo apokamata. Kasiimpo manga incia aose Isa.

21

*Isa Apujia Mia Bhari Samakasuna i Yerusalem
21:1-11*

(Mrk. 11:1-10; Luk. 19:28-38; Yah. 12:12-15)

¹ Wakutuuna amakasumo i Yerusalem, manga incia akawamo i Bait Fagi i Gunu Zaitun. Iwe sumai o Isa atumpumo rua mia murina alingka porikana.

² Isa asamea, "Lingka i kampo i aroamiu. Sakawamiu bheukamatamo sambaa keledai bhawine atobhoke tee sambaa anana. Bungkalea kabhokena manga kasiimpo bhawaaka laku.

³ Ande dhaangia o mia moabhakikomiu, paumbaia, 'Opu afaraluua,' sumaimo o mia incia sumai

bhealausaka atumpukomiu to ubhawa keledai sumai."

⁴ Giu incia sumai bheamembali mamudhaakana amondo o firimani mopadhana ipakawaakana alaloi nabiina,

⁵ "Paumbaakea i Puteri Sion:*

'Kamatea! Rajamu aumbatiko,

Incia amalulu o ngangarandana tee asawiki

sambaa keledai,

tee sambaa anana keledai momangura."

⁶ Kasiimpo alingkamo rua miaia murina sumai tee aose opea isameaakana Isa to manga incia.

⁷ Manga incia abhawe a o keledai sumai tee anana. Kasiimpo alempesiakea tee jubana o torukuna keledai sumai, kasiimpo Isa akompa i bhawona.

⁸ Abhari mpuu o mia iwe sumai mobhake-sakana jubana i dhala, tee dhaangia uka o mia mosagaanana motumpona manga rahana kau to kalempesi i dhala mamudhaakana ahoromati Isa.

⁹ Mia bhari modhalana i aroa tee i talikuna Isa akagora-gora,

"Bhari-bharia kapujia to Anana Daud!

Atobarakatimo Incia moumbana i nuncana saron a Kawasana Opu!

Pujimo Aulata'ala i Tampana Momalanga!"

¹⁰ Wakutuuna Isa apesua i kota Yerusalem, atobungkemo saangua kota sumai, tee manga mia aabha, "Incema buaka o mia incia sii?"

21:5 21:5 Zak. 9:9. * **21:5 21:5** *Puteri Sion:* Saron a to kota Yerusalem, roonamo atobhangu i Gunu Sion. **21:9 21:9** Zab. 118:26.

¹¹ Alawanimomo o mia bhari sumai, "Incia o Isa, nabii mominaakana i kampo Nazaret i Galilea."

Isa Apehangkilo Baitulla

21:12-17

(Mrk. 11:15-19; Luk. 19:45-48; Yah. 2:13-16)

¹² Kasiimpo Isa apesua i aroana Baitulla tee apadhencu bhari-bharia mia mopoali poasona i aroana Baitulla. Incia apabhancule mejana manga pande bhasina doi tee kurusiina manga pande asona manu-manu jarajara.

¹³ Kasiimpo apogau, "Padhamo atoburi, 'Bhanuaku bheatosarongi bhanuana do'a,' maka ingkomiu upamembalia tampana buniakana mia manako."

¹⁴ Kasiimpo manga mia mawilo tee mia morempa aumba i Isa i aroana Baitulla, tee Isa apaunto kapiina manga incia.

¹⁵ Maka manga imamu maoge tee manga ahali Taurati a'amara mpuu wakutuuna akamata manga muuzizati ipewauna Isa. Tee manga incia uka a'amara arango manga anaana akagora-gora apuji-puji saroni i aroana Baitulla, "Bhari-bharia kapujia to Anana Daud!"

¹⁶ Kasiimpo manga incia apogau tee Isa, "Uran-go o opea ipogauakana manga anaana sumai?" Lawanina Isa, "Umbe kurangoa! Buaka indapo ubacea i nuncana Kitabi Momanghilo, 'Minaaka i ngangana manga anaana sakawana i ngangana anaana dhaangiapo modudu Ingkoo padhamo upasiapuakea kapujia?' "

¹⁷ Sapadhana apogauaka giu incia sumai, Isa abholi manga incia, kasiimpo alimba minaaka i Yerusalem tee alingka i kampo Bait Ani to apomalo iwe sumai.

Isa Atunda Puuna Ara

21:18-22

(Mrk. 11:12-14,20-26)

¹⁸ Saeona mpuu wakutuuna Isa gauna bheambuli i Yerusalem, Incia anamisimo maara.

¹⁹ I saripina dhala Incia akamatamo puuna ara kasiimpo alingka iwe sumai, maka inda akamata opeopea i puuna kau sumai tangkanamo soo manga tawa. Apogaumo o Isa tee puuna kau sumai, "Ingkoo indamo bheukobhake sa'umuraa!" Wakutuu incia sumai uka, alausakamo amatuu o puuna kau sumai.

²⁰ Akamata giu incia sumai manga murina amentemo mpuu tee aabha, "Tuaapa amembali o puuna ara sii amatuu sakijamata?"

²¹ Lawanina Isa, "Satotuuna Iaku kupogau tee ingkomiu, ande ingkomiu uparacaea tee inda umeri, sumaimo ingkomiu inda soo umembali upewau opea mopadhana ipewauku tee puuna ara sii, maka moomini ingkomiu amembali upogau tee gunu sumai, 'Utoangkamo tee utotudhaakamo i nuncana tawo,' sumaimo o gunu sumai bheatotudhaaka i nuncana tawo.

²² Bhari-bharia giu iemanimiu i nuncana do'a bheupotibhaakea ande uparacaea."

*Kaabhaki to Kuasana Isa**21:23-27**(Mrk. 11:27-33; Luk. 20:1-8)*

²³ Kasiimpo Isa apesua i Baitulla, tee wakutu-una aadhari iwe sumai, manga imamu maoge tee manga mancuanana miana Yahudi aumbamo i Isa tee aabha, "Tee kuasa minaaka iapai Ingkoo upewau manga giu incia itu? Incema mod-hawuakako kuasa?"

²⁴ Lawanina Isa, "Iaku uka bhekuabha tee ingkomiu, ande ingkomiu ulawaniaku, sumaimo Iaku bhekupaumbaakakomiu tee kuasa minaaka i iapai kupewau manga giu incia sii.

²⁵ Minaaka i iapai o papebhahoana Nabii Yahya? Minaaka i sorogaa atawa minaaka i maanusia?" Kasiimpo apoabha-abhakimo podhohodho manga incia, "Ande tapogauaka 'giu incia sumai minaaka i sorogaa', Incia bheapogau, 'Ande mboo itu, apokia ingkomiu inda uparacaea tee Incia?"

²⁶ Maka ande tapogauaka 'giu incia sumai minaaka i maanusia,' ingkita tamaeka i manga mia bhari, roonamo manga bhari aabhia o Yahya sii samia nabii."

²⁷ Jadi manga incia alawani, "Ingkami inda tamataua." Kasiimpo Isa apogau tee manga incia, "Ande mboo itu Iaku uka inda kupaumbaakakomiu tee kuasa minaaka i iapai kupewau manga giu incia sii."

*Isa Apetulatulaaka Ibaratina Rua Mia Anaana**21:28-32*

²⁸ "Tuaapa o fikirimiu to hali incia sii? Dhaangia samia ama tee anana rua mia o umane. Incia

alingka i anana tumpe tee apogau, 'E anaku, lingkamo tee ukarajaamo i inawuna angguruta eo sii.'

²⁹ Lawanina ana tumpena sumai, 'Kumendeu,' maka sapadhana sumai, incia asosomo tee al-
ingkamo i inawu sumai.

³⁰ Kasiimpo o ama sumai alingkamo uka i ana kaepuna tee apaumbaia mboo sumai uka. Alawanimi ana kaepuna sumai, 'Umbe uma,' maka incia inda alingka.

³¹ Jadi minaaka i rua mia ana sumai incema moosena pogauna amana?" Alawanimi manga incia, "O tumpe." Pogauna Isa, "Satotuuna Iaku kupogau tee ingkomiu, manga pande enena balasitee tee manga bhawine pasunda bheapor-
ikanaakakomiu apesua i nuncana Pamarintana Aulata'ala.

³² Roonamo wakutuuna Nabii Yahya aumba tee asusuakakomiu dhala mobanara, ingkomiu inda uparacaeaia. Sainamo manga pande enena balasitee tee bhawine pasunda aparacaeaia. Maka moomini padhamo ukamatea bhari-bharia sumai, ingkomiu sadhaadhaa inda bheubhaliia o fikirimiu tee uparacaeaia."

Isa Apetulatulaaka Ibaratina Manga Mia Mekarajaana i Inawuna Angguru

21:33-46

(Mrk. 12:1-12; Luk. 20:9-19)

³³ "Rangoa uka tee ibarati saanguna incia sii. Dhaangia samia o mia mokoinawuna angguru tee atumpu manga bhatuana to apatipuakea

tondo, tee aseliakea kabhalongko to tampana apio angguruna, tee uka apakaroakea munara jagaa. Kasiimpo inawu sumai apasewaakea i pande poinawu, sapadhana sumai mokoinawuna sii abhose i lipu mosagaanana.

³⁴ Wakutuuna amakasumo bulaana timpua, mokoinawuna sii alambokomo bhatuana to apokawa tee manga pande poinawu mosewana inawuna sumai to atarimaaka dhawuna minaaka i hasilina timpua.

³⁵ Maka manga pande poinawu sumai arako manga bhatuana mokoinawuna sii. Dhaangia motobhebhena, dhaangia motopekamatenana, dhaangia uka mototudhaakana tee bhatu.

³⁶ Kasiimpo mokoinawuna sii alamboko uka pendua o bhatuana mosagaanana, molabhina kabharina minaaka ilambokona mobhaa-bhaana. Maka manga bhatuana sumai apotibhaaka uka hali mopokana mboomo inamisina manga bhatua ilamboko bhaa-bhaana.

³⁷ Sabutuna mokoinawuna sii alambokomo o anana karona, roonamo afikiria, 'Aipomo o anaku bheahoromatia.'

³⁸ Maka wakutuuna manga pande poinawu sumai akamata anana mokoinawuna sii, apogaumo podho-podho manga incia, 'Siimo mokotinaurakaakea. Maimo tapekamatea mamudhaakana taala tinaurakana!'

³⁹ Sabutuna manga incia arako anana mokoinawuna sii, kasiimpo abhanakea i sambalina inawuna angguru sumai, tee apekamatea."

⁴⁰ Wakutuuna mokoinawuna sii aumba, opea bheipewauna tee manga pande poinawu sumai?"

⁴¹ Alawanimō manga mia modhaangiana iwe sumai, "Incia bheapabinasea manga mia madhaki sumai kasiimpo inawuna apasewaakea i mia mosagaanana mopasaraakaakana dhawuna wakutuuna akawa bulaana timpua."

⁴² Kasiimpo Isa apogau, "Buaka ingkomiu indapo ubaca opea motoburina i nuncana Kitabi Momangkilo,

'Bhatu ibhanakana manga tukana bhanua,
amembalimo bhatu parapuu mobhaa-
bhaana.

Giu incia sumai minaaka i Kawasana Opu,
saangu pewauna inda momentela i matata.

⁴³ Rampaakanamo sumai, Iaku kupogau tee ingkomiu, Pamarintana Aulata'ala bheatoala minaaka i ingkomiu tee bheadhawuakea i saangu lipu bhemohasiliakana bhake.

⁴⁴ † [Incema-incema momandawuna i bhawona bhatu incia sumai bheahancuru, tee incema-incema itaburina bhatu incia sumai bheama-puro.]"

⁴⁵ Wakutuuna manga imamu maoge tee manga mia minaaka i rombongana Farisi arango manga ibaratina sumai, manga incia amataua Isa apogauakea.

⁴⁶ Kasiimpo manga incia apeelo dhala to arako Isa, maka manga incia amaeka i mia bhari, roonamo mia bhari sumai aparacaea ande o Isa samia nabii.

21:42 21:42 Zab. 118:22-23. † **21:44 21:44** Dhaangiapo uka manga kaburina momangengena inda dhaangia tee aeati incia sii.

22

Isa Apetulatulaaka Ibaratina Kariaana Kawia
22:1-14
(Luk. 14:15-24)

¹ Kasiimpo apendua uka o Isa apogau tee apake ibarati.

² "Pamarintana Aulata'ala sumai mboomo ibaratina samia raja mopadhaangiana kariaana kawia to anana umane.

³ Incia atumpu manga bhatuana to alingka akemba manga mia mopadhana ikembana i kariaa sumai, maka manga mia sumai amendeu aumba.

⁴ Kasiimpo raja atumpu uka bhatuana mosagaanana tee aposamea, 'Paumbaia manga kakemba sumai, 'Kinandena kariaa asiapumo, sapi tee manga anana sapi momalapena padhamo atosumbele. Bhari-bharia asiapumo, jadi uumbamo i kariaa sumai!'

⁵ Maka manga kakemba sumai inda afaduli-akea. Dhaangia molingkana i inawuna, dhaangia mo'urusuna usahana.

⁶ Tee dhaangia uka morakona manga bhatuana raja sumai, kasiimpo asikisaaia tee apekamatea.

⁷ Sabutuna a'amaramo mpuu o raja sumai, tee atumpumo manga tantarana mamudhaakana apabinasa manga mia mopekamatena bhatuana sumai tee atunu kotana manga incia.

⁸ Sapadhana sumai, apogaumo raja i bhatuana, 'Kinandena kariaa asiapumo, maka manga mia mopadhana ikemba inda alaenga to atokemba.

9 Rampaakanamo sumai, lingkamo i simpangana dhala tee ukemba malingu mia ipokawaakamiu iwe sumai to aumba i kariaa sii.'

10 Kasiimpo manga bhatua sumai alingka i dhala oge to aromusaka malingu mia ipokawaakana iwe sumai, dhaangia o mia madhaki tee dhaangia uka o mia malape. Sabutuna abukeakamo kakemba o tampana kariaa kawia sumai.

11 Wakutuuna raja apesua to apokawaaka manga kakemba sumai, incia akamatamo samia o mia inda mopakena bhaju molaengana to moubana i kariaa.

12 Apogaumo o raja tee mia incia sumai, 'E witinai, pokia ingkoo upesua iwe sii tee inda upake bhajuna kariaa?' Maka o mia incia sumai soo atongo tee inda abhoasaka opeopea uka.

13 Sabutuna o raja sumai apogaumo tee manga bhatuana, 'Bhokea o limana tee aena mia incia sii kasiimpo utudhaakea i tampa momalalanda mpuu, i tampa incia sumai dhaangia tee tangi tee mopakiri-kirina ngincina.' "

14 Kasiimpo Isa a'aahiri ibarati sumai tee apogau, "Abhari o mia ikemba, maka saidhemea motopilina."

So'alina Pomeaana Balasitee i Kaisar

22:15-22

(Mrk. 12:13-17; Luk. 20:20-26)

15 Kasiimpo alingkamo manga mia minaaka i rombongana Farisi tee apomufakatiaka tuaapa o carana manga incia mamudhaakana amembali apetambo Isa tee opea ipogauakana.

¹⁶ Manga incia atumpu murina Farisi apobhawa-bhawa tee manga mia moalaakana Raja Herodes to aabhaki Isa, "E Guru, ingkami tamataua ande Ingkoo o mia mojujuru, tee uadhariaka kaadharina Aulata'ala tee kajujuru, tee inda umaeka i incemapo uka, roonamo Ingkoo inda upaposala-sala mia.

¹⁷ Rampaakanamo sumai, manga paumbaakapo tee ingkami tuaapa o fikirimu. Buaka amembali tapomea balasitee i Kaisar Roma atawa inda?"

¹⁸ Maka o Isa amataua o kadhakina ngangaran-dana manga incia. Kasiimpo Isa apogau, "E manga mia munaafiki, apokia gaumiu upetamboaku?"

¹⁹ Susuakaaku o doi to upomeaaka balasitee sumai." Manga incia abhawa satibha doi pera to Isa.

²⁰ Kasiimpo o Isa aabha i manga incia, "Gambara tee sarona incema sii?"

²¹ Alawanimpo manga incia, "Gambarana Kaisar tee sarona Kaisar." Kasiimpo o Isa apogau, "Dhawuakea to Kaisar opea momembalina pewauana Kaisar, tee udhawuakea i Aulata'ala opea momembalina pewauana Aulata'ala."

²² Wakutuuna arango kalawanina Isa sumai, amentemo manga incia, sabutuna alingka tee abholi Isa.

Kaabhakina Manga Mia minaaka i Rombongana Saduki to So'alina Mobhanguna minaaka i Mate

22:23-33

(Mrk. 12:18-27; Luk. 20:27-40)

²³ Eo incia sumai uka, dhaangia moumbana i Isa o mia mominaakana i rombongana Saduki mokofikirina ande o mia mobhanguna minaaka i mate sumai inda dhaangia. Manga incia aabha i Isa,

²⁴ "Guru, Musa manga paumba ande samia umane amate inda tee anana, witinaina tabeana akawi tee iaiarona sumai tee adhawuakea siwuluna to almarhum.

²⁵ I piamo itu dhaangia pitu mia tapowitinai umane i tanga-tangana ingkami. Witinaina o tumpe amate sapadhana akawi maka inda tee siwuluna. Roonamo incia inda tee siwuluna, jadi iaiarona almarhum sumai akawiakamo witinaina almarhum.

²⁶ Witinaina amatemo uka maka inda tee siwuluna. Giu incia sumai amembali uka tee lima mia witinaina mosagaanana, sampe witinaina umane pitu miana sumai aposamate.

²⁷ Kasiimpo bhawine sumai amate uka.

²⁸ Incema buaka i tanga-tangana pitu miana umane witinai sumai momembalina umanena bhawine siitu ande eona pabhanguana? Roonamo manga incia bhari-bharia padhamo amembali umanena."

²⁹ Isa alawanimea kooni, "Ingkomiu ukalerumo mpuu, sababuna ingkomiu inda uma'anaia Kitabi Momangkilo atawa kuasana Aulata'ala.

³⁰ Roonamo wakutuuna bheapabhangua, manga mia inda bheakawi tee inda atopakawi maka bheadhadhi mboomo malaa'ekati i sorogaa.

³¹ Indapo mina buaka ingkomiu ubaca

opea ipogauakana Aulata'ala to mia mate ipabhanguna pendua? Aulata'ala apogau,

³² 'Iakumo Kawasana Opuna Ibrahim, Ishak, tee Yakub.' Incia mencuana Aulata'ala isombana manga mia mate, maka o mia modhadhi."

³³ Wakutuuna mia bhari arango giu incia sumai manga incia amentemo tee opea iadhariakana.

Hukumu Mobhaa-bhaana

22:34-40

(Mrk. 12:28-34; Luk. 10:25-28)

³⁴ Wakutuuna manga mia minaaka i rombon-gana Farisi arango Isa inda apako'uu manga mia minaaka i rombongana Saduki, manga incia aporomusakamo.

³⁵ Kasiimpo sala samia minaaka i manga incia, siitumo ahalii Hukumu Taurati aabhamo tee acobai Isa,

³⁶ "Guru, parinta iapai mobhaa-bhaana i nuncana Hukumu Taurati?"

³⁷ Alawanimu Isa, "Umaasiakea o Kawasana Opu Aulata'alamu, tee mpuu-mpuuna incamu tee saangua dhadhimu tee bhari-bharia akalana budimu."

³⁸ Siitumo parintana bhaa-bhaana tee o giu momatamona mpuu.

³⁹ Parinta rua anguna apokana tee bhaa-bhaana sumai, 'Umaasiakea o musirahamu mboomo umaasiaka karomu.'

⁴⁰ Parinta rua angunamo sii moposaanguna tee mopotaangiakana bhari-bharia kaadharina Kitabi Taurati tee uka bhari-bharia kasameana Aulata'ala mopadhana motoburi minaaka i manga nabii."

*Pokaina Isa tee Raja Daud**22:41-46**(Mrk. 12:35-37; Luk. 20:41-44)*

⁴¹ Tangasaana manga mia minaaka i rombon-gana Farisi dhaangia aporomu-romu iwe sumai, Isa aabhamo i manga incia,

⁴² "Opea fikirimiu to Raja Mopasalaamatina, Al Masi? Siwuluna incema Incia?" Lawanimo manga, "Siwuluna Raja Daud."

⁴³ Apogaumo Isa, "Ande mboo itu, apokia o Raja Daud tee kuasana Rohina Aulata'ala Momangkilo asarongi Al Masi o 'Opu' wakutuuna apogau,

⁴⁴ 'Kawasana Opu apogaumo tee Opuku:

Uncuramo i weta kaanaku, sakawana manga musumu kudhikaia i tambena aemu.'

⁴⁵ Jadi ande o Raja Daud asarongi Al Masi 'Opu,' tuaapa amembali Incia o siwuluna Raja Daud?"

⁴⁶ Inda dhaangia samia momembalina mo-lawanina Isa. Tee aepuu eo incia sumai, indamo dhaangia mobaranina moabhaakana opeopea uka tee Incia.

23

*Kaudhaniakana Isa Mamudhaakana
Tapengkaanaka tee Manga Ahalii Hukumu
Taurati tee Manga Mia minaaka i Rombongana
Farisi*

*23:1-36**(Mrk. 12:38-40; Luk. 11:37-54; 20:45-47)*

¹ Kasiimpo Isa apogaumo i manga mia bhari tee manga murina,

² "Manga ahalii Hukumu Taurati tee manga mia minaaka i rombongana Farisi apotibhaakamo kuasa to ama'anaiaka tee aadhariaka hukumuna Nabii Musa.

³ Sababuna sumai, ta'atia tee osea bhari-bharia giu kaadharina manga incia. Maka bholi uose pe-wauna roonamo inda apewau opea iadhariakana manga incia.

⁴ Manga incia abhoke bhawa momatamo, kasiimpo apasodhaakea i awaana manga mia, sainamo karonu samia amendeu asodha.

⁵ Bhari-bharia ipewauna manga incia tangkanamo to pokamatana mia. Manga incia aporadhamii apake talina ibaadati momaewa tee apekaarateu manga jubana!*

⁶ Manga incia peeluana auncura i tampa momalape i tampana kariaa atawa i nuncana tampana ibaadati.

⁷ Wakutuuna alalo i dhaoa, manga incia apeelua ahomatia manga mia tee agoraakea 'Guru.'

⁸ Maka ingkomiu, bholi uunda agoraakako 'Guru' sababuna Gurumu tangkanamo saangu tee ingkomiu bhari-bharia upowitinai.

⁹ Tee bholi dhaangia isarongimiu o 'Ama' i dunia sii roonamo Amamiu tangkanamo samia, siitumo Amamiu i sorogaa.

¹⁰ Tee bholi uka uunda agoraakako 'Guru,' roonamo Gurumu tangkanamo samia, siitumo

* **23:5 23:5** Manga incia apake talina ibaadati tee juba maarate mpuu to katandaina ata'ati i Aulata'ala. Tali ibaadati sumai akoantoaka manga aeati minaaka i Kitabi Momangkilona, tee tali ibaadati sumai abhokea i bhawona rouna tee i limana manga.

Raja Mopasalaamatina ijanjiakana Aulata'ala o Al Masi.

¹¹ Incema-incema momaogena i tanga-tangamiu, tabeana amembali mia potumpuamiu.

¹² Incema-incema moangkatakana karona, bheapaporitambea tee incema-incema mopaporitambena karona bheaangkatakea.

¹³ Cilakamo ingkomiu, manga ahalii Hukumu Taurati tee manga mia minaaka i rombon-gana Farisi! E manga mia munaafiki! Roonamo ingkomiu ujoli-joli mia mopesuana i nuncana Pamarintana Aulata'ala. Saanginamo karomiu samia umendeu upesua i nuncana Pamarintana Aulata'ala tee ingkomiu ujoli-joli mia mosagaanana moundana mopesua.

¹⁴ []†

¹⁵ Cilakamo ingkomiu manga ahalii Hukumu Taurati tee manga mia minaaka i rombongan Farisi! E manga mia munaafiki! Roonamo ingkomiu ulingka upekaridho upolimba i tawo tee umbeliki manga lipu tangkanamo to upamembaliaka mia apesua i nuncana agamamiu. Tee sapesuana mia incia sumai i nuncana agamamiu, ingkomiu upamembalia mia bhemombooresina narakaa rua mpearo katamona kahukumuna minaaka i karomiu!

† **23:14 23:14** Dhaangiapo uka manga kaburi momangenge tee aeati 14 mopogauna kooni, "Cilakamo ingkomiu, manga ahalii Hukumu Taurati tee manga miana Farisi! E ingkomiu momunaafikina! Roonamo ingkomiu utipu manga iaiaro bhawine tee urampasi bhanuana tee udo'a pekaaratea mamudhaakana ututubhiaka kadhakimiu itu. Sumaimo sababuna hisabumiu naile itu ahandamo katamona!"

¹⁶ Cilakamo ingkomiu manga mia mawilo motondana mia mosagaanana tee mopogauna mboo sii, 'Incema-incema mosumpna to Baitulla, sumaimo incia inda atobhoke tee sumpna sumai. Maka incema-incema mosumpna to bulawa i nuncana Baitulla, sumaimo incia atobhoke tee sumpna sumai.'

¹⁷ E ingkomiu manga mia mokabhongo-bhongo tee momawilo! Iapai ipisimaogemiu, bulawa atawa o Baitulla mopekangkilona bulawa sumai?

¹⁸ Ingkomiu uka upogau, 'Incema-incema mosumpna to tampna tunuana kurubani, sumaimo incia inda atobhoke tee sumpna sumai; maka incema-incema mosumpna to kurubani i bhawona, sumaimo incia atobhoke tee sumpna sumai.'

¹⁹ E ingkomiu manga mia momawilo! Iapai ipisimaogemiu, kurubani atawa o tampna tunuana kurubani mopekangkilona kurubani sumai?

²⁰ Rampaakanamo sumai, manga mia mosumpna to tampna tunuana kurubani, ma'anana aposumpa uka to tampna tunuana kurubani sumai tee sagala giu modhaangiana i bhawona.

²¹ Incema-incema mosumpna to Baitulla, ma'anana incia aposumpa to Baitulla tee Aulata'ala momboorena iwe sumako.

²² Tee incema-incema mosumpna to sorogaa, ma'anana incia aposumpa to kauncuramakana Aulata'ala, tee to Incia mouncuramikina kauncuramaka sumai.

²³ Cilakamo ingkomiu manga ahali Hukumu Taurati tee manga mia minaaka i rombongana

Farisi! E manga mia munaafiki! Ingkomiu udhawu sapersapulu rampa-rampa selasi tee junta uka i Kawasana Opu, maka o giu ilabhiaka i nuncana Hukumu Taurati, mboomo giuna ka'adili, kaasina inca, tee kata'ati, ingkomiu inda uma-heruakea. Garaaka siitumo satotuuna tabeana ipewaumiu, tee mosagaanana uka bholi upailaia.

²⁴ E ingkomiu manga mia mawilo motondana mia mosagaanana! Ngkonunu i nuncana uwe isumpumiu utirisangia, maka o unta udhokua!

²⁵ Cilakamo ingkomiu manga ahali Hukumu Taurati tee manga mia minaaka i rombongan Farisi! E manga mia munaafiki! Manga mangko tee pirimiu ubhanuia pekangkilo i sambalina, sainamo i nuncana abukeaka giu marambu mpuu tee sagala giu irampasi tee kaso'o.

²⁶ E manga mia minaaka i rombongan Farisi momawilo, pekangkiloa porikana i nuncana manga mangko tee pirimiu itu sumaimo i sambali uka bheamangkilo.

²⁷ Cilakamo ingkomiu manga ahali Hukumu Taurati tee manga mia minaaka i rombongan Farisi! E manga mia munaafiki! Ingkomiu mboomo manga koburu motokamalona maputi. I sambali kamataana amangada, maka i nuncana abukeaka manga buku tee bhari-bharia posam-abhongko.

²⁸ Mboo sumai uka ingkomiu! I aroana mia, ingkomiu utokamata mboomo mia mota'atina agama maka i nuncana ngangarandamiu abukeaka kamunaafiki tee kadhaki.

²⁹ Cilakamo ingkomiu manga ahali Hukumu Taurati tee manga mia minaaka i rombongan

Farisi! E manga mia munaafiki! Ingkomiu upakaro koburuna manga nabii tee upekangada maiasana manga mia mosaalihi.

³⁰ Tee upogau, 'Ande ingkami tadhadhi i zamanina opuopuamami i piamo itu, tantumo ingkami inda taose manga incia to apekamate manga nabii sumai.'

³¹ Tee mboo sumai ingkomiu umangaku ande ingkomiu o siwuluna manga mia mopekamatena manga nabii!

³² Jadi, upamondomea opea ipewauna manga opu-opuamiu sumai!

³³ E ingkomiu manga mia mokofe'elina mboomo ulo, tee ingkomiu siwuluna ulo mokobisa! Tuaapa amembali urambasaka karomiu minaaka i hisabuna narakaa?

³⁴ Jadi udhania! Bhekulambokoakakomiu manga nabii, manga mia mo'aarifu tee manga ahalii Hukumu Taurati. Maka sagaa minaaka i manga incia bheupekamate tee uloea i kau salib, mosagaanana bheusambia i tampana ibaadatimiu tee bheupajere-jerea minaaka i saangu lipu sakawana i lipu mosagaanana.

³⁵ Sababuna sumai, bheahisabukomiu roonamo ingkomiu upekamate bhari-bharia mia inda mosala -- upepuu pekamate Habil inda mosala, sakawana upekamate Zakharria o anana Berekhya, ipekamatemiu i tanga-tangana Bait-ulla tee tampana tunuana kurubani.

³⁶ Satotuuna kupogau tee ingkomiu, bhari-bharia sumai bheatanggoa manga mia i zamani sii-sii!"

*Isa Amaasi Incana tee Yerusalem**23:37-39**(Luk. 14:34-35)*

³⁷ "Yerusalem, Yerusalem! Manga nabii upekamatea tee manga mia ilambokona Aulata'ala utudhaakea bhatu sakawana amate. Pia-pia mpearomo Iaku gauku bhekuromusaka manga anamu mboomo inana manu moromusakana anana i nuncana panina, maka ingkomiu umendeu!

³⁸ Rampaakanamo sumai o Baitullamiu bheatobholi tee amembali amalino.

³⁹ Iaku kupogau tee ingkomiu, pepuu sii-sii indamo bheukamataaku sakawana saangu waku-tuu ingkomiu bheupogau, 'Atobarakatimo Incia moubana i nuncana saroni Kawasana Opu.' "

24*HOTUBAA TO AAHIRINA ZAMANI**PASALA 24-25**Baitulla Bheatopahancuru**24:1-2**(Mrk. 13:1-2; Luk. 21:5-6)*

¹ Kasiimpo Isa alimba minaaka i Baitulla tee alingka minaaka iwe sumai. Tangasaana Isa alingka, manga murina aumbamo tee asusuakea manga bangunana Baitulla.

² Apogaumo Isa i manga incia, "Ukamatea bhari-bharia sumai? Satotuuna Iaku kupogau tee ingkomiu, inda dhaangia moomini saangu bhatu uka bheatosuncu i bhawona bhatu mosagaanana; bhari-bharia bheatopahancuru."

*Bhaa-bhaana Kanarakaa**24:3-14**(Mrk. 13:3-13; Luk. 21:7-19)*

³ Wakutuuna Isa akatoro-toro samia-miana i bhawona Gunu Zaitun, aumbamo manga murina to apogau tee Incia, "Manga paumbaaka tee ingkami, naepia o kajadia incia sumai bheamembali tee opea o tanda-tandana umbaamu tee aahirina zamani?"

⁴ Isa alawanimu, "Pengkanaaka ara dhaangia tee mia mopasaladhalakomiu.

⁵ Sababuna abhari o mia bhemoumbana tee apake saroku tee apogau, 'Iakumo o Al Masi!' Manga incia bheapasaladhala mia bhari.

⁶ Ingkomiu bheurango suarana potimbea tee lelana manga mia mopotimbe, maka bholi umaeka roonamo bhari-bharia sumai tabeana amembali porikana, maka wakutuu incia sumai mencuanapo eona kiaamati.

⁷ Saangu lipu bheapobhali tee lipu mosagaanana, tee saangu pamarinta bheapobhali tee pamarinta mosagaanana. Iapai-iapai bheadhaangia tee kaara tee o alamu sii akolendu,

⁸ maka bhari-bharia sumai siimpo auwalina, mboomo kapiina inamisina bhawine wakutuuna apalaahiri anaana.

⁹ Wakutuu incia sumai, ingkomiu bheutopasaraakaaka to utosikisaa tee utopekamate. Bhari-bharia lipu bheabancikomiu roonamo uose laku.

¹⁰ Tee abhari o mia inda momatangkana iimanina roonamo opea momembalina sumai,

tee manga incia apopasaraakaaka tee apobancibanci podho-podho manga incia.

¹¹ Abhari o nabii gau-gau bheaumba to apasaladhala manga mia bhari.

¹² Roonamo kadhaki ahandamo kabharina sumaimo kaasina mia bhari amembali amatawaa.

¹³ Maka o mia mopotaangina sakawana kapadhaana bheatopasalaamati.

¹⁴ Tee Lele Malape Pamarintana Aulata'ala bheapakolelea i saangua dunia sii, mamudhaakana bhari-bharia lipu arangoa. Sapadhana incia sumai, kasiimpo bheaumba o eona kiaamati."

Kasikisaa Momatamo tee Manga Nabii Gau-gau

24:15-28

(Mrk. 13:14-23; Luk. 21:20-24)

¹⁵ "Ingkomiu bheukamata 'Giu Monaajisina tee Mopahancuruna' akakaro i tampa momangkilo, mboomo ipogauakana Nabii Daniel, -- manga mobacana tabeana akamata opea o ma'anana!

¹⁶ Kasiimpo manga mia i Yudea tabeana apalai i gunu mamudhaakana atopasalaamati.

¹⁷ Manga mia modhaangiana i bhawona padhana bhanua bholi asapo to aala manga pewauana i nuncana bhanuana, maka tabeana alausakamo apalai!

¹⁸ Tee manga mia motangasaana i inawuna bholi ambuli to aala manga pakeana, maka tabeana alausakamo apalai!

¹⁹ Acilakamo manga bhawine motangasaana mobhawa-bhawa atawa mopaduduna anana i zamani naile itu!

²⁰ Udo'amo mamudhaakana wakutuuna upala-
iaka karomiu inda akawa wakutuuna kagari
atawa o eona Saputuu.

²¹ Roonamo wakutuu incia sumai bheamem-
bali o kasukara momaoge tee indapo mina ad-
haangia minaaka i bhaa-bhaana dunia sakawana
sii-sii, tee indamo bheamembali pendua.

²² Ande o wakutuu incia sumai inda atopekad-
hei, sumaimo inda dhaangia samia uka bhemos-
alaamatina; maka roonamo manga mia ipilina,
sumaimo o Aulata'ala bheapekadheia o wakutu-
una.

²³ Wakutuu incia sumai, ande dhaangia o mia
mopogauna tee ingkomiu, 'Kamatea, Al Masi
dhaangia iwe sii!,' atawa 'Al Masi dhaangia iwe
sumai!,' bholi uparacaea.

²⁴ Roonamo bheaumba al masi gau-gau tee
manga nabii gau-gau, manga incia bheapadhaan-
gia giu inda momentela tee manga muuzizati,
mamudhaakana (ande amembali) apasaladhala
manga mia ipilina uka.

²⁵ Jadi, udhania! Padhamo kupaumbakomiu
porikana minaaka i piamo itu, wakutuu kajadia
incia sii indapo amembali.

²⁶ Jadi ande dhaangia o mia mopogauna tee in-
gkomiu, 'Kamatea, Incia dhaangia i tana matuu,'
bholi ulingka iwe sumai; atawa, 'Kamatea, Incia
dhaangia i nuncana kamara,' bholi uparacaea!

²⁷ Sababuna ande aumba o Anana Maanusia
bheakocahea mboomo bhibhito akokila minaaka
i timbu sakawana i bhara.

²⁸ Iapai dhaangia tee bhangke, iwe siitu dhaangia tee manu-manu bunia aporomu-romu."

Umbaana Anana Maanusia

24:29-36

(Mrk. 13:24-32; Luk. 21:25-33)

²⁹ "Inda mangenge sapadhana kasukara incia sumai, matanaeo bheamalalanda tee o bula indamo akocahea tee kalipopo bheakotibu minaaka i laiana tee manga mokuasaina laiana bheabagoemo.

³⁰ Kasiimpo bheatokamatamo o tanda Anana Maanusia i laiana. Bhari-bharia manga lipu i dunia sii sumbere bheatangi amaporo tee manga incia bheakamata Anana Maanusia aumba i bhawona ta'ina ngalu tee kuasana tee kamuliana momaoge.

³¹ Incia bheatumpu manga malaa'ekatina alimba tee atowii sangkakalana tee suara momakaa tee bhearomusaka manga mia ipilina minaaka i pata singkua dunia, minaaka i tapana laiana sakawana i tapana laiana mosagaanana.

³² Aalea o kaadhari minaaka i ibaratina puuna ara. Ande manga rahana amalulu wakutuuna apepuumo akotuna, umatauamea ande bheakawamo bulaana paneo.

³³ Mboo sumai uka, ande ukamata bhari-bharia giu incia sumai amembali, siitumo umatau wakutuuna amakasumo mpuu.

³⁴ Satotuuna Iaku kupogau tee ingkomiu, manga mia i zamani sii-sii indapo amate bhari-bharia ande o giu incia sumai indapo amembali.

³⁵ Laiana tee alamu sii bheaila, maka o pogauku sii inda bheaila sa'umuruu.

³⁶ Inda dhaangia samia uka momataua naepia o eona tee jamuna, manga malaa'ekati i sorogaa inda amataua uka, Anana Maanusia uka inda amataua, maka tangkanamo o Amaku samia momataua."

Kaadhari Mamudhaakana Akojaga-jaga

24:37-44

(Luk. 17:26-30; 17:34-36)

³⁷ "Wakutuuna umbaana Anana Maanusia naile itu, kadhaangiana mboomo zamanina Nabii Nuh i piamo itu.

³⁸ Roonamo zamani i piamo itu wakutuuna indapo aumba uweni mawa sumai, manga mia akande tee asumpu, akawi tee atopakawi mboo sumai torotorosu sakawana o eona Nabii Nuh apesua i nuncana bhangka maogena.

³⁹ Tee manga incia inda amatau opeopea, kasi-impo uweni mawa sumai aumba tee apatundu manga incia bhari-bharia, mboo sumai uka naile itu wakutuuna umbaana Anana Maanusia.

⁴⁰ Wakutuu incia sumai, dhaangia rua mia o mia tangasaana akarajaa i inawuna; samia bheatoangka tee samiana bheatobholi.

⁴¹ Rua mia bhawine tangasaana apatii kag-ilina gandumna; samia bheatoangka tee samiana bheatobholi.

⁴² Jadi ukojaga-jagamo sababuna ingkomiu inda umataua naepia o Kawasana Opumu bheaumba.

⁴³ Maka udhania o giu incia sii! Ande mokobhanuana amataua rambi saopea o mia manako bheaumba, atantumo incia bheakojaga-jaga mamudhaakana o mia manako sumai inda apesua i nuncana bhanuana.

⁴⁴ Rampaakanamo sumai, ingkomiu tabeana umakanumo roonamo Anana Maanusia bheaumba wakutuuna inda unamu-namua."

Ibaratina to Bhatua Mota'ati tee Bhatua Momadhaki

24:45-51

(Luk. 12:41-48)

⁴⁵ "Incema o bhatua mota'ati tee incema o bhatua mo'aarifu? Siitumo iangkana opuna to amembali kapalana manga bhatuana, modhawuna kinande i manga bhatua mosagaanana ande akawa wakutuuna.

⁴⁶ Amasanaa mpuu o bhatua bheapotibhaakea tangasaana apewau karajaana i wakutuuna opuna aumba.

⁴⁷ Satotuuna Iaku kupogau tee ingkomiu: Opuna sumai bheapamembalia mojananina bhari-bharia pewauana.

⁴⁸ Maka ande bhatua sumai amadhaki tee apogau i nuncana ngangarandana,

⁴⁹ 'Opuku dhaangia amangenge ambuli,' kasiimpo incia apepuumo abhebhe bhari-bharia bhatua mosagaanana, tee akande asumpu apobhawa-bhawa tee manga momalangona,

⁵⁰ sanampuu opuna sumai ambuli i eo inda inamu-namuna tee i wakutuu inda imatauna.

⁵¹ Kasiimpo opuna asikisaaia tee adhikaia apapoosea tee manga mia munaafiki. Iwe sumai dhaangia tangi momaporo mpuu tee mopakirikirina ngincina."

25

*Kabuabua Momakidha tee Kabuabua Mokabhongo-bhongo**25:1-13*

¹ "Wakutuu incia sumai, Pamarintana Aulata'ala amembali ato'ibaratiaka tee sapulu mia kabuabua moalana padamara tee alingka apokawaaka panganti umane.

² Lima mia mokabhongo-bhongona tee lima mia momakidhana.

³ Kabuabua mokabhongo-bhongona sumai abhawa padamara, maka inda abhawa mina gasi,

⁴ sainamo manga kabuabua momakidha sumai abhawa padamara tee mina gasi i nuncana manga butolona.

⁵ Maka panganti umane sumai amangenge akawa, sabutuna manga kabuabua sumai amangkoomo matana kasiimpo atokolemo.

⁶ Pontanga malo, atorangomo suara mogorana, 'Panganti umane aumbamo! Maimo pokawaakea!

⁷ Sapulu miaia o kabuabua sumai abhangumo tee apasamea o padamarana.

⁸ Kabuabua kabhongo-bhongo sumai apogaumo tee kabuabua momakidhana sumai, 'Manga dhawu mina gasimu saidhe to ingkami, roonamo o padamaramami bheamareamo.'

⁹ Alawanimu kabuabua momakidhana sumai, 'Inda, roonamo ande tapodhawuaka mina sii, ingkami inda takawaakea tee ingkomiu inda ukawaakea uka. Lingka aali i moasona mina.'

¹⁰ Maka wakutuuna manga incia alingka aali mina, aumbamo panganti umane sumai tee

manga incia mosiapuna apesuamo apobhawa-bhawa i tampana kariaa kawia. Kasiimpo o bhamba atotutubhimo.

¹¹ Kasiimpo manga kabuabua mokabhongo-bhongona sumai akawamo tee agoramo, 'Opu, Opu bungkalea o bhamba to ingkami!'

¹² Maka panganti umane sumai apogaumo, 'Satotuuna laku kupogau tee ingkomiu, laku inda kumataukomiu!' "

¹³ Kasiimpo Isa apa'aahirimea ibaratina sumai mboo sii, "Sumaimo ukoja-kojagamo, roonamo ingkomiu inda umataua naepia eona atawa jamuna akawa."

Ibaratina to Talu Mia Bhatua

25:14-30

(Luk. 19:12-27)

¹⁴ "Roonamo Pamarintana Aulata'ala ibaratina mboomo samia molingkana i lipu sawetana tee akemba manga bhatuana to aparacaeaaka pewauana i manga incia.

¹⁵ Dhaangia samia aparacaeaakea lima talenta* doi bulawa, tee samiana rua talenta, tee samiana uka satalenta, mboomo kapoolina samia-samia. Kasiimpo incia alingkamo.

¹⁶ Sanampuu alingkamo bhatua motarimana lima talenta doi bulawa sumai. Incia apalingka doina tee apokawaaka laba lima talenta doi bulawa uka.

¹⁷ Mboo sumai uka tee bhatua motarimana rua talenta doi bulawa apotibhaaka laba rua talenta doi bulawa uka.

* **25:15 25:15 talenta:** I zamani incia sumai, saangu talenta doi bulawa haragaana akolabhi kamondona samia karajaa sapulu lima tao kangengena.

¹⁸ Maka o bhatua motarimana satalenta doi bulawa alingka aseli kabhalongko kasiimpo abuni-aka doina opuna i nuncana tana.

¹⁹ Mangenge sapadhana incia sumai ambulimo opuna manga bhatua sumai kasiimpo apolentu tee manga incia.

²⁰ Bhatua motarimana lima talenta doi bulawa sumai aumba tee adhawuakea labhina lima talenta to opuna, 'Opu, opu udhawuakaaku lima talenta doi bulawa. Kamatea, iaku kupotibhaaka laba lima talenta uka.'

²¹ Lawanina opuna sumai, 'Amalape mpuu pewaumu itu, ingkoo o bhatua momalape tee motoparacaea. Roonamo ingkoo utoparacaea tee hali maidhiidhi, sumaimo kuparacaeaakako hali momaoge. Maimo pesua takaunde-undeaka tee Iaku!'

²² Kasiimpo bhatua motarimana rua talenta doi bulawa sumai aumbamo tee apogau, 'Opu, opu padhamo udhawuakaaku doi rua talenta bulawa. Kamatea, kupotibhaaka laba rua talenta uka.'

²³ Apogaumo opuna sumai, 'Amalape mpuu pewaumu itu! Ingkoo o bhatua momalape tee motoparacaea. Roonamo ingkoo utoparacaea tee hali maidhiidhi, iaku bhekuparacaeaakako hali maoge. Maimo pesua takaunde-undeaka tee Iaku!'

²⁴ Kasiimpo bhatua motarimana satalenta doi bulawa sumai aumba tee apogau, 'Opu, kumataua ande ingkoo samia momakaana incana, ingkoo utobhe bhakena penembula i tampa inda ipombulamu, tee uene hasili i tampa inda ihewimu.

²⁵ Siitumo sababuna kumaeka jadi kulingka

kubuniakea o doi talenta bulawamu i nuncana tana. Siipea o doimu opu.'

²⁶ Lawanina opuna, 'Ingkoo o bhatua momadhaki tee momangare! Ingkoo umataua ande iaku kutobhe bhakena penembula i tampa inda ipombulaku, tee kuene hasili i tampa inda ihewiku.

²⁷ Ande mboo itu tabeana udhikaia i bang o doiku sumai, mamudhaakana wakutuuna kumbuli, amembali kutarimaia pendua o doiku sumai tee bungana.

²⁸ Siitumo sababuna, alamea o doi satalenta bulawa sumai minaaka i incia tee udhawuakea i mia mokodoina sapulu talenta bulawana sumai.

²⁹ Roonamo o mia mokopewauana, bhearangania pekabhari tee incia bheapotibhaaka ataralabhi-labhi. Maka o mia inda mokopewauana, opeapo modhaangiana i karona bheaalea uka.

³⁰ Tee o bhatua inda mokoguna sumai, bheabhanakea i nuncana kalalanda mopoposa. Iwe sumai dhaangia tee tangi tee mopakiri-kirina ngincina!' "

Kahaakimu i Eona Kiaamati

25:31-46

³¹ "Wakutuuna Anana Maanusia aumba i nuncana kamuliangina, Incia apoose tee bhari-bharia malaa'ekati, Incia bheauncura i bhawona kauncuramakana momulia mboomo raja.

³² Kasiimpo bhari-bharia lipu bhearomusakea i aroana, tee Incia bheapapogaa manga incia amembali rua kolompo mboomo gembala mopapogaana dumbana tee bhembena.

³³ Manga dumba sumai ibaratina manga mia mopewauna peeluana Aulata'ala bhearomusakea i weta kaanana, sainamo manga bhembe sumai ibaratina manga mia inda moosena parintana Aulata'ala bhearomusakea i weta kaaina.

³⁴ Kasiimpo Raja sumai bheapogau i manga mia i weta kaanana, 'Maimo ingkomiu ibarakatina Amaku. Pesuamo i nuncana pamarinta mopadhana ipasiapuaka to ingkomiu minaaka i auwalina dunia sii.

³⁵ Sababuna wakutuuna kumaara, ingkomiu udhawuaku kukande; wakutuuna amatuu bhorokoku, ingkomiu udhawuaku kusumpu; wakutuuna kuumba mboomo dhaga, ingkomiu udhawuaku mbooresa.

³⁶ Wakutuuna kukalealea, ingkomiu udhawuaku pakea; wakutuuna kumapii, udhambaakaaku; wakutuuna iaku i nuncana katorongku, usoloaku.'

³⁷ Kasiimpo manga mia mopewauna peeluana Aulata'ala sumai alawani, 'Opu, naepia umaara tee tadhawuakako kinande, atawa wakutuuna amatuu bhorokomu tee tadhawuakako usumpu?

³⁸ Naepia takamatako mboomo dhaga tee tadhawuakako mbooresa, atawa ande ukalealea tee tadhawuakako pakea?

³⁹ Naepia takamatako umapii tee utotorongku tee tasoloko?'

⁴⁰ Raja sumai bhealawani manga incia, 'Sato-tuuna Iaku kupogau tee ingkomiu, sagala giu ipewaumu to sala samia minaaka i manga witi-naiku mohinana mpuu sii, ma'anana upewau to Iaku uka.'

⁴¹ Kasiimpo Raja sumai bheapogau i manga mia i weta kaaina, 'Lingkamo minaaka iwe sii, e manga mia mototunda! Pesuamo i nuncana waa inda bhemomatena sa'umurua, mopadhana ipasiapuakana Ibilisi mokapalaina seetani tee manga malaa'ekati!

⁴² Sababuna wakutuuna kumaara, ingkomiu inda udhawuaku kukande; wakutuuna am-atuu bhorokoku, ingkomiu inda udhawuaku kusumpu.

⁴³ Wakutuuna iaku kuumba mboomo dhaga, ingkomiu inda udhawuaku mbooresa; waku-tuuna kukalealea, ingkomiu inda udhawuaku pakea. Wakutuuna kumapii tee i nuncana katorongku, ingkomiu inda usoloaku.'

⁴⁴ Kasiimpo manga incia bhealawani, 'E opu, naepia takamatako umaara, atawa amatuu bhorokomu, atawa mboomo mia dhaga moubana, atawa ukalealea, atawa umapii, atawa i nuncana katorongku buaka ingkami inda tadhambaakako?'

⁴⁵ Raja sumai alawanimu, 'Satotuuna Iaku ku-pogau tee ingkomiu, wakutuuna ingkomiu inda upewau to sala samia witinaiku mohinana mpuu sii, ma'anana ingkomiu inda upewau to Iaku uka!'

⁴⁶ Manga incia sii bheatopapesua i tampana kasikisaa sa'umurua, maka manga mia mopewauna peeluana Aulata'ala bheapotibhaaka dhadhi sa'umurua."

26

Kapaumbaakana Pata Mpearo to

Kanarakaana Isa -- Apomufakati to Apekamate Isa

26:1-5

(Mrk. 14:1-2; Luk. 22:1-2; Yah. 11:45-53)

¹ Sapadhana aadhariaka bhari-bharia giu incia sumai, Isa apogaumo i manga murina,

² "Ingkomiu umataua ande rua eopo raraeana Paska miana Yahudi akawamo, tee o Anana Maanusia bheatopasaraakaaka to atoloe i kau salib!"

³ Wakutuu incia sumai, manga imamu maoge tee manga mancuanana miana Yahudi aporomusaka i maligena Kapalana Imamu Maoge Kayafas.

⁴ Manga incia apomufakati to arako Isa tee inda amarobhoakea kasiimpo apekamatea.

⁵ Manga incia apogau, "Maka bholi wakutuuna raraeana Paska, ancosala dhaangia tee karobho i tanga-tangana ra'eati."

Bhaana Isa Atomina-minaki

26:6-13

(Mrk. 14:3-9; Yah. 12:1-8)

⁶ Wakutuuna Isa adhaangia i Bait Ani, i bhanuana Simon o saroni "samia mokopanyakina kuli dhaa,"

⁷ aumbamo samia bhawine abhawa butolo motokarajaana minaaka i bhatu maputi mokoantoakana mina-mina mawondu momaalina haragaana. Tangasaana akande, bhawine sumai apatiriakamea mina-mina mawondu i bhaana Isa.

⁸ Sakamatana giu incia sumai, manga murina a'amaramo tee apogau, "Opea o fa'edana uawuawu mina-mina mawondu itu?"

⁹ Mina-mina mawondu itu amembali atoaso tee o haragaana amaali tee o doina amembali adhawuakea to manga mia misikini."

¹⁰ Isa amataua o fikirina manga incia, kasiimpo apogau, "Pokia ingkomiu upekarasai bhawine sii? Incia apewau giu momalape to Iaku.

¹¹ Roonamo manga mia misikini sadia adhaangia i tanga-tangamiu, maka Iaku inda sadia bhekupobhawa-bhawa tee ingkomiu.

¹² Roonamo tee apatiriakea mina-mina mawondu sumai i badaku, incia apasiapuakaaku to akoburuaku.

¹³ Satotuuna Iaku kupogau tee ingkomiu, iapai-iapaipo uka o Lele Malape atopakoleleaka i saangua dunia, manga incia bheapetulatulaaka opea ipewauna bhawine sii, sabutuna o mia bheaudhaniania."

Yudas Ahianati Isa

26:14-16

(Mrk. 14:10-11; Luk. 22:3-6)

¹⁴ Kasiimpo Yudas Iskariot, sala samia minaaka i sapulu rua mia murina Isa, alingka apokawa tee manga imamu maoge.

¹⁵ Yudas apogau, "Opea bheidhawuakamu to iaku ande kupasaraakaaka Isa to ingkomiu?" Kasiimpo manga incia adhawuakamea talu pulu tibha doi pera.

¹⁶ Pepuu wakutuu incia sumai, Yudas apeelomo wakutuu momalape to apasaraakaaka Isa.

Isa Akande tee Manga Murina i Eona Raraeana Paska

26:17-25

(Mrk. 14:12-21; Luk. 22:7-14,21-23; Yah. 13:21-30)

¹⁷ Eo bhaa-bhaana i eona raraeana Roti Inda Mokoragi, aumbamo manga murina kasiimpo apogau tee Isa, "Iapai o tampa ipeelumu to tapasiapuakako kinandena raraeana Paska mi-ana Yahudi?"

¹⁸ Alawanim o Isa, "Lingkamo i kota, iwe sumai bheupokawa tee mia tee upaumbaakea, 'Kasameana Guru: Wakutuuku amakasumo, i nuncana bhanuamu Iaku bhekukande kinandena raraeana Paska tapobhawa-bhawa tee manga muriku.' "

¹⁹ Rua miaia murina sumai apewaumea opea ipakawaakana Isa to manga incia. Kasiimpo manga incia apasiapuakamea o kinandena Paska.

²⁰ Wakutuuna amalo, Isa auncura akande tee sapulu rua mia murina.

²¹ Tangasaana akande, Isa apogaumo, "Sato-tuuna Iaku kupogau tee ingkomiu, sala samia minaaka i tanga-tangamiu bheapasaraakaaku."

²² Kasiimpo manga incia amaasimo incana tee apoabha-abhakimo podho-podho manga incia, "Mencuana iaku, Opu?"

²³ Alawanim o Isa, "Incema mopalondona limana i nuncana mangko sii mopobhawana tee Iaku wakutuuna kukande, sumaimo incia bhe-mopasaraakaaku.

24 Inciamo o Anana Maanusia bhealingka mboomo mopadhana motoburina to Incia, maka acilakamo o mia mohianatia! Salabhina o mia incia sumai inda atopalaahiri i dunia sii."

25 Yudas mopasaraakana Incia sumai apogau, "Mencuana iaku, Guru?" Alawanim o Isa, "Karomu samia mopogauna."

Patotapuana Malona Kariaa to Audhani Eo Kapadhaana Isa

26:26-29

(Mrk. 14:22-25; Luk. 22:15-20; 1Kor. 11:23-25)

26 Tangasaana manga incia akande, Isa aalamo roti tee aemani sukuru i Aulata'ala kasiimpo akatukatukia tee limana tee adhawuakea i manga murina tee apogau, "Alea tee ukandea, siimo o badaku."

27 Kasiimpo aalamo tonde tee aemani sukuru. Kasiimpo adhawuakea i manga murina tee apogau, "Sumpumo bhari-bharikomiu minaaka i tonde incia sii.

28 Roonamo siimo o raaku, raana pojanjia ibusakaku to manga mia bhari mamudhaakana ato'amponi manga dosana.*

29 Tee Iaku uka kupogau tee ingkomiu, pepuu sii-sii indamo bhekusumpu angguru sii sakawana o eona bhekusumpu mobhaauna kupobhawa-bhawa tee ingkomiu i nuncana pamarintana Amaku."

* 26:28 26:28 Dhaangiapo uka manga kaburina momangengena apogau kooni, "Roonamo siimo raaku, raana pojanjia mobhaauna to ibusakaakana to manga mia bhari mamudhaakana ato'amponi manga dosana.

Petrus Bheapesapuaka Isa

26:30-35

(Mrk. 14:26-31; Luk. 22:31-34; Yah. 13:36-38)

³⁰ Kasiimpo manga incia alagu-laguakamo lagu kapujia, sapadhana incia sumai manga incia apangaramo i Gunu Zaitun.

³¹ Kasiimpo Isa apogau i manga moosea, "Malo incia sii uka inda bheamatangka o iimaniniu rampaakanamo opea bhemomembalina i karoku; roonamo padhamo atoburi: Aulata'ala apogau, 'Iaku bhekupekamatea o gembalana tee o gulumana dumba sumai bhekupapogaa-gaaia.'

³² Maka sapadhana apadhadhiaku pendua, Iaku bhekulingka kuporikanaakakomiu i Galilea."

³³ Alawanimu o Petrus, "Moomini manga incia inda amatangka o iimanina roonamo opea bhemomembalina i karomu, maka iaku sadhaadhaa amatangka o iimaniku!"

³⁴ Apogaumo o Isa, "Satotuuna Iaku kupogau tee ingkoo, malo sii uka, indapo akangkuraa'o o manu, ingkoo bheupesapuakaaku talu mpearo."

³⁵ Apogaumo o Petrus, "Moomini kumate kupobhawa-bhawa tee Ingkoo, inda bhekupe-sapuakako!" Bhari-bharia murina mosagaanana uka apogau mboo sumai.

Isa Ado'a i Inawu Getsemani

26:36-46

(Mrk. 14:32-42; Luk. 22:39-46)

³⁶ Isa tee manga murina akawamo i saangu tampa mokosaroakana Getsemani. Kasiimpo

apogau tee manga murina, "Uncuramo iwe sii, kulingkapo iwe sumai to kudo'a."

³⁷ Kasiimpo Isa abhawa Petrus tee rua mia ana umanena Zabdi, manga incia alingka apoose tee Isa. Incia apepuumo amaasi incana tee asukara.

³⁸ Kasiimpo Isa apogaumo i manga incia, "Incaku amaasi mpuu, mboomo kunamisi bhekumatemo. Mbooremo iwe sii tee ukoja-kojagamo upobhawa tee upoose tee laku."

³⁹ Kasiimpo Isa amaju saidhe i aroa asuju tee ado'a, "E Amaku ande amembali, taroakamo o tonde kanaraka incia sii upekaridhoa minaaka i aroaku, maka bholi mboomo peeluaku, tabeana mboomo peeluamu."

⁴⁰ Wakutuuna ambuli i manga murina sumai, Isa apokawaaka manga incia tangasaana akole. Kasiimpo apogau tee Petrus, "Inda ukapoia buaka ingkomi ukojaga-jaga kangengena sajamu tee laku?

⁴¹ Ukoja-kojagamo tee udo'amo mamudhaakana inda upotibhaaka kapancoba. Inciamo o rohimiu gauna apewau giu mobanara maka o badamiu amalute."

⁴² Kasiimpo Isa alingka pendua to ado'a, "E Amaku, ande o tonde incia sii inda amembali upekaridhoakaaku tee tabeana kusumpua, sumaimo taroakamo o giu incia sumai kusumpua apokana mboomo opea ipeelumul!"

⁴³ Wakutuuna ambuli pendua i manga murina Isa apotibhaaka manga incia tangasaana akole, roonamo amangkoo mpuu o matana.

⁴⁴ Isa abholi manga incia kasiimpo ambuli pendua ado'a to kamondona talu mpearo tee

abhoasaka do'a mopokana mboomo mobhaa-bhaana.

⁴⁵ Sapadhana incia sumai, Isa ambuli pendua i manga murina tee apogau, "Dhaangiapo uka ukole tee uponiunto? Kamatea, wakutuuna akawamo! Anana Maanusia bheatopasaraakaakamo i limana manga mia mokodosa.

⁴⁶ Bhangumo, maimo talingkaaka. Kamatea, o mia mopasaraakaaku amakasumo."

Isa Atorako

26:47-56

(Mrk. 14:43-50; Luk. 22:47-53; Yah. 18:3-12)

⁴⁷ Tangasaana Isa apogau, Yudas sala samia minaaka i sapulu rua mia murina sumai aumbamo apobhawa tee manga mia bhari abhawa hancu tee kabhebhe. Manga incia o mia itumpuna manga imamu maoge tee manga mancuana miana Yahudi.

⁴⁸ Yudas padhamo apaumbaakea saangu tanda to manga mia ibhawana sumai, "Mia iikiku, situmo o miana tee urakomea!"

⁴⁹ Incia apekakasumo i Isa kasiimpo apogau, "Salamu e Guru!" Kasiimpo aikia.

⁵⁰ Isa alawanimu, "E witinai, pewaumea opea ihaejatiakamu uumba iwe sii." Kasiimpo manga mia bhari sumai amaju akeniaka Isa tee arakoa.

⁵¹ Kasiimpo sala samia minaaka i manga moosena Isa ahobuti hancuna kasiimpo asimbi talingana bhatuana imamu maoge sakawana amabhotu.

⁵² Kasiimpo Isa apogau i mia moosea sumai, "Papesuaia o hancumu itu i nuncana pisolona,

roonamo bhari-bharia mia mopakena hancu, bheamate minaaka i hancuna uka.

⁵³ Buaka uabhiaku inda amembali kuemani tulungi i Amaku mamudhaakana sii-sii Incia alambokoakaaku malaa'ekati alabhi minaaka i sapulu rua rombonga o kabharina?

⁵⁴ Maka ande mboo sumai, tuaapa bheamembali mboomo mopadhana motoburi i nuncana Kitabi Momangkilo mopogauakana ande o giu incia sii tabeana amembali mboo sii?"

⁵⁵ Kasiimpo Isa apogau i manga mia bhari sumai, "Buaka ingkomiu uabhiaku o parampo, uumba ubhawa hancu tee kabhebbe to urakoaku? Saesaeo Iaku kuadhari i aroana Baitulla maka inda urakoaku!

⁵⁶ Maka bhari-bharia sii amembali mamudhaakana amondo opea mopadhana iburina manga nabii." Kasiimpo bhari-bharia murina apalai tee abholia.

Isa i Aroana Mahakama Agama

26:57-68

(Mrk. 14:53-65; Luk. 22:54-55,63-71; Yah. 18:12-14,19-24)

⁵⁷ Sapadhana atorako, Isa atobhawamo i bhanuana Kapalana Imamu Maoge, mokosaroakana Kayafas. Iwe sumai manga ahalii Hukumu Taurati tee manga mancuana miana Yahudi aporomusaka.

⁵⁸ Petrus aose Isa minaaka i karidhoana sakawana i aroana bhanuana Kapalana Imamu Maoge. Kasiimpo apesua i aroana bhanua sumai

tee auncura tee manga pande jaga mamudhaakana amataua tuaapa o kapadhaana bhari-bharia kajadia incia sumai.

⁵⁹ Manga imamu maoge tee bhari-bharia Mahakama Agama a'usaha to apeelo kasakusii gau-gau mamudhaakana amembali apekandawuakea kahukumu mate to Isa.

⁶⁰ Maka manga incia inda apotibhaaka saangu bukutii uka, moomini abhari mpuu momembalina sakusii gau-gau. Sabutuna dhaangia rua mia momajuna

⁶¹ tee apogau, "Mia incia sii padha apogau, 'Iaku kumembali kupahancuru Baitulla tee kubhangua pendua kangengena talu eo.' "

⁶² Kasiimpo akakaromo kapalana manga imamu maoge apogau tee Isa, "Pokia Ingkoo umendeu ulawani moomini sanganga uka minaaka i bhari-bharia iraeakana manga incia sii to Ingkoo?"

⁶³ Maka o Isa inda ako'uu. Kasiimpo Kapalana Imamu Maoge sumai apogau, "To saron Aulata'ala modhadhi, iaku kutumpuko ulawani tee ujujuru tee ingkami, atotuu Ingkoo sii o Al Masi o Anana Aulata'ala?"

⁶⁴ Lawanina Isa, "Karomu samia mopogauna. Maka kupogau tee ingkomiu, pepuu sii-sii ingkomiu bheukamata Anana Maanusia auncura i weta kaanana Aulata'ala Mokokuasa tee aumba i bhawona ta'ina ngalu i laiana."

⁶⁵ Kasiimpo Kapalana Imamu Maoge Sumai abhenci pakeana tee apogau, "Incia ahina Aulata'ala! To opea uka ingkita tafaraluu sakusii? Sii-sii urangomea karomiu Incia ahina Aulata'ala.

⁶⁶ Tuaapa o fikirimiu?" Manga incia alawani, "Incia alaengamo atohukumu mate!"

⁶⁷ Kasiimpo manga incia awiluki rouna Isa tee abhebhea. Tee dhaangia uka motapea

⁶⁸ tee apogau, "E Al Masi, ande Ingkoo samia Nabii manga paumbaaka incema mobhebheko?"

Petrus Apesapuaka Isa

26:69-75

(Mrk. 14:66-72; Luk. 22:56-62; Yah. 18:15-18,25-27)

⁶⁹ Tangasaana Petrus akatoro-toro i aroana bhamba, dhaangia samia bhatua bhawine aumba tee apogau i Petrus, "Mencuana ingkoo buaka mopobhawana tee Isa, miana Galilea sumai?"

⁷⁰ Maka o Petrus apesapu i aroana bhari-bharia manga mia iwe sumai, "Inda kumataua opea ipogauakamu."

⁷¹ Kasiimpo Petrus alingka i bhambana lawana bhanua sumai. Maka dhaangia uka samia bhatua bhawine mosagaanana mokamatea, kasiimpo o bhatua bhawine sumai apogau tee manga mia iwe sumai, "Mia incia sii sadia apoose tee Isa miana Nazaret sumai."

⁷² Petrus apesapu uka pendua tee apotunda, "Iaku inda kumatau o mia incia sumai."

⁷³ Inda amangenge sapatdhana incia sumai, manga mia mokakarona iwe sumai aumba i Petrus tee apogau, "Atotuumo ingkoo sala samia minaaka i manga incia roonamo atomatau minaaka i katuna pogaumu."

⁷⁴ Kasiimpo Petrus apepuumo apotunda tee aposumpa, "Iaku inda kupomatau tee mia incia sumai!" Wakutuu incia sumai uka o manu akangkuraa'o.

⁷⁵ Sabutuna o Petrus audhanimo opea ipogauakana Isa tee incia, "Indapo akangkuraa'o o manu, ingkoo talu mpearomo bheupesapuakaaku." Kasiimpo incia alimbamo minaaka iwe sumai tee atangi amaasi mpuu incana.

27

Isa Atopasaraakaaka i Pilatus

Mateana Yudas

27:1-10

¹ Samainawana, bhari-bharia manga imamu maoge tee manga mancuana miana Yahudi aporomu-romumo tee apomufakati mamudhaakana aala kambotu to apekamate Isa.

² Isa atobhoke kasiimpo abhaweaa tee apasaraakaakea i Pilatus, gubernuruna poropinsi incia sumai.*

³ Wakutuuna Yudas mopasaraakea akamata Isa abhotukia ahukumu matea, incia atobamo. Kasiimpo Yuda apambulia o doi talu pulu tibha perana sumai i manga imamu maoge tee manga mancuana miana Yahudi,

27:1 27:1-2 Mrk. 15:1; Luk. 23:1; Yah. 18:28. * **27:2 27:2** Pilatus satotuuna mencuana miana Yahudi. Incia alambokoa pamarinta Roma to aparintangi poropinsi Yudea, roonamo i zamani incia sumai Tana Israel akuasaia Pamarinta Roma. **27:3 27:3-8** Tul. 1:18-19.

⁴ tee apogau, "Kukodosamo roonamo padhamo kupasaraakaaka raana mia inda mosala." Maka alawanimo manga incia, "Ingkami inda tafaduli, siitu urusamu!"

⁵ Sabutuna o Yudas atudhaakamea o doi perana sumai i nuncana Baitulla, kasiimpo alingka minaaka iwe sumai tee aloe karona.

⁶ Manga imamu maoge aalea o doi pera sumai kasiimpo apogau, "Aharamu o doi incia sii ande atopapesua i nuncana sorongana pasombaa i Baitulla, roonamo doi incia sii o doina raa."

⁷ Sapadhana apomufakati, doi incia sumai apakemea to aaliaka tanana pande poluka to apamembalia koburuna dhaga momboorena i Yerusalem.

⁸ Siitumo sababuna sakawana sii-sii o tana incia sumai asarongiakea Tana Raa.

⁹ Tee mboo sumai, amondomo opea mopadhana ipakawaakana Nabii Yeremia, "Manga incia aala talu pulu tibha doi pera sumai, siitumo o haragaa mopadhana ipomufakatiakana manga miana Israel to Incia,

¹⁰ kasiimpo manga incia apake doi incia sumai to aaliaka tanana pande poluka, mboomo mopadhana iparintaakana Kawasana Opu to iaku."

Isa i Aroana Pilatus

27:11-26

(Mrk. 15:1-15; Luk. 23:1-5,13-25; Yah. 18:33--19:16)

¹¹ Wakutuuna Isa abhawea apapoaroa i Gubernuru Pilatus, Pilatus aabhamo, "Atotuu ingkoo

Rajana miana Yahudi?" Lawanina Isa, "Karomu samia mopogauna."

¹² Maka bhari-bharia iraeakana manga imamu maoge tee manga mancuana miana Yahudi to Isa, inda sanganga uka ilawanina.

¹³ Sabutuna apogaumo Pilatus, "Buaka inda urangoa bhari-bharia iraeakana manga incia to Ingkoo?"

¹⁴ Maka o Isa inda alawani moomini sanganga uka, sabutuna o gubernuru sumai amente mpuu.

¹⁵ Amembalimo kananea i wakutuuna Raraeana Paska, gubernuru apabebasi samia katorongku to mia bhari.

¹⁶ Wakutuu incia sumai i nuncana katorongku dhaangia samia o mia madhaki imatauna mia bhari mokosaroakana Barabas.[†]

¹⁷ Jadi roonamo manga mia bhari aporomurumumo iwe sumai, Pilatus apogaumo tee manga mia bhari sumai, "Incema ipilimiu to ipabebasiku, Barabas[‡] atawa o Isa isarongiaka Al Masi sii?"

¹⁸ Pilatus apogau mboo sumai roonamo amataua manga imamu maoge tee manga mancuana miana Yahudi apasaraakaaka Isa rampakanamo agigibulua.

¹⁹ Wakutuuna Pilatus tangasaana auncura i kurusiina pangadila, bhawinena alambokomo kasamea to incia, "Bholi u'urusu parakarana mia

[†] 27:16 27:16 Dhaangia uka manga kaburi mangenge mosarongina saro incia sii, "Isa Barabas." [‡] 27:17 27:17 Dhaangiapo uka manga kaburi momangengena apogau kooni, "...Isa Barabas atawa Isa isarongiaka Al Masi?"

mobanara sii, sababuna i malo kunarakaa mpuu rampaakanamo kupongi piakea."

²⁰ Maka manga imamu maoge tee manga mancuana miana Yahudi awujumo mia bhari mamudhaakana o Pilatus apabebasi Barabas tee ahukumu mate Isa.

²¹ Gubernuru sumai apogaumo tee manga mia bhari, "Minaaka i mia rua miana sii, incema ipilimiu to ipabebasiku?" Alawanimu manga mia bhari sumai, "Barabas!"

²² Kasiimpo o Pilatus aabha, "Ande mboo itu, opea bheipewauku tee Isa isarongiaka Al Masi sii?" Alawanimu manga mia sumai, "Loea Incia i kau salib!"

²³ Apogaumo o Pilatus, "Kadhaki opea ipewauna?" Maka manga mia bhari sumai sahandana apekee, "Loea Incia!"

²⁴ Wakutuuna Pilatus amataua ande bhari-bharia usahana indamo akoguna, tee soo sahandana amarobho, incia aalamo uwe tee abhanui li mana i aroana mia bhari sumai tee apogau, "Iaku inda kusala tee raana mia incia sii! Ingkomiu bhari-bharia motanggoa!"

²⁵ Bhari-bharia manga mia modhaangiana iwe sumai alawani, "Umbe inda pokia, ingkami tee anaanamami motanggoni raana!"

²⁶ Kasiimpo Pilatus apabebasi Barabas to manga mia bhari sumai, tee atumpu mia to asambi Isa tee apasaraakaakea to aloea i kau salib.

Isa Atoele-ele

27:27-31

(Mrk. 15:16-20; Yah. 19:2-3)

²⁷ Kasiimpo Isa abhawe a manga suludaduna Pilatus apesua i nuncana maligena gubernuru, tee bhari-bharia suludadu sumai aporomusaka i saripina Isa.

²⁸ Manga incia abungkale pakeana Isa tee apapakeakea juba waranaa wungu.

²⁹ Kasiimpo akarajaakea saangu mahakota mokorui tee apasaakea i bhawona bhaana, tee adhawuakea sapale lumai i lima kaanana. Sapadhana sumai manga incia asujumo i aroana tee aele-elea, tee apogau, "Salamu e Rajana miana Yahudi!"

³⁰ Manga incia awiluki Isa tee aala lumai ikenina, kasiimpo abhebheakea i bhaana.

³¹ Sapadhana aele-elea, abungkalemea o juba waranaa wungu sumai tee apapakeakea pendua o pakeana, kasiimpo abhawe a tee alingkaakea to aloea i kau salib.

Isa Aloea i Kau Salib

27:32-44

(Mrk. 15:21-32; Luk. 23:26,33-43; Yah. 19:17-24)

³² Wakutuuna alimba minaaka i kota sumai, i tangana dhala manga incia apokawamo tee samia mominaakana i Kirene mokosaroakana Simon. Kasiimpo manga incia apakisaai to asodha kau salibna Isa.

³³ Sapadhana sumai manga incia akawamo i saangu tampa mokosaroakana Golgota, ma'anana Golgota sii o Tampana Bukuna Bhaa.

³⁴ Tee iwe sumai manga incia adhawuakea uwena angguru ipapojalo tee giu mapa'i minaaka

i piu to Isa. Maka sapenamina angguru sumai, Incia amendeu asumpua.

³⁵ Kasiimpo manga incia aloeaka Isa i kau salib, tee atudhaaka dadu to apapodhawu-dhawuaka pakeana.

³⁶ Sapadhana sumai manga incia auncuramo iwe sumai to ajagani Isa.

³⁷ Manga incia adhika kaburi mokoantoakana karaeaka i bhawona bhaana Isa, "Siimo o Isa, Rajana miana Yahudi."

³⁸ Wakutuu incia sumai dhaangia rua mia o mia parampo motoloena mopobhawa tee Isa, samia i weta kaanana tee samia i weta kaaina.

³⁹ Manga mia molalona iwe sumai alengko-lengko bhaana tee ahina Isa.

⁴⁰ Manga incia apogau, "E Ingkoo bhemopahancuruna Baitulla tee bheupabhangua pendua kangengena talu eo! Ande Ingkoo atotuu-totuu o Anana Aulata'ala, sapomo minaaka i kau salibmu itu tee upasalaamatia o karomu!"

⁴¹ Mboo sumai uka tee manga imamu maoge, manga ahalii Hukumu Taurati tee manga mancuana miana Yahudi aele-ele uka Isa tee apogau,

⁴² "Mia mosagaanana apasalaamatia sainamo karon samia inda amembali apasalaamatia! Ande Incia Raja Israel, malape Incia asapo minaka i kau salibna sumai, kasiimpomo ingkami taparacaea Incia.

⁴³ Incia aparacaea i Aulata'ala, jadi taroakamo sii-sii o Aulata'ala mopasalaamatia ande o

Aulata'ala atotuu-totuu amaasiakea, roonamo Incia padhamo apogau, 'Iakumo o Anana Aulata'ala.' "

⁴⁴ Sampe rua miaia o parampo mopobhawana motoloena i kau salib tee Isa uka aose ahinaia mboo sumai.

Mateana Isa

27:45-56

(Mrk. 15:33-41; Luk. 23:44-49; Yah. 19:28-30)

⁴⁵ Pontanga eo, kangengena talu jamu, saangua lipu sumai amalalanda.

⁴⁶ Kera-kera arambi talu mata konowia, agoramo Isa tee suara makaa, "Eli, Eli, lama sabakhtani?," o ma'anana, "E Aulata'alaku, Aulata'alaku apokia ubholiaku?"

⁴⁷ Sarangona suara incia sumai, dhaangia pia mia o mia mokabhale-bhalena iwe sumai apogau, "Incia agoraaka Nabii Ilyas."

⁴⁸ Kasiimpo sala samia minaaka i manga mia mojaganina Isa aumba pekadhei tee aalamo kamba-kambana tawo. Kasiimpo apalondoa o kamba-kambana tawo sumai i nuncana angguru makolo tee adhikaia i tapana sapale lumai kasiimpo apasumpuaka Isa.

⁴⁹ Maka manga mia mosagaanana apogau, "Bholi, salabhina takamatapea, ara o Nabii Ilyas aumba to apasalaamatia."

⁵⁰ Kasiimpo o Isa agora pendua tee suara makaa sapadhana sumai amabhotumo inyawana.

⁵¹ Sanampuu o corocorona Baitulla amabhencimo minaaka i bhawo sakawana i tambe. Tana akolendu tee manga gunu bhatu apoweta.

⁵² Manga koburu atobungkale, tee abhari o maeatina mia mosaalihi adhadhi pendua

⁵³ tee alimba minaaka i koburu kasiimpomo apesua i kota momangkilona Yerusalem tee apatiumbaakamo karonā i mia abhari.

⁵⁴ Wakutuuna kapalana suludadu tee manga suludadu mojanina Isa akamata tana akolendu, manga incia amaeka mpuu tee opea momembalina iwe sumai. Kasiimpo manga incia apogau, "Atotuumo mia Incia sii o Anana Aulata'ala!"

⁵⁵ Iwe sumai abhari uka o bhawine mokamatana kajadia incia sumai minaaka i karidhoana. Manga bhawine sumai moosena Isa minaaka i Galilea to molaiania.

⁵⁶ I tanga-tangana manga bhawine sumai dhaangia tee Mariam minaaka i Magdala, Mariam inana Yakub tee Yusuf, tee uka inana manga anana Zabdi.

Isa Atokoburu

27:57-61

(Mrk. 15:42-47; Luk. 23:50-56; Yah. 19:38-42)

⁵⁷ Wakutuuna magarihi, aumbamo samia morangkaeana minaaka i Arimatea, mokosaroakana Yusuf. Incia sumai o murina Isa uka.

⁵⁸ Incia alingka apokawa tee Pilatus to aemani maeatina Isa. Pilatus aparintaakea to apasaraaka maeatina Isa to incia.

⁵⁹ Sapadhana Yusuf aala maeatina Isa, incia abhalungia tee kae maputi momangkilo.

⁶⁰ Kasiimpo apadholemea i nuncana koburu bhaauna Yusuf motoselina i nuncana gunu bhatu, tee apadholeakea saangu bhatu momaoge i bhambana koburu sumai, kasiimpo ambuli.

⁶¹ Maka o Mariam minaaka i Magdala tee Mariam mosagaanana sadhaadhaa amboore iwe sumai, auncura i aroana koburu sumai.

Koburuna Isa Atojagani

27:62-66

⁶² Samainawana, i eona Saputuu, manga imamu maoge tee manga mia minaaka i rombongana Farisi alingka apobhawa-bhawa apokawaaka Pilatus

⁶³ tee apogau, "Opu, ingkami taudhania waku-tuuna pande gau-gau sumai dhaangiapo ad-hadhi, Incia apogau, 'Sapadhana talu eo, Iaku bhekubhangu pendua.'

⁶⁴ Rampaakanamo sumai, parintaakea to ajagani koburu sumai sakawana talu eo; ancotala manga murina aumba amanakoa, kasiimpo apogauakea i manga ra'eatina, 'Incia abhangumo minaaka i mate,' tee mboo sumai o kagau-gauna mo'aahirina sumai alabhi o kadhakina minaaka i kagau-gauna mobhaa-bhaana."

⁶⁵ Apogaumo Pilatus i manga incia, "Sii kudhawukomiu pia-pia mia suludadu; lingka tee ujagania pekalape o koburu sumai."

⁶⁶ Kasiimpo manga kapalana miana Yahudi alingka apobhawa-bhawa tee manga suludadu i

koburuna Isa. Manga incia atandaiakea bhatu maoge i koburu sumai mamudhaakana inda tee mokia-kiaia, kasiimpo manga suludadu ajaga iwe sumai.

28

Bhanguana Isa

28:1-10

(Mrk. 16:1-8; Luk. 24:1-12; Yah. 20:1-10)

¹ Salapana eona Saputuu, saeona mpuu i eona Ahadi, Mariam minaaka i Magdala tee Mariam mosagaanana alingka akamata koburu sumai.

² Sanampuu o tana akolendu makaa mpuu tee samia malaa'ekatina Kawasana Opu asapo minaaka i sorogaa kasiimpo apadhole bhatu katutubhina koburu sumai minaaka i bhambana tee auncura i bhawona.

³ Rouna malaa'ekati sumai mboomo bhibhito tee o pakeana amaputi mpuu mboomo cahea.

⁴ Roonamo kaekana, manga mojananina koburu sumai arengkumo tee atobhata mboomo mia mate.

⁵ Kasiimpo malaa'ekati sumai apogau tee manga bhawine sumai, "Bholi umaeka! Ku-mataua, ingkomiu upeelo Isa mopadhana motoloena i kau salib sumai.

⁶ Incia inda dhaangia iwe sii roonamo Incia abhangumo mboomo mopadhana ipogauakana i piamo itu. Mai, ukamatea o tampana potidholeana.

⁷ Sii-sii, ulingkamo pekadhei, paumbaia manga murina, 'Incia adhadhimo minaaka i matena tee sii-sii alingka aporikanaakakomiu i Galilea. Iwe

sumai ingkomiu bheukamata Incia!' Udhania opea ipogauakaku tee ingkomiu."

⁸ Manga incia alausaka alingka minaaka i koburu sumai, rampaakanamo kaekana tee kaunde-undena, manga incia abuntuli pekadhei to apakoleleaka o giu incia sumai i manga murina.

⁹ Sanampuu o Isa apokawamo tee manga incia tee adhawu salamu, kasiimpo manga bhawine sumai apekakasu i Isa tee asakulaka aena tee asombaia.

¹⁰ Kasiimpo apogaumo Isa i manga incia, "Bholi umaeka! Lingka tee upaumbaia manga witi-naiku mamudhaakana alingka i Galilea; iwe sumai manga incia bheakamataaku."

Kagau-gauna Mahakama Agama

28:11-15

¹¹ Tangasaana manga bhawine sumai i nuncana lingkaana, dhaangia pia mia o suludadu mojananina koburu sumai ambuli i kota, tee alaporoaka bhari-bharia kajadia sumai i manga imamu maoge.

¹² Manga imamu maoge sumai apomufakati tee manga mancuanaana miana Yahudi, kasiimpo adhawuakea doi bhari to manga suludadu sumai,

¹³ tee apogau, "Ingkomiu tabeana upogau mboo sii, 'I wakutuuna amalo manga murina aumba to amanako maeatina Isa tee ingkami tangasaana takole.'"

¹⁴ Ande o giu incia sii arangoa gubernuru, ingkami bhetapogau tee incia mamudhaakana inda apekarasaikomiu."

¹⁵ Manga incia atarimamea o doi sumai tee ape-waumea mboomo isameaakana to manga incia. Sumaimo tulatula incia sumai atoresa i tanga-tangana miana Yahudi sakawana sii-sii.

Parinta to Apakoleleaka Lele Malape

28:16-20

¹⁶ Kasiimpo sapulu samia murina sumai al-ingka i Galilea, i gunu mopadhana isusuakana Isa i manga incia.

¹⁷ Wakutuuna akamata Isa manga incia asom-bamea, maka dhaangia uka mosagaanana mome-rina.

¹⁸ Isa apekakasumo i manga incia tee apogau: "Bhari-bharia kuasa i sorogaa tee i alamu pad-hamo adhawuakaaku.

¹⁹ Rampaakanamo sumai ulingkamo, tee bhari-bharia lipu upamembalia muriku tee upapeb-hahoa i nuncana saronā o Ama tee Anana tee Rohina Aulata'ala Momangkilo,

²⁰ tee uadharia apewau sagala giu mopadhana iparintaakaku to ingkomiu. Tee udhania, Iaku kupobhawa tee ingkomiu sakawana aahirina za-mani."

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3